






23,385 / B/3



154.









DE

# CURANDIS HOMINUM MORBIS

## EPITOME

PRAELECTIONIBUS ACADEMICIS DICATA

AUCTORE

JOANNE PETRO FRANK

SAC. CAES. ET R. AP. MAJEST. A CONS.  
MAGISTRATUS POLITICI ET OECONOM.  
MEDIOLAN., FACULTATIS MEDICAE AC  
NOSOCOMIORUM PER INSUBRIAM AUSTR.  
PRAESIDE, CONGREGATIONIS XENODOCHII  
PAPIEN. AD S. MATH. MEMBR., THERAPIAE  
SPEC. ET CLINICES IN TICINEN. ACADEMIA  
PROFESSORE P. ET O. ACADEMIAR. REG.  
SCIENTIAR. GOETTING. MANTUANAE, ET  
ELECT. MOGUNT. TUM SOCIET. PATRIOT.  
MEDIOL. ET MEDIC. HELVET. SODALI.


---

L I B E R V.


DE PROFLUVIIS.

P A R S I.

---



MANNHEMII MDCCXCIV.



Apud C. F. Schwan et C. G. Goetz Bibliop. Aul.



305169





---

*DE*  
CURANDIS PROFLUVIIS  
*LIBRI V. PARS I.*

---









# CLASSIS QUINTA.

## PROFLUVIA.



### GENERALIA DE PROFLUVIIS.

§. 463. **S**ub statu valetudinis perfectae, humores, in *animalem* jam *materiam* subacti, alii, per *circulum* vitalem abrepti, in vasis sui generis, aut singulas ad partes decurrunt; aut ab istis, vel continuato itinere, vel resorpti, communem ad fontem revehuntur; alii, ad certos naturae fines exhalati, *secreti*, mox proprios in usus colliguntur; mox, ob continuas necessitates, sine quavis interruptione, per opportunos canales, praefixa in loca distillant; mox, artificio mirabili, qui tardius effluerent, celeriores ad motus coacti, cum impetu prosiliunt; alii, vel inutiles ac superflui, vel ob noxas, quas, diutius detenti, aciores, inferrent, a sanis separari, — hic, vaporis

Integritas  
Corp.



sub forma , atmosphaerae continuo restitui ,  
 — illinc , communes in alveos guttatim de-  
 poni , et ab istis , vel , a mole excitatis ,  
 periodice *excerni* ; vel insolita liquoris acri-  
 monia stimulat , sine noxa *expelli* , obser-  
 vantur .

Sed et illam , quae necdum penitus in  
 animale naturam conversa est , ac tubo  
 alimentari includitur , *semidigestam materiam* ,  
 ut corpori nutrimento esse queat , tum ven-  
 triculo , tum intestinis certo temporis inter-  
 vallo detineri , ac resorbentium vasorum ac-  
 tioni exponi oportet ; atque in ipsis humorum  
 ciborumque recrementis e corpore eliminandis  
 natura nequidquam festinat ; sed partem isto-  
 rum , incognitos oeconomiae animalis ad usus ,  
 sine *putredinis* formidine , sibi ipsi reservat ,  
 et custodes , ne citius , et indecore aufuge-  
 rent , canalium excernentium ad ostia con-  
 stituit .

Profluvii  
 definitio

§. 464. Quotiescunque vero , aut *solido-*  
*rum continentium* , aut decurrentis , quiescentis  
*contenti* in his ipsis *fluidi* , aut utrorumque ex  
 vitio , vel citius , uberius , quam par est , vel  
 loco ac tempore non aequis , quae diutius ,  
 aut semper ex liquidis retineri oportuisset ,



amittuntur ; toties et statum morbosum , quem *profluvium* vocamus , adesse dicamus . Quas scholae *incontinentias* dixerunt , — a *profluviis* hae aliter non differunt , quam , quod in illis , materia , ad leges naturae , in cavo visceris collecta , ac certum per tempus , peculiaris *vi organi* , et *voluntatis* imperio , retinenda , nolentibus aufugiat ; in istis humor aut morbose secretus , aut suis e vasis profusus , vel tempore . vel loco , vel copia insolitis excedat . Ad *Classem* constituendam , vix interest , num *febris* aliqua hunc statum , — an vero nulla , comitetur ; an solidorum vel *impulsu* , vel *cessione* , humores aufugiant : cum illud ipsum , quod impellit , aut relaxat , tam *varium* , — nec minus , quam *febris* , aut *apyrexia* , a *profluvio* distinctum est ; quin igitur hanc classem aegritudinum , subtiliores quam par est Nosologi , morborum elencho , qui nusquam istorum iudolem et causas , sub naturalis defectu systematis , satis exprimit , excludant . Nos plures hinc morbos , licet indole atque causis , quae innumeras ejusdem rei sectiones exigent , diversos , ob hoc unum , quod fluida , sanitatis praeter leges , perductae , *profluviorum* sub titulo conjunctim describemus ; sed in generum specierumque



divisione, eorundem origines, affinitates, discrepantias, ut alibi jam fecimus, sollicite adnotabimus.

#### Diversitas

§. 465. Hoc in opere praestando, diversa liquidorum, quae suis ex alveis, naturae praeter leges, aut *placide distillant*, aut *jugiter effluunt*, aut *cum impetu praecipitant*, natura, dicendorum nobis ordinem suggeret: ut primum, de *serosi*, — mox de *mucosi*, — ac demum de *cruenti liquoris morbosoprofluvio*, aut *simplici*, aut aliis tum liquidis tum solidis alimentorum reliquiis *remisto*, disseramus. Mox ut *primaria* hi fluxus affectio, — mox aliorum ut morborum *symptomata* aut *signum*, vel ut longinquae irritationis *consensualis* effectus, — atque nunc *aucto*, nunc *imminuto* sub *Vitalis potentiae tenore*, incedunt; sed frequenter, nunc maximarum aegritudinum, nunc *criticam* ipsius salutis, scaturiginem uberrimam, constituunt. Interim non *totius* ubique vitio, sed, non raro exemplo, ex *locali*, et ad partem, ex qua humor propullulat, restricta affectione, profluvia, — nunc *acutarum* sub periculo aegritudinum, nunc *chronici* ac *habitualis* fere morbi sub specie, — nunc quovis *sine ordine*, nunc



aequali sub *periodo*, — ac interdum *epidemicæ constitutionis* sub imperio manifesto, vel *interne*, vel *exteriorius*, oriuntur; atque *febrem* nunc quamvis, continuam, intermittentem, nunc vero *nullam*, aut modo *secundariam*, agnoscunt.

§. 466. Sub tam densis doctrinae de vero rerum ortu tenebris, tantarum causas aegritudinum indicare, perardui laboris argumentum est. Hae interim vel in ipso vasorum aut *universo*, aut *speciali systemate*, — aut in morbosa, ab istius statu vitioso plerumque pendente, *fluidorum* natura, — aut *in utrisque simul*, quaerendae sunt; et ex illis, quae ( §. 8. 92. 125. 274. 276. 392. ) de solidorum vel *aucta*, vel *imminuta* in fluida actione, ac istorum de vitiis monuimus, quin hic singula repetamus, non difficulter eruuntur. Vel enim vis motrix humorum a stimulo quocunque, universali, speciali, ultra modum excitata, nunc *in toto*, nunc *in partibus*, resistantiam vasorum propriam, ac aetati, sexui, temperamento competentem, *excedit*, ac liquida a vinculis, quibus a natura coercentur, liberando, ea ipsa *cum impetu* data porta *expellit*; — vel ipsi, per quos haec

Causae  
gener.

Solidorum  
actio  
adaucta

Imminuta.

Tenuitas  
humorum?Totius cul  
pa.

ruunt, aut servantur, canales, ob causas multiplices, internas, externas, *languescunt*, a fluidis obruuntur, dilatantur, ac per oscula extrema, vel per ampliata, naturalia parietum, interstitia, vel per novas, violentas scissuras, haec ipsa *transmittunt*, ac nunc in cava vicina, interne, nunc externus, *inermes profundunt*; — vel forsitan *glutine* liquidorum animalium naturali, per causas in hoc ipsum agentes, per contagia, miasmata, venena, vel acria ingesta, aliisque *soluta*, aut, nutritis materiae diuturno defectu, per haemorrhagias praegressas, *subtracto*, haec ipsa, vel minori sub motu, vel febris sub impetu, aut laterales per poros, aut vasculorum per oras aufugiunt; — vel demum, ratione non satis intellecta, tum solida, tum fluida, a statu sanitatis quamplurimum aberrant, ac reciprocum imperium, et mutuas affinitates, *transfusionis* sic dictae exemplo, deponunt. In ipso interim solidorum vasorumque contextu, ac vitalitatis principio, vel stimulo quocunque agitat, vel a materia fibris nervisque infensa, vel mechanica ratione, infractis, obtusis, depressis, abolitis, potissimae profluviorum quaerendae sunt origines. Singularis ac haereditaria, aut congenita so-



lidorum, vel pectoris, vel colli *structura* non paucas, easque integras, familias, quin labes humorum contribuere videatur, ac sub vivendi ratione meliori, ad pulmonum cerebrique profluvia disponit, ac inopinantes praecipitat. Vel sola jam hominis *aetas* diversa, profluviis ex parte corporis nunc ista, nunc illa, magis favet; ac foeminei sicut sexus post alia evolvi perficique solent organa: ita fluxus morborum ex istis, — alii, vix prius, quam pubertatis ab epocha, — alii, sat raro, nisi partus experto jam ab opere, solidorum certe nervorumque imperio, contingunt. Systematis vasorum libertas ad humorum distributionem requiritur aequalem; et si, alimentis pro universa machinae compage a stomacho robusto huic systemati fideliter transmissis, et hoc in alveo in sanguinem conversis, pars ramorum conspicua, aut membri majoris amputatione ablata, aut *repentina* compressione, aut vi spasmodum, occlusa, contracta, eruentum admittere torrentem recuset: hic ipse non raro, vi cordis non simul intercepta, secretiones quascunque alibi augere, aut certam visceribus violentiam inferre, ac morbosa generare profluvia observatur. Insignis sine dubio *nervorum* in vasa,

Nervorum  
actio.

quae, sensu licet vix magno instructa videantur, non descripto satis in anatomicis modo, tam copiosi tamen cingunt, et tam sollicite, varii variique, amplectuntur, pervadunt, potestas est. Quas non animi violentum pathema hoc in flumine cruento procillas mox provocat! et quantas, apud hominem fere solum, in praecordiis vasorum injurias hae turbae nervosae producant! Vel mitior verecundia candidissimum juvenilis innocentiae vultum copioso jam sanguine inundat; sub gaudio non minus, quam sub moerore, ac sub rara cum infelicibus misericordia, mox abundans per genas ruit lacryma; a terrore, liquida mox alvus, — et sub hysterico insultu pallidissimae urinae copia insignis, deponuntur; a cibi desiderati vel odore, vel memoria, salivae fontes aperiuntur; a medicinae, palato molestae, vel rei cujusvis ingratæ aspectu, tum stomachus, tum intestina evacuantur in aliis: quae, si in sanis adeo hominibus contingant; quam saepe in morbis a nervorum auctoritate profluvia pendere queant, non difficulter eruitur. Vel ipsam phlogosin, localis nervorum praecedat irritatio, et sub ista tam affluxus humorum increscit, quam secretio augetur, immutatur, et ex va-



sis affectis liquida in cellularem, aut cava vicina exprimuntur; aut seri, mucii puriformis, aut sanguinis sinceri per trachaeam, urethram, vaginam, anum, inducitur profluvium. Ex vitio contrario, ex uteri a foetu repentine liberati debilitate, atonia, abundans puerperae ex sinu cruor praecipitat: quem sola frigidae aspersio, genitalibus externis applicatio, nervosae certe actionis auxilio, coercet.

Hinc rarius, ac scholae quondam assere- Plethora:  
bant, profluvia ex fluidorum tenuitate scaturiunt; ac si forte talis occurrat: solidorum sine labe vix oritur, et istorum magis culpa humores vasa deserunt in morbis. *Plethorae universalis*, nisi, ut vocant pathologi, *ad vasa*, in sanis vix unquam occurrit exemplum; sed, quod illorum, qui plenitudinis hac specie laborare dicuntur, proclivitatem in fluxus sanguineos ac inflammationes inducit, major cordis irritabilitas, ac totius ad stimulos cum impetu subeundos promptitudo est. Si, quem suscipiunt, ac in sanguinem convertunt, succum nutritium, vasa continere, vel auctis secretionibus disperdere non queunt; debilitatis in illis hoc signum est: quae saepius in *localem*, quam in *universi systematis vasorum* affectionem terminatur. *Venarum* illa fere

morbus est: quae scilicet vasa, prae arteriis, sicut ad crura, ad anum, funiculum spermaticum, quin ad plexum choroideum, in varices et in saccos nodosos dilatantur: ita, sub difficili, et cum obstaculis luctante cruoris incessu, circa glandulas infarctas, tuberculorum ad basin, ad ulcera cancrosa, et ad viscera laxiora, ob sanguinem collectum turgere, aut istum, data causa, frequentius periodice, eructare observantur.

Causae secundariae.

Quaecunque hinc, *primo*, tum cordis, tum vasorum actionem per stimulum admotum intendunt; ac res omnes, quas *febris inflammatoriae*, et *inflammationis localis* ut causas adduximus (§§. 118. 125.); sub canalium resistantia ab earum impulsibus superata, ut in ipsa inflammatione vasa integra, laterales per poros, jam faciunt (§. 126.), profluvia quaecunque excitare valebunt. Quae vero, *secundo*, vasorum contextum aut debilitant, aut laedunt, aut nervorum in eundem imperium vel imminuunt, stupefaciunt, suspendunt; vel ob morbosam sensibilitatem (ab ea, quae ad veras inflammationes praedisponit, sollicite distinguendam), ad motus spasmodicos, et circulo humorum per partes aequali adversos, vasculosum systema per-



ducunt, — in genere, quae aut *inflammationes* non veras, secundarias, locales, *erysipelaceas*, vel sine ulla, vel saltem inflammatoria sine febre, vel cum illa, quam *nervosam* appellavimus (§§. 50. — 90.), incedentes, accendunt, — aut universalem, localem in vasorum systemate atoniam progenerant, ac vitalem potentiam in eodem, aut vicino contactu, aut per consensum, infrangunt (§§. 92. 130. 274. 288. 317. 392.), — ea singula profluviorum ut causae considerari merentur.

Sunt vero causae, imprimis externae, quae peculiarem, et vix non, ut vocant, *specificam* actionem, solius *stimuli* ratione vix satis explicandam, in partes corporis diversas exercent. Sic morbillorum, scarlatinae, variolarum, syphilidis, contagia, — sic causa, catarrhos, tussimque ferinam epidemice producens, in faucium, et narium, et bronchiorum imprimis membranam pituitosam rapiuntur; sic mercurius, quacunque sub forma, cautela, porrectus, salivales mox glandulas, prae parte quacunque, exstimulat, — cantharides, asparagus, terepinthina, quin solum jam rhabarbarum, vel sine stimulo in partes alias manifesto, in viarum

Actio specifica.

urinalium superficiem , actionem potioreman  
manifestant, etc. Vel sola de obscoenis cogi-  
tatio , jam sanguinem genitalibus abundantem  
transmittit , et fertilis liquoris secretionem ,  
excretionem accelerat; a papillarum ad mam-  
mas suctione , lochiorum augetur excretio ;  
solusque moeror animi , copiosas mox lacry-  
mas profundit : quae singula non ob aliam  
rationem hic adducimus argumenta ; quam  
ut actiones naturales , morbosas , non ubique  
tam a stimuli intensitate majori , aut minori ,  
quam saepe a singulari ejusdem in partem  
vel istam , vel illam effectui , et a legibus  
sensibilitatis in quovis organo diversis ac  
propriis pendere demonstramus .

Prognosis.

§. 467. Varia profluviorum , pro humo-  
ris , qui disperditur , nobilitate , quantitate ,  
pro celeri , vel magis lenta istius jactura , pro  
aetatis , temperamenti , sexus , ac morbi ra-  
tione , pro causarum , per quas oriuntur ,  
natura , et pro symptomatum junctorum di-  
versitate , est prognosis. Profluvia *serosa* , nisi  
major , aut repentina , vel in longum protra-  
cta sit excretio , cum damno minori ab ae-  
grotantibus feruntur . Ubi *mucus* , aut *lymph*a ,  
vel cum istis , vel sola , copiose , aut in lon-  
gum



gum secedunt: majus est nutrientis principii dispendium, ac debilitas, quam ex seri excreti portione aequali, vel et longe superiori, major insequitur. Praeterea, quas partes hoc a blando liquore obduci, lubricari, laxari, et a mutua concretionem praeservari, — quarumque nervos a nimia nuditate, siccitate, asperitate defendi oportuisset: haec, mucosa hac veste spoliatae, in contrarios affectus labuntur. Huc celerior *chymi* ex ventriculo, et *chyli* per intestina ejectio, aut lymphae ex laeso hujus laticis nutrientis canaliculo diuturna profusio, imprimis spectant, quae si multum protrahantur; eventum corpori funestum, tabemque aut hydropem praedicunt. A *lactis* uberiori, aut longiori, quam par est, ex mammis profusione, mulieris sanitati non parum detrimenti infertur, ac proprii non modo corporis praescinditur nutritio; sed et pectori, apud matres graciliores, insidiae struuntur, fertilitas naturalis ad pauciores modo partus limitatur; vel utero suscepta nova proles necessario, in quibusdam, defraudantur alimento. Sed potissimum a *seminis*, aut praematura, aut senili aetate, aut quovis demum vitae stadio, frequentius, quam par est, aut alio, quam natura jubeat, mo-

do excreti jactura labefactantur et contabescunt animalia. Vix interim tam ipsum, qui hic dissipatur, mucosum olidumque liquorem, quam *convulsivam*, quae hoc opus comitatur, totius systematis affectionem, debilitatis majoris in se rationem continere, vel ex eo comparet: quod et foemina, cui *semen* negatur, licet minus ac viri, a veneris abusu aut masturbationis a vitio plectatur. A *synoviae* per vulnera, vel abscessus ligamenta capsularia penetrantes efflavo, articulorum rigiditas, ankilosis, immobilitas perfecta descendunt. *Puriformis* liquoris, vel et *puris* diuturna et copiosa secretio, praeter partis sic affectae laesionem, aegrotantes, ob nutriendi principii cum pure secedentis dispendium continuum, exhaurit: et hac ex ratione frequentius, quam puris resorpti effectum, febrem lentam, ac hydropem inducit. Quid a *sanguine* sincero, aliorum humorum penu dispersis, malorum nascatur, nemo est, qui ignoret. Prae aliis, infantes, — minus foeminae, quam viri, ab illius jactura offenduntur; ac in genere hydropes, et tabes, lipothymiae, et convulsio, mors ipsa, nunc citius, nunc tardius, haemorrhagias insequuntur.



Haec, ex profluviiis oriunda, et quae alia in sequentibus dicemus, incommoda, vel ex eo frequenter augentur: quod natura iisdem, cum diutius persistent, aut saepius revertantur, facillime assuescat, et malorum sic induat, infaustam suo tempore, *habitudinem*. Haec est, quae chronicis, periodicisque profluviiis tam despotice tunc imperet: ut restituto vix corpori nutriente, quem amiserat, succo; mox novae dira necessitas incumbat jacturae: quae vel ipsis roborantibus reluctatur, et ab illis, quae *falsam plenitudinem* imminuant, exasperetur remediis. Nec interim *bonis* ubique profluvia, tum serosa, tum mucosa, et sanguinea, privantur effectibus; sed, ut in febribus inflammatoriis saepe cruor ex naribus, vel ano, vel utero prorumpens, tum principio, saepe illas mox jugulat, tum earundem, sub judicio, saepe *crisin* salutarem constituit; sic et fluxus naturales forte alibi suppressos, ad partem licet ab illa distantem, profluvia nunc supplent; nunc sub locali visceris plenitudine, aut sanguis, aut serum, aut humor puriformis ex viciniis distillans, vel arte naturam immitante extractus, saepe turbas, quod alia vix possent, egregie moderatur.

Method.  
general.

§. 468. Ex his apparet, non quodvis profluvium, sine causae latentis, sine morbi praegressi, habitudinis, ac symptomatum praesentium perspecta ratione, mox esse suppressendum. In genere, vel ex intensiori solidorum in fluida actione, vel ex vitio contrario, vel liquidorum ex culpa, nascantur profluvia: istorum, si pateant, si praestare id liceat, removeantur mox causae.

Sub impulsu aucto.

In primo quidem casu, in ipso jam stimuli exsuperantis effectu latet morbi, quem induxit, remedium: et expulso, quod virium intemperantiam suffulserat, liquido, hae ipsae praescriptos sanitatis ad limites redire, ac profluvium suspendi haud raro observantur. Ars ipsa, ad nimios solidorum impulsus coercendos, ut in febris inflammatoriae ( §. 120. ) et in ipsius inflammationis ( §. 133. ) curatione docuimus, tum victu tenuiori, atmosphaerae ambientis refrigeratione, corporis animique necessaria quiete, ac illius positione opportuna, — tum blandis, ac nimiam irritabilitatem corrigentibus, antiphlogisticis, ut vocant, remediis, et humoris systemati vel integro, vel speciali, molesti, vel generali, vel locali evacuatione, utatur oportet. Hinc a praepostero profluvia, hoc sub casu, si-



stendi conamine, ipsius sanationis non raro praescinditur subsidium, et morbi vel causa, vel, quae istius effectus multiplicat, nimia, pro hoc statu irritationis, liquidorum abundantia, in corpore includitur: unde viscerum infarctus, inflammatio, suppuratio, ac tabes, saepe primam sibi promunt originem. Sed quod natura hic adhibet profluvii in profluvio subsidium: hoc ipsum discrimine non vacat; ac malo saepe pejus est, et lethales non raro exitus agnoscit, remedium. Hinc per indicatas, et quae moderamen admittant, opportunis in locis, depletiones, non providam ubique, ars suppleat naturam, et easdem sic dirigat necesse est: ne sibi, artificiali cum profluvio, tam facile morbi causas, quam effectus, a solidis auferri posse, videatur. Saepe stimulus, a vera plenitudine quamplurimum diversus, hominum robustorum in solidis tumultus insignes, et plethorae non modo signa, sed profluvia excitare observatur: quae, vasorum quidem depletionem, ut majori jacturae occurramus, sibi exigunt; sed certe non illam, quam natura, vel ars ipsa, sine habito ad causae stimulantis, nec per solam humorum evacuationem eliminandae, naturam respectu, uberiores instituit, expe-

ctant. Non rarum est, ab acri rheumatico, vel alio, vasorum systema nunc omne, nunc certis in partibus, violentos ad motus excitari: qui profluvia, ut vocant, *activa* inducant, venaesectionibus, ac eorum quae aestus infringant, usu perutiliter moderanda; sed donec adhaerens, quae stimulat, materia, has partes dimittat; profluvia continuant, nec in solis antiphlogisticis est positum hujus mali remedium; nec robusti, ac ad morbos a solidorum vi nimia promptioris sub corporis habitu, *nervosum* systema principalem saepe scenam non ludit: et sub tali rerum apparatu, tum febris, tum fluxus ipse, post primas modo turbas a venaesectione, vel ab ipso profluvio sedatas, magis *opio*, quam sic dictis antiphlogisticis, obediunt.

Sub tenore  
imminuto.

Si profluvia ex potentiae vitalis aut in toto, aut in partibus *imminuto* tenore, aut laesione continui oriantur: tunc, deposita antiphlogisticae methodi idea, praemisso ubique causarum ( §. 466. ) scrutinio, ad illa, quae vasorum laesioni, inertiae, aut nervosae affectioni, hanc ipsam mentienti, generali, locali, opitulentur, sollicite recurrendum est. Ad *symptomaticas*, vel ex *consensu* pendentes, plerumque haec profluvia reducenda sunt



aegritudines: atque hinc vel morbo primario, vel causae alibi locorum degenti, adhibeatur medicina. Sic in profluviiis ex scorbuto inductis, licet debilitas subesse videatur; non tam felix eorum, quae maxime vel totum, vel partem corroborent, quam succorum vegetabilium, acidorum, est virtus. Sic ex febris intermittens forte causis pendenti, periodico profluvio, peruvianum mox corticem — ex nervosis affectibus orienti, narcotica, nervina medicamenta opponimus; nascentem ex causa biliosa, suburrali haemorrhagiam, methodo ( §. 109. ) indicata, seu emetico, purgantibus, non alio, vel locali subsidio compescimus. Si febris nervosae, contagiosae symptomata profluvium comitentur: ad ea, quae ( §. 94. ) diximus, auxilia descendimus; quae debilitatem solidorum, universalem, specialem, pro causa, fluxus agnoscunt: hos, illinc victus uberior, vinum generosum, aromatica, cortex, martialia, exercitium moderatum, aer rusticanus, — hic vero frigida, adstringentia imposita, injecta, et fasciae componunt; profluvio ex acri, ab externis ad viscera repulso venienti, non alia, quam quae ad pellem hoc reducant, aut corrigant, conducunt: etc.

Sub vitio  
humorum.

Haec ipsa, ex parte, jam illa, quae humoribus tribuuntur, vitia comprehendunt: ut quae, si interdum profluviiis subesse videantur: remedia, tum causis (§. 466.) opposita, tum alia, quae symptomata compescant, requirunt.





## O R D. I.

## PROFLUVIA SEROSA.

## G E N. I.

## EPHIDROSIS.



§. 469. **Q**uem per amplissimam cutis superficiem continuo exspiramus, vapor, animalis sub specie distillationis, ab atmosphaerae, se ipso frigidioris contactu in guttulas condensus, *sudorem* constituit. Hic liquor, in sanis coeterum hominibus, transpirationis a materia vix aliter, quam pinguedinosi principii, vel ex adipis subcutanei, vel ex sebi folliculosi connubio oriundi, distinguitur; sed aquosum, viscidulum, subsalsum, ac *urinae tenuiori* vix non aequalem humorem nobis offert. Interim, quae: praeter aquam et volatilem materiam, qua canis jam deleta heri absentis vestigia insequitur et ab aliis distinguit, — vel quae partim ex alimentis olentibus ad pellem, vix integre subacta,

Sudoris natura.

pertingit, partim distinctis ex glandulis ad genitalia, pedum inter digitos, ad axillas se. cernitur: principia, humana ex cute athmo. sphaerae reddantur: haec, ab illis, quae pulmones mephitica exhalant, diversa, licet ex retropressi sudoris effectibus, perniciosi quid habere suspicemur, cum sileant experimenta, hucusque ignoramus.

Definitio.

§. 470. Sudor ipse in sano homine ubique violentus; et hinc mitis quidem, sed in ea, quae sudat, parte morbus est. Haec vero secretio cutanea, vel naturalis, vel ab ista diversa, cum virium jactura nunc, ut sub crisi, imminuta, nunc adaucta, *Ephidrosis* vel *sudatio morbosa* vocatur.

Diversitas.

§. 471. Hoc autem sub statu (§. 470.), sudoris plerumque non modo copia, sed et ipsa principia, quod in urinis morborum contingit, mutari, atque aliis aliisque misceri videntur. Nunc *tenuis* certe et purus sudor, sub calore non magno, mox a cute in auras ut *vapor* ascendit; aut limpidus per membra, ut linthea vix tingat, distillat; nunc ut crassum, *viscosum*, *frigidumque gluten* superficiem urentem obducit; vel mora siccatum, hanc



ipsam, quasi matulam urinae, *sedimento* mucoso, spissiori, ac interdum arenoso, conspurcat; nunc *edorem* hic latex naturalem seu proprium, cuivis homini distinctum, conservat; mox *specificum*, *acetosum*, *urinosum*, *cadaverosum* spirat, ac princeps contagiorum vehiculum constituit. Sapor hic, vix notabilis; ibi *salsus*, *amarus*, aut *subdulcis* ac *mel-leus* apparet. Ob tam varia, nec hucusque satis, pro materiae dignitate, examinata principia, sudoris quoque color nunc *pallide flavescens*, nunc *lacteus*, vel *croceus*, *sanguineus*, ac interdum *subviridis*, *coeruleus*, aut *ater* occurrit. Nunc vero partem modo *unam* sudor, vel alteram humectat, aut ex *latere* modo *uno* exprimitur; nunc ex cute *universa* propullulat, et hic, *istius ex vitio*, - illinc, visceris *consensu*, vel alterius ut morbi *symptomata*, nunc prorsus *sine febre*, nunc *eadem*, vel continua, vel intermittente periodica, vel *hectica stipatus*, modo quovis *sine fructu*, modo *criticus*, atque in isto *moderatus*, in illo *copiosus*, *colliquativus* prorumpit. Sub coelo ardente humidoque *endemiis* quasi sudor est; ac interdum *epidemice* per provincias cum periculo, fere *pestis* adinstar, grassatur. Vel sub ipsa sanitate, certorum cutis hominum foctorem insignem continuo exspirat.

Natura  
morbi.

§ 472. De sudore febrili, vel *symptomatico*, qui sub continuarum principio, vel inutiliter, vel manifesto cum damno, profunditur; aut qui intermittentium paroxysmos, non febrim ipsam, claudit, — vel *critico*, qui morbi sub fine, — rarius, et per artem, contagiosarum sub febrium initiis, expellitur, jam diximus (§§. 6. 16. 35. 85. 87. 88. 91. 94. 97. 100. 140. 186. 323. 331. 332.); et cui pellis cum visceribus, potissimum abdominis, et cum utero, *consensui* subjaceat; *exanthematum* ( Lib. III. ), ac *impetiginum* ( L. IV. ) satis docuit historia. Hinc pauca de sudore dicenda supersunt, quae secundarium non magis quam primum cutis morbum respiciant.

Sunt, quibus urinae copiosius, quam aliis, — sunt, quibus alvus frequentius in die, sanissimis, solvantur. Sic et cutis in multis abunde transpirat, facilesque sudores, sine virium jactura, et quin morbum adesse dicamus, per propriam naturam contingunt. His, axillae, pedes illis, continuo, quin ex suppressi hic locorum sudoris phoenomenis ad praeivium in humoribus vitium concludere mox liceat ( §. 373. ), madescent. Sed quemadmodum aliarum organa secretionum,



nunc, a stimulo, aut sibi ipsis admoto, aut visceri affini adhaerente, agitata, functionem, cui praesunt, accelerant, pervertunt, aut protinus suspendunt; nunc, vel ob virium propriarum defectum, vel ob causae deprimentis, longinquae actionem, mox tardius parciusque absolvunt, aut deserunt; mox impulsui humorum resistantiam non ponunt, ac laticem susceptum, iners ut cribrum, transmittunt; sic et cutis, certe saepius ex consensu, vel morbi non sui devicta impetu, sed interdum vel *nisu*, vel *inertia sibi propriis*, a sudore copioso, vel ubique, vel certas ad partes inundatur. Verum est, et a cordis vasorumque vigore adaucto, et a stimulo per consensum in pellem dominante, sudores moveri; sed nunc, sub intenso febris inflammatoriae impulsu, haec ipsa sudoribus siccissima resistit; nunc, absente stimuli cujusvis insoliti indicio, hoc organum vel sponte mollescit, ac proprii humoris delectatur in balneo. Nemo est, cui, vel stragulis modo leviter oblecto, matutinis sub horis, sine febre, et quovis interno sine stimulo, sudores non interdum sat largiter prorumpant, diversum a naturali odorem manifestent, et novas quasi corpori vires, et pridie ignotam

animo hilaritatem concilient. Alii sine eausa evidenti, sine febre, sudoribus potissimum nocturnis, per menses diffluere, ac macie, debilitate, inappetentia mulctari cernuntur. Mutuum renes inter et cutem, vel apud sanissimos, secretionis commercium existit; ac minorem illorum actionem, istius mox functio addaucta, — non modo per vaporem invisibilem, sed et per sudores, sub eadem positione, faciliores, ac vicissim, supplere consuevit. Vel ipsi, quos *criticos* appellant, sudores, saepe cutis solius actione, sine stimuli, vel debilitatis febrilis augmento, sine quovis longinquo consensu, quin praevio sub caloris decremento, copiosi ex cute distillant; ac sicut febrium plurimarum in pelle prima sensatio ac forsitan origo est: sic et criticos sudores aut levis in ista horror, aut pruritus, aut certe singularis tractabilitas et mollities, cum pulsu molliori ac undoso, praecedunt: quae singula sat clare manifestant, hanc partem corporis tam late expansam, tam sensilem, totque vasis ornatam, non servile ut colon, sed frequenter vi propria, humorum nunc undas repellere, ac vaporem, sudores arcere; nunc aperto illos sinu suscipere, ac in corporis vel beneficium,



vel certam perniciem, hos ipsos uberius profundere.

§. 473. Sed ipsa causarum, quae cutis Causae secretionem adaugent, vel immutant, natura, haec (§. 472.) ulterius illustrat. Ac *primo* quidem, quaecunque, vel in sanguinem delata, vel irritationis localis imperio, cordis vasorumque in fluida contenta impetum adaugent, nisi majori, quam par est, stimulo agentur, aut in extremis vasculorum ostiis obstaculum resistat, ea, secretiones in genere, — atque, nisi frigus externum, quod ubique non facit, hoc impediat, sed tepor gratus ad recipiendas cruoris undas vasa cutis disponat, atque vel siccus, vasculorum extremitates exstimulat, vel humidus, relaxat; sudoris illam promovere pernoscimus. *Secundo*, quae corpus humore tenui aquoso locuplant, quin hic ipse, vel ob cutis a frigore, a densitate majori resistantiam, vel ob salinam forte liquidi naturam, ad renes, quibus haec magis favet, potissimum dirigatur, aut in tela cellulari subcutanea, anasarcae sub specie, restagnet: ea, sub conditione corporis ac atmosphaerae vix exposita, ac imprimis sub urinae alvique excretionibus mode-

ratis, aut tardis, transpirationis sudorisque augmentum producunt. Quae *tertio*, principia in sanguinem deducta, vel ob *volatilem*, quae pollent, naturam, vel ob indolem incognitam, sub eodem rerum statu, aut majorem cum pelle affinitatem alunt, aut vasorum exhalantium extrema potissimum afficiunt: ea, licet glandulae sudoris non praesint secretioni; istius tamen, cum nihil est, quod obsit, incremento, prae aliis, favere videntur. *Quarto* vero, quae res internae vel proprio contactu, vel actione longinqua, contextum cutis relaxant, aut nervorum in istam imperium refringunt: illa non minus, ac ea, quae exterius admota hunc ad finem conspirant, cutis rivulos aperiunt, aut potius vitali, quae in sano homine clauduntur, custodia privant. Hinc vel solus musculorum motus, cutis frictio, irritantia quaecunque, vel excitans animum viresque cordis pathema, vel febris, vel auctus atmosphaerae calor, transpirationem, et cum singula conspirent, sudores accelerant. Hinc vel solus jam potus copiosus, vel caloris insimul principio suffultus, tam facile per cutem, nisi frigore vel aliter contractam, nunc vaporum sub forma, nunc in guttulas collectus, mox diffluit. Hinc sudor perade



peraddito huic potulento volatilis, aromaticae naturae medicamento, eo certius, si modo atmosphaerae non reluctetur conditio, sudores proliciuntur. In genere contagia, non pauca, variolosum inprimis (§. 331.), prae aliis morborum causis, aut cutem ipsam invadunt; aut in illam ex longinquo dominantur: ac non raro, quin illorum aut in vasa impetus, aut deprimens in nervos actio id ipsum ubique efficere videatur, sudores expellunt. Hinc demum ipsa fluidorum a vasculis cutaneis, ob calorem externum, ob laxitatem, ob circuli sanguinei ad viscera impedimenta, vel ob spasmos internos, receptorum multitudo, ac eorundem, a potu copiosius assumpto, tenuitas, — aut iterum illorum a contagioso, vel et purulento principio mutata conditio, — vel arcte circumfluens aut partis, aut corporis totius vapor atmosphaericus, aut proprius, — vel congestus in primis viis, ac abdominales in nervos agens saburrarum putridarum fomes, — vel inhaerens vento meridionali incognita nervisque inimica potestas, — vel febris *elodes* (§. 85.), *diaphoreticae* intermittentis (§. 35.) causa, — vel demum nervorum, ut ad partes modo quasdam, vel ut in convalescentibus, in de-

bilioribus, somnoque meridiano, nocturno detentis, aut scorbuticis hominibus, sub terrore, doloribus, anxietate, lipothymia, vel agonia, suspensum, aut vix non prorsus ablatum in cutem imperium, — frequentem, atque saepe nimis in febris nervosis, contagiosis funestam, sudorum sistunt scaturiginem, ac loco blandi tenuisque liquidi, humorem alienis principiis, atque ipso interdum sanguine inquinatum ex pelle profluere cogunt. An sub *colliquativo*, ut appellant, viscidiori plerumque, sudore, cujus a fluxu mox corpus contabescit, ut in urina illorum, quos *diabetes* (§. 480.) exhaurit, *saccharinum*, aut nutriens principium per cutem quotidie diffilatur? . . . certe chylus aut humor lacteus per vasa cutis cum sanguine circumactus *sudoris acidi* in multis rationem offerre, ac sudoris, licet rarioribus exemplis, nunc *lactei*, nunc *mellei*, nunc *oleaginosi*, *crystallini*, observatio, id indicare videntur; atque primam, quae dabitur, haec experiundi, nanciscemur occasionem.

Prognosis. §. 474. Quod sudoris febrilis, symptomatici aut critici, ad *prognosin* attinet, hanc

alibi jam satis exposuimus. Nec sermo hic esse potest de aliorum morborum sudoribus: ut quorum significatio ex illorum natura potissimum desumitur. In genere sudores, sine febris aut stimuli alterius ratione, vel in parte, vel ad omnem superficiem facilius, quam par est, prodeunt, istarum debilitatem, vim nervosam infractam, vel obstacula circulationis, secretionum, excretionum aliarum, interna portendunt, et quo profusius per cutem distillant, aut quo magis a naturali tenuitate, colore, odore, sapore recedunt: eo majus vel de solidorum fluidorumque turbis, vel de secretionis cutaneae vitio, atque de humorum utilium jactura, testimonium largiuntur. Qui interim ad pedes, axillas, in multis sudor prorumpit: hic, licet foetidus ac ingratus, sanitatem non ita, ut incaute suppressus, offendit. Qui sub tabe purulenta, vel alia, profusus ex cute sudor ruit, hic citum vitae miserandae terminum imponit; aut per frigus externum retentus, diarrhoeam colliquativam inducit.

§. 475. Sudori febrili, tum symptomatico, Cura. tum critico, medendi rationem exposuimus.



( Lib. I. II. III. ). Aliorum , qui morbos quoscunque ut symptoma comitantur, medela vel ex tradita istorum , et causarum , e quibus oriuntur, doctrina elucet; vel ex iis, quae alibi dicenda supersunt, patebit. Qui ex contracta cum hac pellis excretionem consuetudine sudores nascuntur: hos per artem arcere, jam dicta pericula vetant. Qui interno sine morbo facilius, quam par est, sudores prosiliunt: hos, illa, quae sudoris habitudinem inducant fugiendo, sepositis potu balneoque tepidis, diaphoreticis, ac nimis, quibus cutis mollities augetur, vestimentis, debilitate per corporis exercitia, frictiones, balneorum frigidorum, aut simplicium, maritimorum, aut corticis peruviani, vel salicis albae decocto junctorum auxilio, correctae, vel unguentis oleosis dissipari licebit. Illorum, qui ex morbis gravioribus resurgunt, sudores, per victum nutrientem, vini haustum generosi, per elixir vitrioli, ac quotidianam in aere liberiori et puro equitationem, vel per navigationem fraenantur. Infusum salviae, cinamomi, cum vino paratum, quam optime huic fini respondet. Nimios sub aestatis calore sudores superaddita po-

tulentis spirituosus portio liquoris , et quies moderantur. Plures vero, sub coelo calido, ob sudorum impatientiam, gravissimis, ab illorum suppressione, morbis occasionem dederunt.





## ORD. I. GEN. II.

### DIABETES.



Secret. urinae vitia.

§. 476. **Q**uod *renes* secernunt, ac *vesica* per *urethram* dato tempore expellit liquidum, pro hominis aut sani, aut morborum aetate, sexu, temperamento; — pro potus, cibi, medicamenti ingesti, — pro coeli, atmosphaerae, — pro cutaneae, alvinae excretionis, — pro corporis, quin pro animi ipsius aut quieti, aut stimulis agitati, — ac demum pro temporis, quo suis in alveis retinetur ac stagnat, conditione, tam copia, quam indole diversum: hoc, vel abundantia, paritate, principiis vitiatum, vel, a naturali non tam alienum, aut citius quam par est, aut praeter voluntatis imperium, aut tardius et cum labore excretum, vel protinus suspensum, plurimorum, nunc signum ac effectus, nunc causam morborum constituit. Ex istis,



modo illi, qui ex lotio, vel copia insigniter adaucto, vel, naturae praeter leges, principio nutriente onusto, vel aegrototo nolente ac inscie excreto, nascuntur, *profluviorum* ad classem spectantes, *diabetis*, ac *enuresis* sub titulo, attentionem sibi nostram exposcunt.

§. 477. Rarissimam aegritudinem dixerunt esse *Diabetem* sive *Dipsacum*: ac nos ipsi, <sup>Diabetis infreq.</sup> *viginti* per annos in *Patria Germana*, diversas inter gentes, medicinam excernentes, modo *tria*, quae multis nec unquam se offerunt, hujus morbi conspeximus exempla. In *Italiam* transvectis interim, *diabetes* nobis, vel brevi octo annorum curriculo, jam *septies* oblatus est; nec dubium nunc quidem alimus, hunc morbum frequentius, quam cum aliis non ita pridem nos ipsi credebamus, ubique locorum occurrere, et a medicis, in urinae *quantitate*, aut *saporem* haud satis attentis, non semel non adverti.

§. 478. Est autem *Diabetes vera corporis* <sup>Definitio</sup> per urinam colliquatio, aut lotii profluvium, vel copia potum longe superante, utplurimum, vel *principii saccharini* admistione excedens, cum siti inexplebili, cute arida

squamosa et macie extrema sine febre in longum plerumque incedens.

Divisio.

§. 479. Vario sub aspectu hic morbus incedit, ac in plures hinc species distinctus fuit. Nunc etenim *insipida*, aquosa, nunc, quasi a melle admisto, *dulcis*, quae excernitur, urina est. Quem *lacteum* ( *chyluriam*, *coeliacam urinalem* ) dixerunt: hunc, si ab urina *subalbida*, quae, susceptâ, largas post epulas, sat valida deambulatione, a sanis hominibus subinde, sine damno, excernitur, recedamus, nos ipsi nunquam conspeximus diabetem; atque multis *purulentam*, cum urinis certe non raro copiose remistam, pro *chylo* imposuisse suspicamur materiam. Non interim *lacteum* colore diabetem, viri scilicet septuagenarii hoc in *Ticinensi* nosocomio degentis, observatione freti, existere prorsus negabimus. Hic scilicet, ob insigne humeris sat longo tempore impositum pondus, post octo demum a nixu dies, ab insigni ad ultimas lumborum vertebrae dolore, tandem a febricula hinc inde, ad noctem crescente, correptus, insigniter sitire, et urinas *quasi lacteas* atque adeo copiosas excernere coepit: ut plures per menses quotidie, nunc sexde-

cim, nunc viginti hujus liquidi subdulcis libras, potum, licet plurimum ingereret, non parum superantes, per urethram expelleret. Sitis ingens, fames aucta, et macies torosi prius hominis extrema, cum tanta urinae copia collata, hoc in casu vix adeo *purulentam*, quam illam, quae diabetem comitatur, *tabem* latuisse, indicare videntur. Nec desunt similia, apud alios, *chylosi diabetes*, quae difficulter a purulenta materia repetamus, exempla. Quem *lienteriam urinalem* compellant, in qua, celerrima et copiosissima potus assumti, *nec mutati*, per renes et vesicam evacuatio contingat, conspeximus nunquam. Nec *mucosam* hoc in morbo urinarum naturam, nisi *mucum*, qui tenui pallidoque liquori dulcedinem conciliat, appellent, observare potuimus. Qui diabeten *idiopathicum* a *symptomatico* distinguunt: hi forsitan sat recte id faciunt; sed ultra, quam nobis quidem de hujus mali origine constet, sapere videntur; aut *spurium*, hystericum, febrilem, rheumaticum, qui sine tabe ac siti tam intensa incedit, cum *vero* diabete confundunt. Sed quamvis per longum tempus decurrere hic morbus consuescat; non desunt ideo, *acuti*, brevi tempore lethalis, quin *periodici*,



*intermittentis*, et *critici*, nisi *spurius* hic fuerit, diabetis exempla: et ipse, quem in *clinico Instituto* curavimus, aegrotus, cum sub calore aestivo, ac coelo sereno, parum in urinis excederet: autumnali ac hiemali sub frigore, vel cum pluviae instarent, quamplurimas mingebat. *Congenitum* diabetem, nisi majorem illam, vel sanos apud homines, qui forte parcius transpirant, urinarum copiam pro tali declarent, non vidimus. Duos unius ejusdemque familiae homines ex diabete perisse, compertum habemus; ac duorum, qui ambo hoc morbo laborarunt, fratrum, alibi exemplum narratur. *Complicatum* cum *urinae incontinentia* diabetem non ita pridem in sene, — *pleuriticos dolores* duobus in viris, atque in uno ex istis, *diarrhoeam* simul cum diabete *insipido*, lethali, — tum in hoc vero, tum in aliis quibusdam, *leucophlegmatiam*, *hydropem* simul *ascitem*, qui saepius dispersus, mox iterum redibat, observavimus. Rarissima complicationis hoc in morbo est species, quae *retentionem urinae*, quamplurimae, quamvis copia parva potus assumeretur, diabetem comitata esse refertur. Hinc licet hoc in morbo urina plerumque sine quovis dolore, atque sub coactae quidem, sed non de-

letae voluntatis imperio mingatur; est tamen ubi non tam facilis ejusdem a *dysuria*, ab *enuresi*, distinctio habeatur; nisi vel ad *copiam* urinarum, potulentis ciboque fluido ingestis longe uberiores, vel ad *melleum* eandem sorem, ad *sitim* intensissimam, et ad *maciem* aegrotantis extremam simul respiciamus. Vel *paucam* urinam, sed *dulcem*, et tabis, ut in morbo communi, causam, sistit *diabetes decipiens*.

§. 480. Prima, quae in diabetis, quos Symptoma vidimus, occurrebant, et *ex improviso* plerumque hominem prehendebant, symptomata, *oris siccitas subitanea*, ac *sitis* vix poculo a labris remoto recurrens, nec verbis describenda, fuerunt: et urinae non prius, ac a potu copiosius ingesto, augmentum habuere. Interdum morbus a siti, ac urinae profluvio *simul incepisse* refertur; sed et sanos apud homines vix ab aquis affatim epotis, mox lotium excerni, tam rarum non est; ac urinae sub diabete non minus copiam, quam nutritis, quae cum ista secedit, materiae jacturam, ab ipso potu tam exuberante repetere liceret: nisi major longe, quam per fauces ingeratur, liquidorum ex vesica quantitas prorumperet.

Urinae co-  
pia.

Haec ipsa vero tanta hoc in morbo esse solet: ut, cum puella non nisi *septem* tum solidi alimenti, tum potus *libras* assumisset, *triginta sex* tamen *pintas* urinae dimitteret. In viro paucos ante annos a nobis ad *Clinicum Institutum* suscepto, urinae quotidie ad *libras quadraginta*, vel et, semel, *quingenta cum duabus* ascendebant. Majorem urinae quantitatem hoc in morbo excerni, alii viderunt. Vix mitior nobis casus oblatus est, in quo non lotium ad dimidium, vel duas tertias ad partes, *ingesta*, — et excreti liquoris *pondus*, jam paucas post dies, illud corporis *tetius* quam maxime superaret.

Atque sub tali aegrotantis positione, saepe frigoris, aut frigescentis quasi liquidi ex lumbis in vesicam descendentis sensatio, ardor stomachi, et calor viscerum mordax, — interdum dolor ad suras, aut pedem, insignis ubique virium prostratio, cutis arida, plerumque squamosa, porrigo, hunc morbum comitantur. *Anorexiam*, quam aliqui diabeticis attribuunt, vel *aquae horrorem*, quem fidi auctores hoc in morbo se vidisse testantur, haud unquam observavimus. In unico aegrotante febris, mox morbi ab initio, jam



aderat, ac intermittentis tertianae quasi typum imitare videbatur; alias, plerumque febre, donec morbus adolescat, carere videntur. Vix non apud omnes, vel sub ipso *sitis incipientis* momento, vel paulo tardius, magna, nec a consueto convalescentibus cibo, apud nos sat copioso, mitiganda *fames* in conspectum prodibat, crescente morbo quamplurimum, donec febris sat conspicua se adderet, adaucta: quo tempore et arteriae debiliores, mollissimae, et tandem crebriores sentiuntur, debilitas quotidie increscit, atque calor, ut singula symptomata, ad noctem exacerbari observantur. *Noctis* tempore praesertim, inter diabetis principia, urinae copiam majorem fluxisse, apud alios notatur. Potens quondam veneris in castris miles, hoc a morbo vix correptus, non modo omnem cum uxore coeundi potentiam, sed, ut nobis referebat, seminalis vestigia liquoris, in totum amisit. Interea plerisque oris labia cum lingua et faucibus insigniter siccescunt, et vox debilis, fere rauca, cum tenaci ad gulam pituita et spumosa saliva, persaepe observantur. In alio, dolorem ad fauces, sine phlogosi, constantem, vehementem, ac pustulas ad linguam ac labia exortas

conspeximus. Sed sub linguae vel naturali, vel, a potu tam copiose assumpto, artificiali madore, non minor sitis in aegrotis quibusdam, ut vidimus, ardebat: ut quae certe apud omnes magis impetuosa est, quam sub febre quavis ardentissima, et sub majori faucium, ac in *diabete*, siccitate, vel uoquam alibi potus desiderium viderimus flagrasse.

Urinae dulcedo.

Sed ipsa urinarum natura, quae res Veteres omnino latebat, hoc in morbo mutata est. Quamvis enim et ab aliis, et a nobis ipsis, *insipidam* vel expertem dulcedinis urinam aliquando observari licuerit; plerumque tamen in ista, licet pallida, serosa, limpidissima, *sapor melleus*, vel succo *alni betulae*, verno tempore perforato e trunco profluenti, persimilis dulcedo se prodit. Hoc lotium ad ignem vapores suaveolentes exhalat, atque ad certam spissitudinem redactum, melliformem, bruneam, vel saccharinam, — atque ulteriori solutione, inspissatione, facile depurandam, et ad sacchari communis puritatem, saporem, colorem reducendam largitur materiam; vel sibi ipsi commissum, fermentationem tum vinosam, tum acidam subire observatur. Pulcherrimas *acidi saccharini crystallas*, *alcohol*, et *acetum* hoc animali ex liquido

parata, in *pathologico* hujus Regiae Academiae museo conservamus; atque ex quatuor et viginti urinae libris, viginti sex materiae saccharinae uncias obtinuimus; nec desunt, qui majorem istius quantitatem diabeticorum ex lotio deduxerint.

Quod interim ex *unica* hucusque alterius observatione, non ita pridem, innotuit, est D. decipiens. saccharini principii in urinis aegrotantis, tabe lenta consumti, *licet ultra, quam sanus consueverat*, aut quam ingesta exigent, *non mingeret*, quantitas tam insignis: ut ex duabus urinae libris, saccharinae non minus, quam sex uncias, prodirent substantiae: quo tempore coetera diabetis symptomata, sitis indelebilis, lingua sicca, cutis arida et squamosa, aegrotantem vexabant: donec morbo, sub deliriis, convulsionibus, ad mortem properante, illud ipsum in urinis principium ad quartam sui partem decresceret.

In genere hic morbus *lentissime* decurrit, atque per annos non raro protrahitur. *Acutioris*, ut diximus, pauciora, nec visa nobis, exempla diabetis habentur. Nec rarum est, sub tam diuturno morbi decursu, urinas ad *sanas* interdum paulisper accedere, ac odorem non tam suavem, sed quidquam foeten-



tem, ut sanae faciunt, spargere; atque salia; sub evaporatione, diversa, ad maiorem quantitatem, largiri; sed mox, vel quovis, tam vegetabili, quam *animali* sub victu, ad pristinam dulcedinem urinae recedunt. Nocturno sub tempore maiorem aegroti nobis copiam urinae, ac interdiu, *continuo* dederunt; et ob crudelem, mox a poculis ab ore remotis, istius siccitatem, vel, etsi hoc satis maderet, ob sempiternam tum bibendi, tum mingendi necessitatem, vix palpebrae a miseris clauduntur. Hinc major indies debilitas, cutis siccitas pergamena, ac macies, quam ultimam tamen aliqui defuisse viderunt, sequuntur: et sub tam insigni licet aquarum profluvio, ad pedes tamen, ad lumbos oedema, et ad ventrem ascites, nascuntur; vel hydropi diabetem, huic vero hydropem vicissim successisse, alii testantur; vel, ut in diabete *insipido* conspeximus, et alii notarunt, *diarrhoea*, quae paucos juvisse dicitur, miserias adauget. Hoc tandem rerum sub statu, calores vespertini, pulsus debilissimi, frequentes, anorexia, anxietates, tremores, stupor, lipothymiae, vox rauca, deleta, urinarum profluvio se adjungunt, atque optatum

tum aegritudini tam dirae, ac vitae ipsi finem imponunt.

Vel ipsum sanguinis hoc in morbo a quibusdam educti *serum* aliquando, non ubique, *dulcedinem*, — cruor ipse, *crustam* nunc aliquam, nunc vero nullam exhibuit. *Salivationis* ac *diabetis*, quae vicissim incesserint, exemplum narratur; sed an *dulcis* tunc *saliva* effluerit (§. 491.) observationi, quod plurimum lucis accendisset, non additur.

D. spurius.

Quam longe a *spurio*, ut vocant, *diabete* haec distant; et quam parum hunc inter et *verum* affinitatis intercedit! Sunt scilicet, qui a prima juventute copiosas, sed non diversas a statu naturali urinas excernant; sunt, qui sub spasmodicis hystericis, hypochondriacis, dentitionis sub opere, in rheumaticis affectibus, sub crisi morborum, sub hydrope, ab epoto diuretico medicamine, copiosas pallidasque profundant urinas; sed vel sitis vix urget; vel potum ingestum non superat excretio; vel parum haec ipsa in longum extenditur; nec adeo mutata est urinarum a sanis conditio; nec macies, debilitas extrema, *symptomaticos* hos fluxus comitantur.

Viros saepius, quam foeminas, a *vero* diabete consumi, ex nostris saltem, quae

hujus morbi in istis exemplum haud suggerunt, et ex non multis, quae apud alios occurrunt, observationibus conjicere licebit. Coeterum et juvenem, octavum cum decimo vix annum superantem, et mediae aetatis viros, et septuagenarium jam, sed floridum adhuc robustumque senem, hoc a fluxu correptos conspeximus.

Causae.

§. 481. Obscurissima causarum hoc in morbo est ratio: et ex illis, quas coeteris profluviis subesse videmus, vix ulla diabetis satis explicat phaenomena. Qui *locali* pro affectu eundem considerant: hi *renalium vasorum laxitatem, debilitatem*, aut *paresin* subesse opinantur; ac renum, diabeticorum a morte, pallidorum, molliorum, acidumque odorem spirantium, nec ignota nobis, exempla adducunt. Quos, viri, ex diabete defuncti, junioris, renes *injectione anatomica* praeparari curabamus: hi, sub impetu moderato, *lacerationem* vasorum sunt passi. Sed forsitan ob longiorem, a morte, istorum in tepida macerationem hoc ita successit; ac certe frequentius haec renum ac tubulorum secernentium debilitas, dilatatio morbosa, post inflammationes hujus visceris, post diu.



turnas urinae suppressiones, post mictum sanguinis cruentum, purulentum, quin diabetes sequatur, — ac morbi magis effectum, quam ut causa, subesse, — nec sola partis secernentis major debilitas, secretionis in illa augmentum, — ac majorem longe urinarum, quam liquidi ingesti copiam, explicare videntur. Qui *spasmodicos* inter affectus hunc morbum collocandum esse contendant: hi, validioribus innixi argumentis, *spuriū* diabetesen sub spasmis hystericis, ab animi pathemate, a dulcibus ingestis, destitutus a stimulo, frequentem pro exemplo adducunt. Interim, vel ipsae, quae a *spurio* tam frequenter *diabete* tenentur, exempla *veri* vix offerunt, *hystericæ*; ac sub tam quotidiana morborum *spasmodicorum* frequentia, diabetes rarissimos inter morbos censetur, et vel ipsi *nephralgiae* vix unquam accedit. Renali sub *calculō* diabetes hinc inde exempla narrantur; sed praeterquod sub tam frequenti calculorum praesentia hic morbus rarissimae occurrat: copiosior hunc necdum urina constituit; et certe *cum calculo* diabetes incidere, quin *ex hoc ipso* oriatur, potest. Ex *renali abcessu* diabetes originem penerunt, qui, *lactescentis* urinae aspectu decepti, *puris* in lotio

solutionem pro fluxu *chyloso*, — et hunc ipsum pro *diabete* habuerunt. In *hepar* alii obstructum, scirrhum, ac in bilem vitiatam, vel saponis adinstar humores solventem, vel, si prorsus deesset, non satis aquam cum cruore miscentem, diabetis causam collocarunt; ast vero tam plurima, sine hepatis, aut visceris alterius obstructione hujus morbi exempla habentur; quam ipso sub *ictero* diabetes vix sequitur: ac rarius foret, pro causa tam communi, effectus, quam ut aliquam haec opinio auctoritatem tueatur. Sunt, qui potius in *ventriculum*, *intestina*, et in *assimilationis ex debilitate istorum pendentem defectum*, quam praedictas, aut alias in causas, hujus culpam aegritudinis conjiciant; sed cum plurimorum, qui diabete laborant, *famem*, et symptomatum, quae *stomachi inertiam* nobis indicent, absentiam consideremus: nec haec quidem fundamento fulciri sat firmo videtur opinio. Cum vero tam siccam, ac saepe squamosam in diabete *eutem* observarent, et simul ad urinae copiam, ingesta quaevis quamplurimum superantem respicerent: non pauci illo ipso in organo hujus morbi, tam in arteriarum *exhalantium* obturatione, quam in aucta vasorum

*inhalantium* in cute actione, et in aqua copiosius atmosphaerae ex penâ ab iisdem resorpta, originem eo magis derivarunt: quod constrictis vel hiemali sub frigore, vel a terrore, aut spasmo, vel abdominali a stimulo, cutis spiraculis, urinarum mox quantitas et pallor auferentur. Interim, praeterquod eam ipsam, quae ad cutem sese prodit, *siccitatem*, non minori argumento pro *effectu*, quam pro *causa* aegritudinis declarare queamus; cur tanta hic *sitis*, ac tanta *urinarum* in diabete *dulcedo* observentur, haec sola quidem ratio explicare non potest. Qui *sanguinis* hoc in morbo *resolutionem* in auxilium vocarunt: his, cruoris in illo, nunc *corium*, nunc naturalem consistentiam, — chronicam diabetis extensionem, ac aliarum sub eodem integritatem functionum considerata offerimus.

Tam facile aliorum, de causis diabetis, subvertere opiniones, — ac tam difficile est, his ipsis *meliozem* substituere! Sed propriae melius esse censemus fateri paupertatem scientiae, quam fucum fucum, humani cum sanguinis discrimine, superaddere.

Quodsi tamen, quae causarum sub rigo- Opinio  
propria.  
rosiore examine se nobis obtulerit, opinio.



nem, aliorum submittere iudicio hic recusare nequeamus; fateamur oportet: nos, sicut in *rabie canina ex animali veneno*, aut homini cum infecta saliva inserto, aut sponte ejusdem in corpore evoluto, ac faucium in nervos praecipue furiente, *horrorem ab aqua singularem* derivamus: — ita *violentum liquorum desiderium*, ut potissimum diabetis symptoma, ex contrario eosdem in nervos stimulo, ac imprimis ex *systematis lymphatici actione praeter modum incitata*, repetendum esse, ob rationes non paucas, suspicari. Certe, si *dipsadis serpentis* ( §. 480. ) *virus*, quod Medici ex Veteribus praecipue, ad unum omnes, confirmant, *diabetem* per morsum induxisse, ut credimus, ad fabulas haud spectat: jam summum opinionis expositae argumentum se vel nolentibus obtrudit. Sed ejusdem naturae virus posse, sub rariori vitae positione, vel et interdum sub febribus, tam acutis, quam intermittentibus in corpore humano praeparari: ex adducto *hydrophobiae spontaneae* exemplo, et ex tribus aliis, in quibus, sub ipso diabete, *horror aquae* comparuit, ni fallimur, sat satis apparet. Hoc ab acri, suo modo, ac per nervos in *systema lymphaticum* agente, mox resorbentium vaso-

rum ad quascunque superficies, internas, externas, ad oris, stomachique cavum, ad cutem ipsam, intenditur ac morbose increscit officium. Hinc primum diabetis symptoma, intensa *sitis* est, et extrema vasculorum inhalantium oscula, quod roris animalis ac muci in ore ac faucibus extillat, hoc omne promptissime ingurgitant, ac vel perpetuam siccitatem, vel sensationem in sitis organo perversam, ac inexhaustam bibendi necessitatem his in locis inducunt. Similia in ventriculo, intestinis contingunt: ac non modo *fames morbose*, ardoris in ventriculo, vel et syncopis sensus, sed citissimus *chyli*, non adeo ob *stomachi debilitatem*, quam ob celeriores resorptionem, *vix satis* in abdomine *subacti*, crudioris, secundas ad vias transitus promovetur. *Vasa cutis resorbentia* non minus actionem in ambientem *atmosphæram*, insolitam exercent, ac universo quasi corpori *sitienti* copiosum, quod ex illa offertur, humidum præcipitanter advehunt. A tanto liquidorum undecunque resorptorum torrente, continuo cum potulentis, tam avidè ingurgitatis, ad renes directo, secretio cutanea languescit, pellis aspera, quasi corium, exurit; cum interim materia urinae, quae non

modo *liquidi ingesti*, sed, brevi temporis intervallo, *totius aegroti pondus longe superat*, abundanter suggeritur; principium nutriendum illud, quod ex alimentis quotidie novum hauritur, atque, minus subactum, potissimum saccharinae substantiae elementum constituit, — tum alterum, quod in animalem humorem jam conversum est, omne per renes dissipetur, ac *tabes*, ut vocant, *ad maturam*, quae cum illa, quae in sexu sequiori ex *lactatione* diuturna vel *galactirrhoa* (§. 552.) contingit, quamplurimum conspirare videtur, continuo increseat.

Hanc morbi, tam obscuri, originem confirmare videntur tum inexpectatus ac celerior plerumque diabetis ingressus; tum ordo ac natura symptomatum non minus, quam latissima illius ad sexum, aetatem, temperamenta quaecunque, ac ad debiles aequae, ac robustos ad homines, extensio. Diabetis, quem *ossium emollitio* praecesserat, conservatum in fastis medicis exemplum non minus huc spectat, atque stimuli, vasorum lymphaticorum actionem nunc in solida (§. 399.), nunc in fluida augentis ideam nobis excitat. Nec alterum, quod nobis in viro oblatum est, cui *diabetes*, dum pustulae summopere



ardentes, dolentes, ad coxas prodirent, illico ( licet iterum sat longam post moram rediturus ) disparuit, parci faciendum esse putamus, confirmatum simili aliorum observatione, exemplum. Quodsi vel *insipidus*, vel *deci piens*, ut vocavimus, *diabetes* difficultates hic pariant: hae forsitan, si *primum*, ex chylo in sanguinem suscepto *pauciori*, aut priusquam hic per urinas secedat, in animale naturam jam magis, ac in diabete *mellito* locus est, converso, — *alterum*, si ex succo chyloso secundas ad vias copiosius citiusque resorpto, per potum tam copiose non haustum, minus diluto, derivemus, non improbabili conjectura solvuntur.

Quodsi illorum, quae hoc in morbo praec aliis auxilio fuerunt ( §. 483. ), licet admodum inter se diversorum, agendi rationem diligentius rimemur; haec omnis in eo consistere videtur: quod stimulo, illi, quem morbi causa exercet, opposito, abdominales praecipue in nervos agendo, *sensationis* in istis et in faucibus *perversae* conditionem immutando, ac in universum, hoc ex loco, nervosum systema operando, lymphaticorum vasorum resorptionis in opere intemperantiam fraenaverint. Hoc scilicet modo, licet minus in-

tellecto, sicut illa, quae resorbentium vasorum actionem intendunt, *hydropem* longinquum nunc alvo, nunc renibus expellunt: ita laudata in *diabete* medicamina, moderato *violentae suctionis* hoc in systemate impetu, tum *sitim* intensam extinguunt, tum necessariam *chylo*, quo rectius in primis viis subigatur, moram concedunt; tum denique cutaneae *inhalationi* praescriptos a natura limites assignant. Qui *sitis* rationem in morbis intellexerit: hunc latere non potest, a pauca interdum bile corrupta, circa stomachum collecta, a cibo putrido vel acri, ac sale condito, a minima ingesti veneni portione, quin solo a spasmō, ac dolore abdominis violento, insigne mox potus desiderium accendi. Nec ignota esse possunt, quae a vermium in ventriculo, intestinis, reptatu, in faucibus ac vocis in organo contingant; et ab *ascari*de per ductum *choledochum* ad *hepar* delato, vel ipsius *hydrophobiae* comparuisse symptomata. Hinc mirum non erit, si et *vermes* interdum *diabetis* ad causas in pueris a quibusdam revocentur: cum istorum, hoc a stimulo, urinae non raro tum quantitas augeri, tum lotium, seri lactis alioquin subalbescere videatur; et cum in uno ex nostris aegrotan-

tibus incredibilis *scaridum vermicularium* in ano, *diabeteu* tam praecesserit, quam perpetuo comitata sit, copia. Sed, nec ad sola *animalia*, nec solos ad *renes*, limitari videntur principii nutrientis, saccharini, morbosa secretio, excretio. Vel ipsa *plantarum* ad *folia* et *cortices* non raro gummosi, dulcesque liquores, ad stirpis ipsius *tabem* usque, transudant, et insecta, *aphes* innumeros, ut totidem parasitas, alliciunt. Ad cutem hominis, *sudor*, *mellea dulcedine* instructus, non semel comparuit; ac talem *sudoris colliquativi* interdum esse indolem, non immerito suspicamur (§. 471.). *Dulcissimam salivam* in morbis, alii non tam raro detexerunt; ac nota est *phthisicorum* plurimorum, sub fine morbi lethalis, insignis et ad nauseam usque molesta, *dulcedo sputorum*. Vel ipsum *aurium cerumen*, in sanis tam amarum, *dulcem* aliquando manifestavit saporem; ac forsitan saepius, quam sciamus, saccharini et nutrientis principii per *chronicas diarrhoeas* jactura, tabis, illi, quam *diabetes* inducit, aequalis, potissimam reddere nobis posset rationem.

§. 482. Ex dictis (§§. 480. 481.), quam *Prognosis.*  
*veri diabetes* infausta plerumque sit *prognosis*,



jam satis comparet. Non desunt quidem illius, feliciori sub omine, curati hinc inde, quae spem erigant, exempla: et ex nostris *duos*, salutem recuperasse reminiscimur; sed *ut ex viginti*, quos uno celebrique a medico conspectos fuisse legimus, *nec unus* quidem hoc a morbo liberatus est: sic et, qui perfecte apud nos convaluisse videbatur, et optime nutritus per plures jam menses incesserat; ab eodem, ut nobis per literas innotuit, morbo, quo mense pridem incoeperat, prehensus, perivit; alter vero aestivo sub tempore, quo morbus et aliàs, licet tunc minus, sopiri consueverat, ad suos, ut sanus, dimissus est. Hinc *senes* magis, quam *juvenes*, periculum hoc a morbo incurrere, nisi prognosi eadem ad omnes simul morbos extensâ, vix dicere audemus; nec, an *bibaces* magis homines, quam alii, gravius a diabete plectantur, ut dictum est ab aliis, satis certo pernoscimus. Ubi febris jam lentae symptomata hunc morbum comitantur: tunc citius in pejus ruit, — sed interdum adhuc per annum et ultra vitam protrahit aegrotans. Vix non ubique se hydrops diabete senescenti adsociat. An et hydrops interdum in *diabeten acutum* convertitur? Aegrotus certe,

qui rheumatica pleuritide, diarrhoea simul ac pedum oedemate adfectus erat, ad *Clinicum* depositus, in *asciten*, cum paucis primis lotio hinc incidit. Post vigesimam a morbo diem augentur urinae, venter subsidet; sed sitis ac fames increscunt. Mox potum longe superant urinae *non dulces*, et quotidie, licet alvus copiose semper flueret, ad *quindecim*, aut *decem et octo*, interdum *viginti quatuor ad libras* pallidae secedunt: donec morbo per dies adhuc sexaginta et septem, eodem tenore, protracto, extrema sub tabe, aegrotus expiraret. Jam antehac conspeximus hydroxicos, quibus aquae, vel sponte ac paucarum intervallo dierum, per urinas impetuosè profluxerant: quibus, insignem ad gradum emaciatis, pellis, inanis, ut saccus, ab ossibus pendebat; et qui, cum de hydrope tam feliciter devicto laetabantur, post paucas modo dies exhausti, inopinato et medios inter congratulantes amicos, ut funus, concidebant. Forsitan urinarum, quod in istis negleximus, examen, non solas modo aquas, sed nutriendi principium se per renes cum istis praecipitasse, in talia attentos docuisset. Qui morbi alterius *crisin* constituisset, *verum diabetem*, non vidimus.

Cura.

§. 483. Sub tanta causarum, quae diabetem inducere creduntur ( §. 481. ), ambiguitate, ac felicioris curationis, quae vel unam, vel alteram ex illis, ut proximam, confirmet, sub defectu, vix aliud hic a nobis expectari censemus, quam ut ea, quae pluribus profuerint, — atque alia, quae nobis ulterius hoc in morbo rebelli tentanda esse videantur, exponere moliamur. Nullibi plerumque Medicina auxilii tam egena est; quam ubi majores remediorum divitias pro una eademque aegritudine possideri gloriantur theoretici; atque in ipso diabete tam multa, tamque contraria inter se auxilia laudata fuerunt: ut vel ex hac sola rationis mendendi inconstantia, plurimorum jam nimis manifestetur inertia.

Pro varia scilicet, quam sibi quisque de causis diabetis formaverat, idea ( §. 481. ), nunc stimulantia, roborantia, adstringentia, nunc anodina, sedantia, nunc vero calculo adversa, vel et resolventia, et stomachica, et diaphoretica, vel demum antiseptica, in usum vocavit remedia. Hinc alii, *alumen*, aut in pulvere ( N. LIX. ), aut sero lactis solutum ( N. LX. ), bis terve in die, a scrupulo ad drachmam usque dimidiam, aut fer-



rum, aquas martiales pro potu, vel corticem peruvianum, aut quercinum, rhabarbarum, gummi Kino, quin ipsam cantharidum tincturam ( N. LXI. ), a guttis quinque ad decem, ac sensim sensimque ad triginta cum aqua, vel et balneum ex frigida, vel renum per fascias compressionem, in usum traxerunt; — alii, ad aquam e calce paratam, — hi, ad ea quae obstructions reserarent, — illi, ad amara ciborumque digestionem faventia medicamina confugerunt; — vel calido alii ex balneo; ex variis diaphoreticis, imprimis vero ex pulvere *Doveri* ( N. XXXII. ), a granis decem, ad viginti, triginta, quin gradatim ad sexaginta, quotidie ad noctem porrecto, auxilium petierunt; — alii quae sanguinem tenuiorem inspissarent, vel acria in eodem involverent, demulcentia cum lacte porrecta, mucilagines, emulsiones ex gummi arabico, tragacantha, vel, quae putridam solutionem averterent, antiseptica ex cortice, vel et acidis mineralibus, praefereunda esse duxerunt; ac demum alii, ut cutis spiracula, quae aquam atmosphaerae ex sinu nimis aride haurire creduntur, obturarent, pellem integram cum oleo sollicitè ungendam esse putarunt.

Ex tam contrariis inter se remediis, tum pulverem *Doveri*, tum cantharidum tincturam, et alumen, frequentius, quam alia, profuisse, apud medicos Scriptores — sed in propriis nequaquam diariis, reperimus. In diabete *insipido*, ab adhibitis modo *decem* tincturae praedictae guttulis, pauciores quidem, sed cum dolore, mingebantur urinae: suspenso medicamine, dysuria disparuit; eoque iterum porrecto, remedium quidem pertulit, sed, vicinus jam morti, auxilium non habuit aegrotans. In alio, ejusdem tincturae dosin gradatim ad drachmam in die adauximus: sed licet urinae hae sub methodo difficulter non prodirent; earum tamen copia vix quidquam imminuta fuit. Feliciori cum successu ex nostris quondam *Auditoribus* unus, vesicans emplastrum ossi sacro imposuit, atque *duos* ab hoc morbo aegrotantes restituit. In ipso vero *diabete mellito*, in quo nec alumen, nec tinctura cantharidum, nec pulvis *Doveri* cum camphora, nec corticis peruviani cum simaruba decoctum, nec demum myrrha cum sale martis, auxilii quid praestiterant: ab assae foetidae cum extracto myrrhae aquoso et valeriana, usu, conspicuum urinarum decrementum,

mentum, — ac tandem a *cupro ammoniacali*, bis in die a grano dimidio ad granum integrum porrecto, perfectam valetudinem, quam lautior simul victus confirmavit, obtinuimus.


In genere, sub tanta principii nutrientis per urinam jactura, atque sub fame tam insigniter in plurimis urgente, alimenta ad eam simul, quae vires in malo tam diuturno sustentet, quantitatem augenda, atque talia, quae succo nutritio abundant, quin eundem vel leviori digestionis sub opera profundant, eligenda sunt. Quam celerrime hoc opus in plerisque aegrotis absolvitur: hinc istis a cibo leviori et cum nimia facilitate extrahendo, mox novi latratus stomacho et ardores succedunt; vel chymus, vix e ventriculo descendens, a potu tam largo abluatur, et diarrhoeae sub forma, quin emolumento esse possit, expellitur. In aegroto, cui alvus sub *diabete* quamplurimum fluebat, urinam copiosam quidem, sed expertem dulcedinis, observavimus; ac licet alter diarrhoeam cum lotio sat dulci hinc inde pateretur, dulciorem forsitan sub alvo sicciori urinam minxisset. Potulenta hoc in morbo



diversa, lac ipsum cum saccharo remistum, sat aequali cum rerum eventu, porreximus. Interrogatus, quem sibi minus officere, atque sitim magis extinguere sentiret potum aegrotus, *vinum* esse respondit. An *alcohol* aquae superadditum, ut et sitim in messoribus magis fallit, et liquida, ne cito nimis per cutem aut renes aufugiant, cohibet, in diabete conduceret? . . . Ex acidis mineralibus cum potu remistis utilitatem, quod sciamus, non habuere aegroti. Qui acidum in primis viis praedominans interni ardoris pro causa aspiciunt: hi, aquam ex calce paratam cum lacte commiscent; sed morbum hoc potu non fraenant. Melius emulsio ex amygdalis et cum gummi arabico, quibusdam condixisse videbatur. *Sudores* in diabete, si partis unius madorem excipiamus, a tepido nequidem balneo promoveri conspeximus. Nec *opium* aegrotis, nisi breve, solatium concessit. An *balneum vaporis* hanc cutis secretionem restituendo, morbosam simul vasorum resorbentium actionem inverteret? Ab *oleo*, quod cuti illinivimus, urinae copiam imminui non vidimus. Cum vero fauces tam insigniter hoc in morbo, nervorum, ut puta-

mus, ex vitio, siccescere observamus: an forsitan *mercurius*, vel excitata cum eodem *salivatio* conducerent! . . . Qui morbi, de quo agimus, *raritatem* considerat, is talia a nobis *dubia*, non *facta*, proponi, condonabit.





## O R D. I. G E N. III.

## ENURESIS.



Natura morbi. §. 484. **Q**uem pro urinis, ne, perpetuo foetore molestae, indecore aufugerent, in pelvi natura recondidit, alveus: hic in sano animali per horas sat multas transmissum sibi a renibus lixivium, quin stimulum persentiat, conservat; donec et mole, et pondere, et acredine impuri liquoris adauctis, pro potus, ciborum, transpirationis cutaneae, ac propriae capacitatis, sensibilitatis, consuetudinis ratione, admonitus, non sine pleno voluntatis arbitrio, vi sua, vel abdominalium muscutorum, diaphragmatis auxilio suffultus, contenta vel placide, vel cum impetu expellat; aut, si aliter modestia, occupatio intensa disponant, diutius coerceat. Hanc lotii, vel medio sub flumine, *retinendi* potentiam oeconomia animalis non proprio, qui deest,



sphincteri, sed fibris a musculo, quem *anilevatore*m appellant, in subsidium vocatis concessit: ut quo *pseudosphinctere*, sub alvo fluente, laxato, urina nullum, quam comprimētis, aut compressae vesicae imperium agnoscit, ac nolenti animali subtrahitur. Diversis autem in morbis, quid quod apud pueros profundo sub somno, ac in sexu sequiori, cui debilior ad vesicam est custodia, sub variis positionibus, similia interdum contingunt: ac lotium, vel minori quantitate collectum, evacuationem, frequentia, non dolore, incommodam exposcit; aut antequam se homo ad mictionem componat, vel nolentis praecipitatur ex urethrâ, — aut somno detentis in lectulos aufugit, — aut insciis, delirantibus aegrotis per vias naturales, vel et alias, morbosas, quod *enuresin*, vel *urinae incontinentiam* vocamus, effunditur.

§. 485. *Enuresis* hinc est lotii, vel sani, Definitio.  
vel morborum, succedens praeter arbitrium ac indolens ex vesica per urethram, aut per vias non suas, stillicidium, profluvium; vel potentiae urinam coercentis sublatum aequilibrium, debilitas, aut perfecta abolitio.

Differen-  
tiae.

§ 486. Diversa foedi hujus morbi (§ 485.) natura est: atque nunc prorsus nolentibus, aut insciis hominibus urina profunditur, et *completa* est *enuresis*; nunc vix admonitis de nova collectione, priusquam ad mingendum se accingere quis possit, praecipitatur (*E. incompleta*), — aut sub somni, vel animi delirantis ludibriis (*E. nocturna, delirosa*) subdole aufugit hoc lixivium; — atque talia, vel ipsius vesicae ob morbum (*E. idiopathica*), vel ob causas, quae in ista non resident (*E. symptomatrica*), vel rarius (*E. accidentalis*), vel, consuetudine contracta, frequenter, et longos per annos (*E. habitualis*) contingunt. A *diabete* (§. 478.) distinguitur *enuresis*, quod lotium in ista, neque copia, neque sapore, cum illius urina conveniat; quod sitis tam intensa non urgeat, nec tabes aegrotantem emaciet. Interim, quod in superioribus jam dictum est (§. 479.), cum *diabete enuresis interdum complicatur*, atque diagnosis difficultatem, nisi attento in singula animo, non parvam opponit. A *dysuria*, *enuresis* differentia, ob dolorem, ardorem, qui illam comitantur, sat facile eruitur; sed et has affectiones subinde *conjunctas* incedere non implicat; ac sicut

ipsam *urinae*, imperfectam licet, *suppressionem* simul cum *enuresi* incessisse haud raro conspeximus: ita, ex non absimili ratione, *urinam* subinde et cum dolore, et praeter voluntatem, in illis, qui abscessum aut ulcera vesicae ad collum, vel ad prostatam patiuntur, emitti videmus.

§. 487. Vix alia, quam recensita hucusque ( §§. 484. — 486. ) symptomata, vel illa, quae proprio vesicae, vel alii, hoc in viscus agenti morbo convenient, in *enuresi* occurrunt. Interim et foetor insignis, qui continuum *urinae* profluvium comitatur, atque a quavis societate humana aegrotantes excludit, et facilis genitalium, perinaei a tam acri liquore erosio, *intertrigo* ( §. 397. ) huc spectant. *Puerorum* imprimis, ac *senum*, *enuresis* est morbus; sed et *foeminae* jam partum expertae non raro huic subjacent; et in genere hic sexus, ob dictas rationes ( §. 484. |, sub impetu, sub violentis vel tussi, vel cachinno, *urinae* portionem non raro invitus dimittit.

Symptomata.

§. 488. Quod in aliis animalibus, — hoc et in homine, non ad vitae socialis urbanae



tatem ac modestiam, sed a sola natura ad turpitudinem educato, contingere videtur: ut, quo loco ac tempore ab urina vesicam stimulari persentiat, hoc statim ac sine pudore hunc alveum exoneret. An coeterorum *pulli* animalium, humana ut proles, *sub somno* urinam deponant, nos quidem nescimus; sed certe nulli tam longa et incommoda, quam homini, est infantia animali; nec primis adhuc plumis destituta avicula nidum, ut puer, conspurcat.

*Sensibilitas.*

*Pseudosphincteris debilitatem, relaxationem* apud multos ut causam enuresis cum aliis admittimus; sed qui talem apud infantes aut pueros in se ipsos sub somno mingentes ubique supponunt: hi aut vesicae *sensibilitatis* majoris, aut propriae huic aetati incuriae, aut insomnii, ac pravae consuetudinis effectus cum vera debilitate confundunt. Non infrequens est interim *incontinentiae* haec ratio: et vel a casu, contusione ac vulnere perinaei, vel ab ani, vaginae, uteri, prolapsu, ab hernia vesicae, a calculo, collo istius diutius inhaerente, vel ruditer extracto, a partu difficili ac longo, a nixu sub tussi fetina, vel ad alvum reserandam violento, ab inflammatione colli vesicae praegressa, a

spasmo hujus visceris frequente, a veneris abusu, carneus hujus partis custos non raro debilitatur, relaxatur, distenditur, distrahitur, et a sphincteris officio removetur. An corporis totius debilitas, sine vitio locali, enuresin apud infantes senesque producat, dubitamus.

Frequens, neque cum sola debilitate confundenda, incontinentiae urinae causa est *paralysis*: cujus origo nunc ipsum ad cerebrum, — plerumque lumbalium vertebrarum in antro, — interdum ad nervos colli vesicae ac pseudosphincteris, delitescit. Ipsius quidem vesicae totius resolutio frequentius, quam colli aut sphincteris solius paralysis, his a causis descendit, ac vitium *enuresi* oppositum, *retentio urinae*, si viscus ipsum resolvatur, inducitur; sed praeterquod utrumque hoc mali genus non raro conjunctim et eadem ex causa procedat; interdum ad sola nervorum, qui pseudosphincteri concessi sunt, principia vel decursum, licet pathologicae sectiones id ubique non indicent, morbi causa haerere videtur. In febribus acutis, nervosis, aegroti frequenter, quod et ebriis hominibus contingit, urinam per stragula vel inscii, vel delirantes effundunt: ac primum

vesicae, mox et ani sphincteres officio praeesse recusant. In multis affectus soporosi, paraplegia, haemiplegia, hydrocephalus internus, ventriculorum cerebri hydrocephalus, cyphosis, contusio, concussio, luxatio, fractura, caries, exostosis vertebrarum, hydrorachitis, aut hydrocephalus in ossea hac specu, a nobis, vel adultos apud homines, aliquoties conspectus, depositio rheumatica, vel alia, inflammatio, abscessus, enuresin, plerumque cum urinae retentione complicatam, aut saepius hanc solam, producant. In aliis, calculi, aut fistulae ad anum suscepta sectio, aut longa in balneo frigido remora paralysin sphincteris pro effectu habuerunt. Hoc igitur vitalitatis ad inferius vesicae segmentum infractae, vel abolitae sub statu, urina vix ureterum ex ostiis in hunc alveum delata est: cum hunc ipsum decliviores per vias mox deserit, ac *sine sensu*, *continuo* per urethram obscoene distillat.

Sensibil.  
augm.

Sed vel contrario ex vitio, *sensibilitatis*, *irritabilitatis* ad superficiem vesicae internam *intemperantia*, vel nativa, vel per ipsam consuetudinem inducta, vel ex stimulo quocunque oriunda, urinae frequentius, quam par est, aut et praeter voluntatem redduntur. Sunt



certe, qui lotium sat diu, — sunt, qui per paucas modo horas, irritationis sine sensu, hoc liquidum retineant: quae diversitas non a sola hujus alvei capacitae minori, majori, — sed *propriae sensibilitatis* a gradu, vel a contracta, urinas aut frequentius aut rarius mittendi, *consuetudine* dependent. Quae, ab urinis soluta, forte solito vel parum acriora, vesicam alluunt: haec, licet ardorem necdum, vel dysuriam inducant, mejendi necessitatem in pluribus mox augent. *Infantum* his a causis frequenter proficiscitur enuresis: ac interdum unius ejusdemque familiae proles ad unam omnes hoc vitio, non semper sine labis congenitae, scrophulosae, arthriticae dispositionis suspicione, laborant. Sic omnes parentum a podagra vexatorum filios ad pubertatis usque tempus, *enuresi nocturna*, quaecunque demum subministrarentur subsidia, pertinaciter afflictos fuisse novimus. Vix menstrua filiae proruperant: cum sponte ac praeter opinionem hic morbus dispareret; sed brevem post moram, haec ipsa *spasmodica* in *asthma*, licet corporis eleganti firmoque habitu gauderet, conjecta, et *herpetibus* hinc inde ad cutem notata est. Quibus aut renes a calculo, aut urethra ex blennorrhoea

irritantur: his et vesica redditur sensibilibior; et hac ultima jamjam dispersa, hoc receptaculum a minori, quam pridem solebat, urinae quantitate ad istius excretionem sat diu sollicitatur. A rheumatico, catarrhali vesicae affectu, a chronica hujus visceris phlogosi, a sanguinis menstrui, haemorrhoidalis, has ad partes congestionem, quin dolor ubique se prodat, — et interdum, ut diximus, a solo cum partibus aliis consensu, hujus alvei sensibilitas et mictionis frequentioris necessitas non raro increscunt. A spasmo vesicae, vel abdominalium musculorum violento, urinas cum impetu expelli, epilepticorum exemplo comprobatur. An et *vermes* subinde vesicam humanam exstimulant? . . . *hydadites* cum urinis excretae, et qui *canum* in *renibus*, ac, prout nos ipsi conspeximus, in ejusdem animalis *vesica*, reperti sunt vermes ascarides, a polyposi concretionibus his in locis interdum reperiendis, ob organicam structuram diversi, vermium in vesica repertorum exempla de hominibus, a variis Scriptoribus adducta, confirmare videntur. Ex recto intestino per ulcus in vesicam intrasse, de quibusdam, — sed, quod canis exemplum sani nos docuit, non de omnibus dicendum est.

Quaecunque vesicae cavitatem imminuunt: Vitium ex  
ganicum.  
ut ejusdem, ab utero scirrroso, cancroso, hydropico, vel steatomate praemagno, vel et ossea substantia, quae in museo pathologico possidemus, vel polypis repleto, vel gravidō, — a foetus capite, aut clunibus, a scirrho intestini, mesocoli, vesicularum seminalium, angustatio, compressio, — membranarum, quae vesicam componunt, vel universalis, vel circa collum, ab ulceribus, a calculo inducta crassities, callositas, — excrescentiae fungosae, polyposae, iterumque calculus, tumores purulenti, scirrrosi, quae vesicae portionem inferiorem occupando, urinam ab eadem excludunt, contractionem aequalem, aut pseudosphincteris actionem impediunt, vel mingendi necessitatem perpetuant; — haec singula mox *enuresin*, mox vitium huic oppositum, mox illam cum isto conjunctam, constituunt.

Huc spectat urinae, vitio aut congenito, aut a praegressa inflammatione, exulceratione vesicae derivando, per vias haud naturales, atque voluntatis imperio nequidquam subjectas, ex hypogastrio, umbilico, perinaeo, intestinis, contingens egestio. Sic vesicam sub abdominis integumentis ad pubem



prolapsam, ac duplici externoque ostiolo ob-  
 scoenum liquorem perpetuo exstillantem  
*Brucksaliensi* in juvene, ac in tenero infante  
 conspeximus; post longas ischurias urinam  
 per urachum sibi vias aperuisse, experientia  
 testatur; a mesocoli carcinomate cum vesica  
 cohaerente atque corrosa, istius, et intestini  
 communicationem, — atque similem in *re-*  
*ctum* intestinum vesicae aperturam in viro a  
 dysenteria, — et in altero, ab haemorrhoi-  
 dali inflammatione correptis, observavimus;  
 ex prostatae suppuratione, ulcere venereo,  
 aut ex calculi sectione, frequentes ad peri-  
 naeum urinales nascuntur fistulae; ac mulie-  
 ribus non paucis a partu difficili, artificiali,  
 ex inductis colli vesicae, ac urethrae inflam-  
 matione, concretione, ac subsequente lacer-  
 atione vel ulcere, urina, foedo per vaginam  
 aut alvum spectaculo decurrit; atque tribus  
 in viris, in exemplum hic adductis, nunc  
 flatus, nunc faeces per urethram exivisse de-  
 teximus.

Prognosis.

§. 489. Cuivis ex enumeratis ( §. 488. )  
 incontinentiae urinae speciebus, sua et propria  
 est prognosis. Quae solam *debilitatem* pro  
 causa agnoscit, nec diu continuaverit, — quae

modo sub somno profundo, longiori contingit: ea remediis, opportuna vivendi ratione, adhibitis, vel sponte, crescentibus annis, dispareret. Quam herniae, prolapsus inducunt, hanc repositio sat cito suscepta dispellit. Quae ex *paralysi* descendit, incontinentia; ea, nisi causâ illius mox ab initio sublata, perraro, — ac si talem auferri non liceat, nullo tempore sanatur. In morbis acutis, enuresis, cum simul alvi excretio praeter arbitrium accedat, frequenter, non tamen ubique mortem praenunciat. Quae ex *morbosa vesicae sensibilitate* proficiscitur: ea, si causam istius dissipare valeamus, vel tractu temporis et sponte cessabit. Ex pessimis est enuresis, quam *vitium* vesicae, aut partis vicinae, *organicum* induxit; atque sic mali, de quo agimus, ex causarum, quibus debetur, consideratione potissimum eruenda est prognosis.

§. 490. Ut quovis alio in morbo, sic et Cura. in *enuresi*, praecipuum curationis momentum in causis removendis consistit: quod, cum frequenter obtineri non queat, imperfectam, aut nullam hoc in casu medelam aegritudo admittit.

**E. ex debil.** Nascentem ex debilitate incontinentiam, nisi provectam nimis, corroborantia, excitantia, ipsi loco adfecto admota, feliciter dispellunt. Hinc repetita partium vicinarum in frigidam immersio, frigida, vel spirituosa, aromatica fomentatio, linimentum volatile cum oleo nucistae expresso, *perinaeo* apposita, clyster frequens cum camphora ex corticis decocto, quod ultimum et interne cum rhabarbari aequa portione adhibendum est, praecipue indicantur. Interdum tinctura cantharidum a quinque guttis ad quindecim, viginti, cum debita cautela, bis in die, ex aqua porrecta auxilium concessit.

**E. ex paralysi.**

Non multum diversa, sed longe difficilior, ac plerumque infausta est enuresis ex *paralysi* medela. Praeter ea igitur, quae morbum primarium, aut praegressam apoplexiam; paraplegiam etc. concernunt, tum dicta jam remedia in opem trahenda sunt, tum vesicans ossi sacro imponendum, regio lumbalis linimento volatili cum camphora ungenda, viresque electricitatis, ab ossis sacri confiniis ad *perinaeum*, dirigendae sunt. Injectiones ex cortice peruviano paratae, hoc vesicae sub statu, per urethram mox refluunt, atque



in illius universali paralysi nobis, licet retentae, perparum praestiterunt.

Quibus urinae ex nimia vesicae *irritabilitate*, *sensibilitate*, vel citius, frequentius, quam par est, vel praeter voluntatem se praecipitant: his, suppressa primum, aut saltem moderata morbosae dispositionis origine, remedia ex causae ipsius cognitione petenda, atque hinc alia aliaque conducunt. Sic, ubi suppressio menstruorum, haemorrhoidum, plenitudini vasorum circa vesicam, atque tensioni, nimiaeque mobilitati occasionem praebuerint: hanc tollunt appositae vel pudendis, vel ano, perinaeo, hirudines, enema, fomentatio ex frigida cum aceto. Si ab acri rheumatico, vel alio sensibilitatem perversam contraxerit vesica: remedia huic acri corrigendo, ab hoc viscere avertendo, idonea indicantur. Quum calculus hoc in receptaculo contentus irritationem inducit, hanc sectio illius avertit; vel, si ab instituta operatione, vel post blennorrhoeas jam abactas, vel post alios spasmodicos affectus, vesica morbosam sensibilitatem diutius manifestat, *opium* sat larga dosi per clysteres intestino injectum conducet. Infantes sub nocturnis insomniis in se ipsos mingentes, ad coenam tum potu

E. ex sensib.  
bil. excessu

copioso, tum cibis, qui urinae copiam adaugent, abstineant; ut lotium, quo lectulum petunt tempore, deponant, avertantur; ac hora nunc ista, nunc illa, ex somno longiori, ut vesicam exonerent, evigilentur. Nec minae, nec verbera, nisi ratio et pudor, aut aetas major id faciant, habituali huic vitio medentur. Si forsitan universalis debilitas cum nimia vesicae sensibilitate conjuncta videatur; tunc chinae decoctum, ac coetera roborantia, — atque si per consensum vesica stimulari videatur, nunc opium, nunc illa, quae longinquae irritationis causam debellent, in usum trahenda sunt.

E. ex vitio  
organ.

Orientem *ex vitio organico* enuresin vix unquam medicina dispellit. Interim si urethra mulieris, ex partu difficili, in vaginam aperitur; cathetere flexili ad vesicam conducto, ac lotio per illum, tempore sat longo, sollicito evacuato, raro quidem, sed interdum urinae per vaginam defluxus avertitur. Vix unquam tam felices esse licebit, si vel ipsa vesica lacerata incontinentiam producat; interim *genuensis* nobis exemplum juvenis notum est, cui vesicae abscessus cum recto intestino sat aperte communicans, vel solius auxilio naturae sanatus est. Quam caput foe-

tus, vel uterus gravidus in vesicam exercet, haec saepe facili negotio aufertur, compressio. Vesicae scirrhus, callositas, excrescentiae, nullum ab arte humana auxilium admittunt.

Quo igitur in casu enuresin auferri non licet: urina saltem, ne foedo spectaculo nolentibus effluat, ac partes subjectas erodat, instrumentis, quae *Chirurgia* pro sexu quovis suppediat, colligenda est.







## O R D. I. G E N. IV.

## PTYALISMUS.



§. 491. **F**ons triplex *saporis* atrium irrorat, atque subtilem, penetrantem ille vaporem ubicumque exhalat; hic blandam, lubricantem lente eructat pituitam; tertius insipidam limpидissimamque undam nunc placide scaturit, nunc rapidam ac divitem cum impetu expellit. Insignis hanc ultimam, pro cavo non magno, glandularum congeries, vel sponte, vel nervorum imperio, irritatione quacunque, pressione coacta, profundit: nec febris hanc pereannem scaturiginem, ut illam muci, aut vaporis in ore penitus exsiccat. Ex cognita hucusque salivae humanae analysi, vix tanta, ut vel ab aqua puriori suppleri non posset, nobilitas resplendet; et animalis naturae, praeter suam originem, hic liquor vix multum ostendit; sed aliter nos docent digestio-

nis ciborum sub nimia ejusdem jactura languentis effectus, — aliter observatio, aperto scilicet, sub artificiali salivatione, hoc fonte, principium vitale has per vias, quasi in ipso diabete per renes, ruisse, — saporem hujus liquidi, cum sano in homine nullus esse consuevit, conspicuam in aliis *salsedinem*, in aliis *dulcedinem* insignem ac *mellem* prodidisse, — febres malignas, nervosas non modo praecipuam depositionum circa glandulas salivales sibi sedem eligere; sed per abundantem salivæ fluxum, quem aphthae non producant, non raro dispergi ( §. 91. ); — hunc ipsum liquorem potissimum *hydrophobiae* vehiculum, cujus unica jam guttula hunc morbum in sanos propaget, constituere; — ex omnibus humani animalis secretionibus nullam a solo nervorum imperio tam celeriter, quam istam intendi; — insigne glandulas salivales inter et testes, et mammas ( §. 174. ) et ventriculum, et ipsa intestina sensationis commercium existere: quae singula, salivæ dignitatem, tum sano, tum aegrotante in homine, abunde demonstrant.

§. 492. Quodsi igitur salivalis hic liquor Definitio.  
( §. 491. ) copiosius, quam naturae ad usus

requiratur, secretus, aut continuam atque molestam deglutitionem exposcit, aut ex ore praeter modum ubertim distillat, aut, ob ductus laesionem, se per genas praecipitat: *ptyalismus*, *salivatio* vocatur.

Differen-  
tiae.

§. 493. Ptyalismus vel sponte ab ipsa natura promovetur ( *P. spontaneus* ); vel ab arte inducitur ( *P. artificialis* ); atque ille vel *primarius* est ( *P. idiopathicus* ); vel morbi alterius *symptoma* ( *P. secundarius*, *consensualis* ) constituit. In quibusdam saliva non semper, sed *periodice* ex ore distillasse observata est ( *P. periodicus* ). *Epidemicam* interdum ptyalismus, *secundarius*, ut credimus, naturam assumit ( *P. epidemicus* ); et *criticae* salivationis, tum febrilibus, tum aliis in morbis exempla numerosa ( *P. criticus* ) habentur. Ptyalismum *traumaticum* vocamus, cum saliva ob ductus proprii laesionem externam, ut plurimum copiosius, quam naturales per vias fecisset, delabatur.

Symptoma-  
ti.

§. 494. Rarior spontaneus ptyalismus est, qui ex propria glandularum salivalium affectione descendat; frequentior ille, qui aliis sub morbis symptomatice propullulat. Quo.



cunque tamen hic modo nascatur, oris antrum continuo limpidissimi liquoris, vel simul muci, affluxu obruitur, et ad continuos screatus urgetur. Spumosam saepe indolem a muco commisto salivae assumunt, atque vel loquente, vel dormiente aegroto, per labia et mentum, nauseoso aspectu, distillant; vel qui clauso forsitan ore obdormiunt: hi, suffocationis, ab irruente per laryngem saliva, metu perculsi, desiderato a somno arcentur. Rarum est salivam tam copiose secretam non alio simul vitio laborare, quo cavum oris a phlogosi correptum, ab ardore, calore ac pustulis ulcerosis inquinatur. Interdum dolor ac tumor ad glandulas parotides, submaxillares, conspicuus occurrit. Sunt, quibus, ob miram ad partes faciei laxitatem, salivae per flaccida et pendula oris labra continuo derivantur; atque alii, vel sola consuetudine, vel a copia salivae inducti, lacu salivali vicina sibi loca quaecunque inundant. Omnibus vero a quotidiana salutaris liquoris jactura digestio ciborum difficulter absolvitur; et corpus, sub majori illius dispendio, quod salivationis mercurialis exemplo docemur, contabescit. Qui acida, vel pingui et rancida ventriculi, intestinorum saburra laborant;

hi, praevia *ustionis*, et quasi *flammae ex stomacho per oesophagum ascendentis* molestissima sensatione, limpidissimi liquoris quantitatem, sine vomitu, sat magnam, cum levamine eructant. Hic liquor, licet imo a pectore aut ventriculo ascendere videatur, salivalis protinus naturae est, et quasi metallico sapore instructus, cum maxima oppressione, anxietate rejicitur. Potatores hoc malum, sub horis matutinis, frequenter molestat.

Causae.

§. 495. Si majorem nervorum in glandulas faciei conglomeratas potentiam excipiamus, qua, ferculi desiderati odore, aspectu, vel sola percepti quondam saporis recordatione, saliva cum impetu jam prosilit; non aliis ex causis salivae, quam aliorum humorum ( §. 466. ) secretio naturalem excedit. Qua demum ratione *mercurius* salivam prae aliis secretionibus, quacunque sub forma porrectus, tam facile ac potenter adaugeat: hoc, sicut ex lege stimulorum generali explicari non potest; ita certam humoris salivalis cum hoc metallo *affinitatem*, licet minus intellectam, supponere videtur. Huic similem quodammodo subtiliora pestilentialium morborum *contagia* ( §§. 83. 92. ), externae cy-

*manchis causae* ( §§. 174. 176. ), atque criticae salivationis materia incognita, sat evidenter ostendunt; quamvis quicumque stimulus, oris cavo, vel ipsis glandulis salivalibus admotus, ut a sola jam fumi tabacini suctione apparet, eosdem effectus producat. Sic dentitionis difficilis sub opere, a dente carioso, a dolore, seu trismo, ut vocant, faciei, a gingivarum exulceratione, a linguae, aut faucium inflammatione, mandibulae fractura, vel tetano, convulsione, quin a sola jam oscitatione, glandularum, ductuumve salivalium a musculis compressione, a calculo sub lingua, vel in ductu salivali haerente, copiosam aegroti ex ore salivam profunduat; et ab aphthis deciduis, non minor humorum ex buccis excretio succedit. Suppresso ex pedum refrigerio, aliave ex causa, perspirabili vapore, vel renum secretionem imminuta, vel menstruis obstructis, vel adeo sub menstrui in teneris virginibus principio, sputorum interdum mox copia augetur. Salivatione praecedente, alvus dura, urina pauca, secretiones omnes parciore observantur; a diarrhoea suborta, vel perspiratione aducta non raro ptyalismus dissipatur; ac ad salivationem a mercurio praeveniendam, non certius, quam



tepor atmosphaerae, et aucta transpiratio, remedium habetur. Sed jam solus ad ventriculum, ad intestina stimulus abundantem mox prolicit salivam. Ex nausea, vomitione, copiose hic latex ex ore distillat; a scirrho oesophagi, gastritide, cardialgia, a colico dolore, a vermium reptatu, similia contingunt. Vel a sola conceptione, quanta non a gravidis sputorum rejicitur copia! et quanta non ab hypochondriacis, hystericis, melancholicis, ab illis, qui acidam aut rancidam in ventriculo saburram circumferunt, aut a *pyrosi*, expuitur saliva (§. 494. )! In homine ex *pancreate scirrhuso* contabescente, ad decem haec ipsa libras quotidie rejecta est. An oriens a suppressa salivatione diarrhoea, ex aucta ejusdem naturae *pancreatici liquoris* secretione descendit? Abundantem nuper salivationem in viro conspeximus, cui *paralysis ad linguam*, *intacto saporis officio*, pene omnem hujus particulae, quasi tabe laborantis, *motum* abstulerat. Coeterum, quae a faucium, genarum, pharyngis paralysi subsequitur salivatio, ea plerumque non ex aucta salivae copia, sed ex musculorum, hunc liquorem coercentium, inertia, aut ex deglutatione impedita, per mentum delabitur.

§. 496. Sub tam raro salivae *primario* ef- Prognosis,  
fluxu, *prognosis* momenta ex historia morbo-  
rum, quibus ptyalismus ut *symptoma* accedit,  
repetantur oportet. Qui sub fine morborum,  
sine virium jactura majori contingit: hic sa-  
lutarem plerumque illorum per has vias so-  
lutionem praedicit; atque talem per plures  
hebdomadas cum evidente beneficio fluxisse  
conspeximus. Qui salivam vel ex mala et  
indecora consuetudine, vel ex rebus acriori-  
bus, masticatione, suctione tractatis, copiose  
rejiciunt: his ciborum digestio labefactari,  
atque aliae secretiones excretionisque immi-  
nui observantur. A fortiori, neque critico  
ptyalismo, ut ab eo, quem pridem ad luis  
venereae curationem promovebant, non  
minus ob humoris nobilioris jacturam,  
quam ob impeditae masticationis, atque  
ob somni denegati rationem, extrema cor-  
poris debilitas ac macies brevi tempore in-  
ducuntur.

§. 497. Quae ratio medendi *secundario* Cura.  
ptyalismo conveniat; hoc vel aliis hujus ope-  
ris in locis jam expositum est; vel in se-  
quentibus succincte tradetur. Quae ex pro-  
pria glandularum affectione descendit, raris-

sima est salivatio, atque ex stimulo his organis proxime admoto, plerumque, ut videtur, catarrhali, rheumatico, facilius, quam ex sola debilitate, explicatur. Talem nos ipsi *habitualement* in juvene conspeximus, atque alterum ptyalismi, sex jam per annos verno tempore recurrentis exstat de foemina exemplum. Si calculus salivalem ad ductum aut glandulam suo stimulo ptyalismum inducat: peregrino hoc corpore prudenti sectione ablatum, importuna simul exsiccatur salivatio. Quam sibi methodum *traumaticus* ptyalismus exposcat, Chirurgia nos docet. Ex quocunque demum stimulo glandulae salivales irriterentur; fomentatio nunc sicca ex farina, vel cineribus cum herbis aromaticis atque camphora remistis, nunc humida ex emolliente decocto, cataplasmate, seu calor loci affecti aequalis, moderatus, plerumque conducunt. Salivationem rebellem vesicans nuchae appositum hinc inde moderatur. In aliis, balneum, et quae pellem ad sudores disponant, evacuatio alvina, profuerunt. A collutoriis vi adstringente instructis, in primario ptyalismo, vix multum expectamus; atque in genere retinendum est: salivationem, quae morborum ut *crisis* incedit, cum periculo repelli;




et vel symptomaticum ptyalismum, ne difficilis diarrhoea insequatur, cum prudentia majori esse pertractandum.



## O R D. I. G E N. V.

## EPIPHORA.



De lacrym. §. 498. *E*piphoræ, ut *symptomatis*, quod oculorum inflammationem frequentius comitatur, alibi ( §. 150. ) mentionem jam injecimus; sed, licet profluvii hoc genus rarissime *primarios* ad fluxus pertineat; ejusdem nihilominus considerationem, ut Medicorum attentione non indignam, pro meliori systematis morborum intelligentia, hic breviter resumimus. Non paucis quidem animalibus lacrymales glandulas natura distribuit; sed nulli ex istis tam durum ac frequens, quam generi humano, hoc de fonte hauriendi, imposuit onus. *Lacrymarum* vero sub nomine tam rorem illum, qui ex oculi et contigua palpebrarum superficie *insipidus*, ut videtur, evaporat, quam commistum huic ipsi *salsum*, et ex glandulis sibi propriis distillantem, hu-

morem intelligimus: qui, licet ob separationis solius intemperantiam vix debilitatem inducat; ob organi tamen hunc humorem aut secermentis, aut continentis, aut ab oculo ablegantis vitium, incommodam ac foedam aegritudinem, quam *epiphoram* dixerunt, constituit. Naturam lacrymarum quod attinet, ea, si extremam oculi sensibilitatem consideremus, in propria, nec a longiori stagnatione acquisita, sed recentissimo liquori jam concessa, et ipsius adeo urinae acorem superante *salsedine*, jam primo aspectu non indignum admiratione argumentum nobis offert. Limpidus nempe et inodorus, sed, si modo pauca *dulcescentis* sub ophthalmia lacrymae exempla excipiamus, ubique *salsus* hic liquor secernitur: qui, ut recentior Gallorum analysis demonstrat, aquam distillatam pondere modo parum excedit; tincturae *heliotropii* colorem non immutat; sed maculam in charta, vel a violae, vsl a malvae succo coerulea, constanter *viridem* inducit, super igne copiosas et aliqua tenacitate non destitutas bullas mox contrahit; lentius et solo ab aere exsiccatus, *crystallos* ex paucis sale marino et materia alcalina compositas, — citius vero ab igne inspissatus, reliquias, vix partem



*centesimam et quartam* constituentes, olei et aquae pauxillum, ac tandem carbonem salina materia onustum subministrantes largitur. Haec liquoris miserorum principia tam calculorum, in caruncula, in sacco lacrymali repletorum, quam crystallorum ex acido amararum, sub ophthalmia ad palpebras observatarum, historia illustrant. Vel ipsum *sanguinem* non tam raro cum lacrymis se miscuisse, vel *coerulei*, aut *lactei* coloris materiam circa limbum palpebrarum haesisse, exempla testantur.

## Definitio.

§. 499. *Epiphora* igitur est lacrymarum, non tam animi dolentis, quam morbosae affectionis imperio inducta, profusio.

## Different.

§. 500. Rarior est, quam *primariam* vocari liceret, *epiphora*, et lacrymae plerumque ex alio, quam ex proprio has secernentis organi vitio, abundant, aut palpebris auferunt. Est interim, ubi glandulae lacrymales, ut de salivalibus jam dictum est, a phlogosi leviori correptae, aut quocunque demum stimulo agitatae, vel uberiori secretioni indulgere, vel secretum humorem citius, quam par est, e propriis canaliculis emittere videntur.

videntur. Num sola *debilitas* a praeviis ophthalmiis, vel a studiis immodicis inducta sine majoris sensibilitatis ratione, epiphoram *primeriam* relinquat, dubitamus.

§. 501. Evidentior in homine, quam in quovis alio animali, sub tristi mentis affectu delacrymatio est; atque nil impedit, quin et hunc vitae statum breviores ad morbos referamus. Plerumque oculorum aliquis pruritus, tremula pupillae inundatio, palpebrarum angustatio, nictatio, suspiria, respiratio inaequalis, retractio labiorum, has procellas annunciant. Mox humor oculis circumfusus tam a punctis lacrymalibus suscipitur, atque naribus celerrime advectus, frequentius emungitur; quam guttatim per genas se praecipitat. Quem longa inspiratione pulmones aerem profundius inspirarunt, hunc, a diaphragmate succussi, cum impetu, ac mira vocis inflexione per vices expellunt. Sunt interim, quibus lacrymae sine fletu, ac furtim pallescentes per genas delabantur; atque sub diuturno illarum effluxu, calor, rubor, et quasi phlogosis oculorum, palpebrarum, vix celanda per horas, doloris vestigia relinquunt. Vix autem hae, tam communi hominum

Natura.

sorte expressae ad *epiphoram* revocandae sunt lacrymae; sed vel ex aucta per causas alias in glandula lacrymali secretionem, vel ex impedito humoris ad nares defluxu, hic idem, non raro manifesta simul acredine instructus, per genas, quas interdum arrodit, inflammatur, devolvitur; atque ingrato non minus aspectu, quam visus obnubilatione manifesta, *oculum* sub animo quieto *lacrymantem* constituit.

Causae.

§. 502. Est aliquid in lacrymarum secretionem, imprimis apud hominem, quod non satis intelligamus: singulare nempe moeroris, gaudii, tenerae misericordiae in glandulam lacrymalem imperium, ut, si modo salivae in esurientibus celeriores affluxum excipiamus, nullibi tam subitaneus, tam involuntarius, tamque conspicuus in organum secernens effectus, - eo major, quo sensibilior est homo, apud infantes atque mulieres certe maximus, habeatur. Sunt adeo inter istas, quibus sub ficto protinus dolore, aut tenero affectu, lacrymae, prout occasio ac astuta voluntas id jubeant, copiosae prorumpant. Interdum non ab animi tristitia, vel organi ex vitio, sed ab incognita nervorum affe-



etione, similis in glandulas lacrymales, quam a fortissimo moerore, actio se prœdit: ut plurimas, sub fletu involuntario, fere per horas extenso, lacrymas ab hystericis, hypochondriacis aegrotis, cum nullam sibi fletus causam esse fatentur, effundi videamus. A fortiori tamen animi dolore, lacrymarum secretio impeditur; et, quod mirum est, a fluxu istarum abundante, non exiguum moestitiæ solamen obtinetur. Sunt, quibus, ob constitutionem peculiarem, ab animi tamen insensibilitate longissime diversam, nec moderatus, nec summus moeror oculos vel unquam humectet. Facillimos in lacrymas et fletum, post apoplexiam, paralyses, aegrotantesprehendimus; ac in febribus nervosis, sine animi consensu, liquor ille ex palpebris decurrit. Interim ex nervorum irritatione pars maxima lacrymarum scaturit. Sub dentium dolore feroci, aut mechanico nervorum, qui hos ipsos, aut nares adeunt, stimulo, copiosa mox lacryma distillat. A corporibus peregrinis oculo illapsis, a trichiasi, distichiasi ( §. 150 ), — a quovis acri, tum oculis, tum naribus admoto, ut a fumo, vapore spirituosos, ab allii, ceparum, raphani rustici odore, masticatione, quin a frigore,

vento, a luce vividiori, lectione longa, imprimis nocturna, a contagio morbilloso, varioloso, a phlogosi catarrhali, effectus iidem habentur. Nec minus sanguinis subitanea et impetuosa, sub tussi, risu, sternutatione fortiori, ad caput congestio huc spectat. Similia occurrunt, si vel palpebra inferior praeter modum relaxetur, vulneretur, erodatur, aut, extrorsum conversa ( *ectropium* ) lacrymas, quod et tumor ad carunculam lacrymalem ( *eneanthus* ) facit, ab oculi cantho interno divertat; vel si puncta lacrymalia, aut continui his saccus, aut ductus, a tumore, ab inflammatione catarrhali, rheumatica, variolosa suppuratione, materia tenaci, a polypo, vel a calculo, vel quovis demum modo, angustentur, exedantur, oblitterentur, atque superfluum ad oculos humorem ad nares, forte simul a polypo infarctas, obstructas, transmittere recusent.

Prognosis.

§. 503. Nisi partium, quae lacrymas coercent, abducunt, ex vitio epiphora contingat; haec ipsa, in febribus praesertim, nunc morbillos, interdum et variolas, futura, nunc instantem per nares haemorrhagiam, nunc deliria, significat. In febribus

nervosis, lacrymatio peioris indicii dicenda est. Frequenter foeminarum, quae fluore albo laborabant, oculos quasi lacrymis innatare conspeximus. Quae ex vitio canalium lacrymalium originem trahit, aut a longo jam tempore continuat, epiphora, ea, pro causae ratione, aut difficilem, aut nullam curationem admittit.

§. 504. Cum ex alio magis, quam organo Cura. ni secernentis e vitio, lacrymarum profluvia succedant: medendi methodus, ad morbi causas potissimum dirigenda, aliis hujus operis e locis, atque ex chirurgicis notionibus plerumque eruenda est. Quam nimia oculorum sensibilitas lacrymationem excitaverit: hanc paucis tincturae thebaicae ( N. XIX. ) guttulis, quotidie in oculum stillatis, corrigimus. Si debilitas organi sensibilitatis intemperantiam aut produxerit, aut comitetur: tunc junctum opio saturni extractum ( N. LXII. ), — et si ab acri, stimulante materia lacrymarum secretio augeri videatur; vesicans emplastrum temporum regioni appositum, atque illa, quae in ophthalmia his a causis excitata commendavimus ( §. 154. ), indicantur.





## O R D. I I.

## P R O F L U V I A M U C O S A .

## G E N. I.

## C A T A R R H U S .



Introduc.  
gener.

§. 505. **C**onsideratis hucusque (§§. 469. — 504. ) profluviis, quae tenuiorem atque *serosam* animalium humorum partem dissipando sanitatem offendunt; ad earum nunc, quae *mucosa*, vel simul *lymphatica* sanguinis principia disperdunt, considerationem nos accingimus. Haec quidem, nutritioni potissimum dicata, materia, tum ipso cum sanguine, tum inprimis seroso cum latice tam intime conjuncta incedit: ut apertis, cujuscunque demum generis, vasorum ostiis, vix unum, sine altero, liquidum aufugiat; sed concessa aliqua mucosis principiis quiete, vel obstaculo naturali, morbo, celeriori humorum cursui opposito, vel mutatis vasorum secer-

mentium, ex inducta laxitate, aut et stimulo majore, officiis, — haec seri, animali cum glutine unio ac affinitas tam intima infringitur; aufugit illud, aut a vasculis resorbentibus abducitur; ac solvente sibi ablato vehiculo, nutrientis materiae junguntur magis, magisque cohaerent principia: in lympham, a qua non aliter, quam sanguis ab ista, perfectae scilicet elaborationis ab organis animalibus necdum expertae ratione, differunt, non magno intervallo abitura. Hinc ab exigua hujus nobilioris principii continuata in longum jactura, longe major, quam a profluvio seroso, nisi forsitan cum lymphatica substantia uberius saturato (§§. 473. 480.), insequitur debilitas ac macies; nec paucae, per quas corpus humanum hoc necessario nutritionis adminiculo defraudetur, sunt viae, quas singulas attente a nobis investigari nunc interest.

§. 506. Ac primo quidem *catarrhus* considerandus hic venit: qui scilicet in membranae pituitariae, per vias respirationi patentes extensae, affectione, plerumque ex suppressa transpiratione oriunda, frequenter febrili, plus minus inflammatoria, ac molesto vano-

Definitio  
catarrhi.

que, ad partem, nunc istam, nunc illam, excretionis molimine, vel, primum, in serosae, salsae et acris, — ac tandem in densioris viscidaeque materiae rejectione consistit.

Species varia-  
nae.

§. 507. Pro tanta vero antrorum, sinuum, anfractuum, canalium, quae aer, respirationis sub opere, continuo allidit ac permeat, amplitudine, extensione, — pro tanta membranae, quae haec spiracula investit, sensibilitate, mollitie, — pro tanto nervorum, vasorum, glandularumque numero, — pro tam insigni inter se ipsa, et longinquis cum partibus, consensu, — pro functione organorum tam diversa, pro corporis dispositione praegressa, vel debili et laxa, vel firma et robusta, — oportet morbum, licet originis et causae agentis ratione prorsus eundem, diversa tum in locis affectis, tum in aliis, vicinis non minus, quam distantibus, et in variis hominibus, symptomata agnosere: quae interim, quamvis et exitus, et methodi medendi respectu non ubique in omnibus, conveniant, uno nihilominus eodemque tractatu absolvi, et, quibus inter se confluant, lege, ac ordine exponi merentur.



Nunc vero, *coryzae* sub nomine, *cava narium*, ut *sinus frontales*, *sphoenoidales*, aut *antra maxillaria* catarrhus occupat; nunc *faucibus*, velo pendulo adhaeret, ac descriptam jam alibi ( §. 172. ) *cynanchen catarrhalem*, — vel, ad laryngem extensus, *raucedinem*, seu *branchum*, — atque tam dictum ad locum, quam ad *trachaeam*, aut ad *bronchia* defixus, *tussim*, seu *laryngis*, *tracheae*, *pulmonum catarrhum*, constituit. Pro varia origine, ac pro febre, quae morbum eundem, *catarrhalis* sub *febris* denominatione, comitatur, diversa, vel et prorsus absente, aliam aliamque hic ipse naturam assumit: nunc *simplex*, nunc alio cum vitio, *venereo*, *scrophuloso*, etc. *conjunctus*, — nunc sine totius labore, *localis*, — nunc vero, vel *primarius*, cum febre, plerumque *inflammatoria*, *gastrica* interdum, ac, sub corporum, ob humidiores atmosphaeram, vel ob vivendi rationem, laxiorem, debiliorem, ac magis sensilem habitum, — vel, difficiliore sub rerum decursu, non sine contagii, apud equos, in *coryza virulenta*, licet aliter Vir eximius contenderit, manifesti, *epidemiae* imperio, vigentis, suspitione, *nervosa*, et in homine cum *exanthemate*, imprimis *miliari*, lubenter

incedens; — vel *secundarius*, ab acri morbilloso, varioloso, venereo, aut stimulo, alium per morbum excitato, *symptomatice* inductus. Non paucos *habituali* catarrho vexari, ac plures ex istis, ubi pulmo debilior, sensibilior, hoc ad vitium juniores disponat, ulcerosam ad phthisin properare videmus. Alii, crescente mucosae materiae in bronchiis secretionem morbosam, magnam quotidie pituitae puriformis copiam cum tussi rejiciunt, et ex tam longa nutrientis principii jactura, quin ulcus pulmonum, ut causa, subsit, *pituitosam* in *tabem* labuntur. Aetatem senilem, sub habitu corporis laxiori, catarrhi pulmonum frequentes, ac vix non perpetui, seu *chronici*, sine tanto discrimine, divexant. Nec *periodice* incedentis, plerumque *symptomatici*, exemplis destituimur catarrhi. Varius autem est muci, quem partes catarrho affectae excernunt, color; consistentia, natura et copia sunt variae: quae singula, ex tradenda nunc generum historia, adamussim patebunt.

Coryza.

§. 508. Narium catarrhus, *coryza*, *gravedo*, vocatur ( §. 506. ): quae, pro magna specûs nasalis extensione, nunc istius modo partem, nunc omnem superficiem prehendit,

ac diversa, nunc levia, nunc vero sat gravia symptomata inducit. *Gravedinem*, ut scholae quondam jusserunt, a *coryza*, quod in illa, tenax pituita, sub dolore, ut vocant, *gravativo*, — in hac vero, serosa, tenuis, acrisve materies effluere dicatur, cum modo gradu et tempore hae differant, distingui nil interest; sed juvat, singula, quae simpliciore hoc morbo, quasi sub oculis aguntur, non contemni, sed ut fidelem eorum, quae in trachea, et in bronchiis, graviora in aliis, contingunt, imaginem attente contemplari.

Sub *narium* ipsarum *catarrho*, siccitatis C. narium ingratae, plenitudinis, tensionis sensatio, aquae oculis subturbidis, languidis, rubellis, suffusae, vox obtusa, nasalis, ut vocant, odorum, et adeo saporis, perceptio imminuta, cum cutis universae ad frigus sensibilitate majori, aurium sussurrus, emungendi continua necessitas, sternutatio frequens ac molesta, praecedunt. Haec sequitur indecora liquidi serosi, calentis, subsalsi, lacrymae non absimilis, et aeris, copiosissima interdum, distillatio: qua narium pars ima, per labrum, rubescit, et ardet. Interea mucosa illarum, ac ductuum, saccorumque lacrymalium interna membrana turget, et aeris non minus ad



nares ingressum, quam lacrymarum ad illas descensum praecludit. Hinc istas, ad oculum morari, vel calentes, per genas devolvere, ac spiritum, cum edimus, dormimus, nisi ore aperto, quod teneris infantibus, his necdum assuetis, permolestum est, somnumque arceet, difficulter hauriri oportet. Accedunt capitis obnubilatio, gravitas, aut dolor frontis sat molestus, horripilationis, caloris vagi, ad noctem crescentis, sensatio, ac ipsa demum febris, ac phlogosis per nares extensae, graviori sub effectu, non desunt indicia. Per plures haec dies, non aequali tamen semper vigore, — interdum per multas, continuant, dolorque obtusus, internus, per velum palatinum, posterius, ad fauces expanditur: quo loco, mucus ab aere inspirato, sub somno, in lemas aut crustas exsiccatus, irritationem adauget, ac levem simul, deglutionis sub opere, dolorem inducit. Tandem, nunc citius, nunc tardius, loco seripellucidi, liquidum paulo crassius, mucosum, ac sensim sensimque, cum facilitate majori, glutinosa, vel alba, vel flava, interdum sub viridis, vel striis ex sanguine remistis, sat foetidi subinde odoris, pituita, copiose, ac plures per dies, emungitur, ac pristina odo-

ris, saporis, spiritusque integritas, non sine magnae levitatis ac promptioris ingenii sensatione, restituitur.

Vel eodem, quo nares a catarrho tenentur, tempore, vel hac parte vix adeo affecta, similia *sphoenoidales*, ac *frontales* ad *sinus*, ad *antrum maxillare*, vel uno, vel utroque ex latere, contingunt. Sed praecipuam attentionem sibi cava in ossibus frontis, et maxillae superioris exsculpta merentur: quae coeteris capacitate majora, causisque laedentibus magis exposita, non raro difficiles, obscurosque catarrhos patiuntur.

Nunc etenim tensionis, plenitudinis, caloris interni, et vel obtusi, vel satis acuti, lancinantis, profundi tamen, doloris, a nasi radice, per unius, vel utriusque supercilii regionem extensi, sensatio, cum hemicrania, cephalalgia, oculorum lacrymatione, rubore, de *sinu frontalis* catarrho testatur.

C. sinus  
front.

Nunc ad maxillam supernam, loco dentibus oculoque intermedio, haec diata, et communia catarrhis, signa premunt, nasique cavum vicinum siccescit, aut emunctionis sub opere, cum doloris incremento, nil mu- ci excernit; aut gena pallide hic tumet, ca- let, aut rubore suffusa est; vel dentes, in-

C. antri  
maxill.

primis sub attactu, manducatione ciborum; affecto in latere obtuse dolere videntur; gingivae calent, rubentque, nec palati ad fornicem ubique pressionis desunt, aut ponderis, tensionis molestae symptomata. His vero amplioribus in cavis, a phlogosi, aut et violenta inflammatione, occupatis, non minus, ac ad alia ( §. 126. ), *hydropes acuti* hinc inde nascuntur; ac serum copiosum, nunc purum, nunc puriformi liquore inquinatum, colligitur: quod, vel remoto ad ostia, cum narium cavitate communicantia, obstaculo, vel sub capitis in partem aegrotanti adversam decubitu, interdum copiose, cum impetu prorumpit; aut; propria vesicula, seu cystide inclusum, abunde distillat.

Sed, quod jam de narium ipsarum catarrho, in optatam resolutionem abeunte, monuimus, elapsis aliquot, aut pluribus, a primo hujus morbi insultu, diebus, tenuis loco seri, aut siccitatis molestae, pituita viscida, glutinosa, nunc alba, flava, subviridis, nunc puriformis, ac striis sanguineis notata, interdum sat foetida, interdum, ut vidimus, densissima, fere cerea, vel, capite ad anteriora reclinato, ex *sinu frontali*, — vel, illo in latus sanum converso, ex *sinu maxillari* affe-



eto, emungitur copiosa, et morbus dissipatur in integrum.

§. 509. Non vero tam felix erit morbi has ad partes haerentis, et vel inflammatione violenta stipati, vel ab acri virulento, vel quocunque a stimulo, qui auferri sat cito non possit, inducti, exitus. Non rarum est scilicet, a causis catarrhi, aliisque non paucis ( §. 513. ), tum ipsas ad nares, tum ad sinus, praecipue *frontales*, vel et *antra maxillaria*, *abscessus*, nunc satis manifestos, nunc maxime obscuros, clandestinos, generari: qui, praeter communia internae suppurationis phaenomena ( §§. 126. 128. ), odoratûs majorem, minoremque laesionem, spongiosas ac tenues hujus osseae compagis lamellas vel comprimunt, vel situ naturali expellunt, vel maxime distendunt, extenuant, ac plurima, chirurgis non ignota, incommoda parturiunt. In *ulcus* sordidum ad nares, vel dictas ad partes, mutato abscessu, *ozæna* subsequitur: nunc *simplex* atque satis *benigna*, nunc vero, ob cariem ad partes vicinas extensam, ob foetorem insignem, vel ipsis aegrotis non minus, ac aliis, intolerabilis, ob causae virulentæ, specificæ actionem, ob fistulas, ex-

Abscessus  
ozæna.

crescentias fungosas, polyposas, steatomatosas, scirrhosas, cancrosas, *complicata*, vel summopere *maligna*, vel curatu difficillima.

Ab. oz sin.  
front.

Ad *sinum* scilicet *frontalem*, vel unum, vel alterum, *abscessus*, *ozæna*, — sub dolore in aliis, obtuso, in aliis, pulsante, acutissimo, — sub febre, in his, magna, in illis, pauca, vel nulla, — nisi acerrimo ichori exitus ad nares paretur, ossis, in quo hic stagnat, substantiam, exeso periostio, emolliunt, distendunt, erodunt; ac, vel ablato, quod sinus frontales bipartit, sepimento, in lacum communem hos efformant; vel, lamina sinûs interna ad cerebrum protrusa, soporem, stuporem, ac, rupto repagulo, mortem aegroto apoplecticam inducunt; vel carie superiorem in palpebram patente, hanc ipsam sanie rodente suffundunt; vel demum aliam, per orbitam erosam viam, sibi pandunt; ac unum subinde cum naribus, et antro maxillari cavum constituunt. Nares in totum, cum ossibus palati, velo pendulo, ab *ozoena venerea* exesas, atque ut *unam* cum antris maxillaribus specum, aspectu horrendam, formarent, consumtas, in Viro, tandem a phthisi pulmonum perempto, et a nobis *Bruchsaliae* dissecto, conspeximus. Similes tumorem hoc

in

in sinu luxuriantem, spongiosum, scirrhum, tam a pressione, quam a maligna, canerosa suppuratione, calamitates expectant.

Oz. antr.  
max.

Nec multum ab istis distant, quas *antri maxillaris ozaena*, excrescentiae fungosae, canerosae, exostoses, inducunt, miseriae. Non quidem simplex puriformis, vel et foetidi liquoris, hoc ex sinu defluxus, latentem in antro *suppurationem* sat valide confirmat; ast vero, cum inflammationis hac in specu diutius vigentis exposita jam phaenomena praeverint; — cum puris jam facti signa (§. 118.) sequantur, ac doloris pulsantis, lancinantis, sub decubitu in partem affectam, et sub emunctione aucti, sensus succedat; — si gena rubeat, tumeatque, aut maxillae, vel exterius, vel palati ad fornicem, prominentiam sub digitis cedentem, fragoris non ubique expertem, exhibeat; — si, capite in partem sanam converso, ichor brunei aut atricoloris, foetidusque distillet; — maxime vero si fistula vel caries ad malam, vel ad orbitam, gingivam, alveolos, palatum existat, ac si dentes hoc loco vacillent, longiores videantur, aut cariem ostendant; tunc de latente hoc in antro ulcere carioso, vel ozaena, aut saltem de fungosa, hic loci lo-



xuriante, excrescentia, vix dubium relinquitur.

Raucedo.

§. 510. Non raro faucium, laryngis membrana mucosa eodem, quo narium illa ( §. 508. ), modo afficitur; atque *cynanchen* illinc *catarrhalem* ( §. 172. ), hic vero *branchum*, ut diximus, — interdum utrumque simul vitium, constituit. Saepe fauces titillatione ingrata correptae, ad noctem imprimis, siccescunt et ardent; subsequitur vox aspera, obscura, imminuta, vel *raucedo*; nec cibi tam facile per pharyngem, nec aer tam expedite per laryngem, iter absolvunt; sed tussis sicca, vel saltem screatio materiae aquosae, sal-sae, levis horripilatio, vagusque calor, sitis, lassitudo, inappetentia, hominem, vix lectulo adstrictum, tenent. Post aliquot dies, prae-via subinde nausea, horis matutinis, ejicitur mucus sensim sensimque copiosior, crassior, tenax, albescens, nec tamen e pectore, sed solis e faucibus, larynge, eductus: vox reddit sonora, expectorationis imminuitur necessitas, ac pristina spirandi, deglutiendi facilitas restituitur. Sunt, qui, praecipue ex senibus, quotidie praemagnam a somno puitae ex faucibus copiam eructent, atque

*chronico pharyngis catarrho*, sine magna molestia, in perpetuum, aut tempore hyberno, humidoque praesertim, laborent. Sunt alii, quibus, sine tanto mucii apparatu, vox plurimum *rauescat*, aut etiam *deleatur* in totum. Multiplex hujus mali, non raro pertinacis, ac interdum *periodici*, natura est. Ipsum quidem *vocis*, cujus instrumentum larynx est, *abolitionem*, *aphoniam*, — *loquelae* vero, quae oris perficitur organo, *jacturam*, *alaliam* dixerunt. Utrumque mali genus, nunc ex causa ad ipsa *vocis*, *loquelae* instrumenta residente, *primarium*, oritur; nunc morbi alterius symptoma *secundarium*, constituit, atque non raro ex viscerum cum larynge *consensu*, prout alibi docuimus, ac loco opportuno uberius referemus, descendit. Quae *branchi acuti*, facileque *lethalis* referuntur, — ea vel ad *cynanchen laryngeam* (§. 173. ), vel ad convulsivos hujus fistulae affectus, reducenda sunt, exempla.

Aphonia.

Alalia.

§. 511. Non aliena ab istis (§§. 509. 510. ) in *trachea*, et in *bronchiis* contingunt: quae, cum *tussim*, ut princeps symptoma, inducant; ab hac ipsa, non satis aptam, ac morbis aliis, indole quamplurimum diversis,

C tracheal.  
bronchial.

non minus concessam, denominationem habuerunt. Qui vero catarrhus haec loca paulo fortius prehendit: is, affinia descriptis ( §§. 173. 186. 188. ), aut facile in *tracheitidem*, *peripneumoniam*, tum *veram*, tum *notham*, abitura, symptomata excitare consuevit. Nunc etenim *febris* manifesta catarrhum tracheae, bronchiorum, comitatur: quae ipsa indolem frequentius *inflammatoriam*, — hinc inde vel *gastricam*, vel et *nervosam*, ab annua constitutione, aegroti habitu, vel causae praegressae ratione, assumit; nunc *febris nulla*, aut certe pauca, hoc, locale quasi, vitium distinguit; ac mitiora sunt catarrhi trachealis, pulmonalis phaenomena. Non rarum est, coryzae, raucedinis symptomata cum istis conjungi; sed in multis modo aspera arteria, aut bronchia affecta sunt: ut in quibus, sub eadem licet membranae mucosae, quam ad nares aut fauces aegrotantes, conditione, diversa tamen symptomata succedunt. Praeter communes scilicet catarrhis vespertinos, levesque horrores, calores fugaces, dolores tum dorsi, tum artuum tensivos, pungentes, lassitudinem, quae sub noctis ingressu, cum febre, si haec simul adfuerit, augentur, tempore matutino remittunt, — siccitatis, titilla-



tionis ingratae, ardoris, vel tracheae ad tractum, vel in pectoris profundo, sensatio, spiratio plus minus difficilis, ac tussis continua, ab initio maxime, ob siccitatem, molesta inprimis a loquela, forteque ac profunda inspiratione mox augenda, insurgunt. Si quid primis hujus morbi diebus ex trachea expellitur: aquosum, salsum spumosumque humorem hoc offert, sub impetu tussis majori, striis hinc inde cruentis remistum. Tam vehementer interdum haec tussis urget, ut vomitus vel in illis, quibus alia coeteroquin ad hunc causa non est, nunc simplex aquosus, nunc bile, alimentis remistus, frequenter moveatur; in gravidis, non raro abortus, in aliis prolapsus vaginae, aut herniae, vertigines apoplecticae, lacrymationes involuntariae, haemorrhagiae per nares, pulmones, hos motus thoracis feroces, convulsivos, ac vix non suffocantes, sequuntur. Post aliquot, nec certos tamen numero, dies, matutinas inprimis ad horas, jam spissior quodammodo, sed pauca adhucdum, materia, sub tussi minus violenta, facilius educitur. Quodsi rectam vivendi rationem observet aegrotus; res in dies in melius convertitur; ac sputa gradatim copiosiora, tenaciora, albescentia,

cum magno pectoris emolumento plures per dies, donec iterum decrescant, facillime secedunt; transpiratio aequalis, vaporosa matutinas ad horas subintrat, urinae sedimentum lateritium deponunt, ac pristina valetudo restituitur. Neglectis vero morbi initiis, vel catarrho stimulantibus, ac methodo calefaciente tractato, vel demum frigore incaute, ad pulmones inprimis, admisso, difficultas spirandi, tussis violentia, pectoris ardor internus, ac febris augentur; nec raro, sub fallacissimo catarrhi innocentis aspectu, in plenam discrimine peripneumoniam aegritudo convertitur; ac saepe nimis pulmonis suppuration, ac phthisis ulcerosa, inprimis apud illos, qui hunc in morbum inclinant, aut praevia in pulmonibus tubercula tulerunt, succedunt.

C. epidem.  
influenza.

§. 512. Tum vere, autumnus, catarrhi, inter infantes, pueros, senes, laxaeque structurae homines, ob tempestatis vicissitudines, quam maxime regnant; sed nullo non tempore, ac inprimis sub atmosphaerae ex calida in frigidam humidamque transitu subitaneo, populares redduntur. Interim, quin tam evidens ubique in ambiente nos aere muta.

tio praecesserit, interdum catarrhi febriles per provincias divagantur; ex una in alteram serpendo, per integrum vix non orbem, passu lento vel celeri, sed ad certam itineris morborum directionem suscepto, non sine magna latentis contagii suspitione, feruntur; ac omnes fere incolas, sine habito aetatis, sexus, conditionis, vitae generis discrimine, infestant. Symptomata *epidemicum* hujus catarrhi, cum descriptis in genere conveniunt; ac simul omnem membranam mucosam, qua late partes respirationi apertas investit, plus minus affectam testantur; sed celerior, vehementior est febris, ac interdum ipsius catarrhi, decursus, — evidentior per crises cutaneas solutio est. Confestim, ac die vix non eodem, fere omnes habitantes invadunt torpor, artuum, dorsi lassitudo, debilitas universalis, vertiginosa capitis obnubilatio, horripilatio vaga, mox horror, plerumque sat validus, calor vehemens, insomnia, in quibusdam deliria; cephalaea, in multis nausea, amaror oris, vomituriō, vomitus, sitis vel ingens, vel pauca, coryza, vehemens sternutatio, lacrymatio, ac rubor oculorum, raucitas dolorque faucium, tussis sicca, in quibusdam sputa sanguini commista, cum pe-



etoris oppressione, dolore hinc inde quasi pleuritico, pulsus frequens, in aliis mollis, ac parvus, in aliis magnus et durus; sanguis eductus, nunc corio obtectus, nunc eodem privatus; urina sub initio fere cruda, aquosa. Quibus sudor copiosus vel sponte, post primam mox diem, prorumpit: hi facile a morbo liberantur; in aliis, remittentibus matutinas ad horas symptomatis, ad noctem similia ac pridie contingunt, ac saepe tertia, quarta, quintave die, post vehementem horrorem, calorem ardentem, deliria, sudor copiosus, odoris acidi, viscosus excutitur; aut ad labra pustulae efflorescunt; urinae sedimentum lateritium deponunt, ac febris profligatur vix non omnis. Non sic tussis in omnibus cum febre sedatur; sed in pluribus per multas adhuc dies continuat, ac sputa tenacia, glutinosa copiose secedunt. Haec interim non in singulis eodem se modo manifestant; sed levior, ac prorsus sine febre, in istis, — gravior in illis, aegritudo occurrit; nec non pro varia vivendi, medendique ratione, nunc paucis a diebus haec dispellitur; nunc plures per hebdomadas, neglecta, decurrit. Pro tanta vero symptomatum gravitate, modo pauca morbi lethali

litas, sub ipso quidem epidemiae decursu, apparet; sed plures post menses sat multi, ut vidimus, pulmone suppurati perierunt; et qui vitio pulmonis, vel alio, jam pridem laboraverant, hi utique majora discrimina subibant. Abortus non pauci, sub tam communi affectione, in civitatibus contingunt.

Inflammatoriam plerumque *catarrhus epidemicus*, ac benignam, ut vocant, naturam observat; sed febris nervosae cum eodem non minus, quam cum catarrho quovis sporadico, aut alio, conjunctae; exempla non desunt; et magna interdum huic morbo cum *cynanche maligna, ulcerosa* (§§. 175. 296.), aut cum *peripneumonia nervosa* (§. 190.), est affinitas.

Sub eadem catarrhali, epidemica aegritudine subinde dolor et ardor ventriculi, intestinorum, cum ventris fluxu, tenesmo, in quibusdam insurgit: et causae ejusdem in viscera magis abdominis, quam pectoris, actionem ostendit.

§. 513. Ad *chronicum catarrhum* retulimus affectum, quo, sub mucii copiosi in bronchiis secretionem, ac sub materiae puriformis screatu, in longum protractis, debilitas, febricu-

Tabes pul.  
pituit.

la, macies, ac phthiseos pulmonalis quamplurima, quin ulcus pulmonem devastet, symptomata sequuntur (§. 506.). Bronchiorum hic status, vix ab illo vaginae, apud mulieres fluore albo laborantes, vel urethrae a chronica blennorrhoea affectae, differt; sed ob majorem illorum superficiem, ob mucī morbose hic secreti abundantiam, ob visceris nobilitatem, tristiores effectus inducit. Hoc scilicet viscus, omnis, qui toto ex corpore redit, cruor, — et, qui vix huic admistus fuit, chylus, allidit. Non mirum hinc videbitur, si pars major principii nutrientis, ut in ipso *diabete* per renes, sub mucī albescentis, *subdulcis* aspectu, per amplissimam bronchiorum superficiem, aut nimis laxam, aut simul stimulo morbozo ad exuberantem secretionem coactam, aufugiat; et sub tussi continua, sub multiplici sputorum conditione, *tabes*, cui debilitas conspicua, febris lenta, sudor nocturnus, dispnoea, oedema pedum, ut symptomata et phthisi pulmonali ex ulcere productae communia, accedant, nascatur. Hinc plures, qui ex ulcere pulmonum contabuisse, et mortem traxisse videbantur, aperto cadavere, nec minimum illius vestigium obtulere, nec sputa, quae purulenta in viventibus fuisse quivis ju-



rasset, aliam, quam perversae secretionis, communem cum muco in coryza, in fluore albo, in blennorrhoea secreto, originem habuere. Nec desunt illorum, qui hoc in morbo ex pulmone integro, aut certe ulceribus haud quaquam obsesso, sanguinem rejecerint, ac fixum in aliquo thoracis loco ardorem, dolorem accusaverint, exempla: ex quibus singulis, quam incertae sint phthiseos pulmonalis feliciter sanatae historiae, et quam fidem remedia ad ulcus pulmonum consolidandum laudata, mereantur, elucet. Difficilis hinc morbi utriusque diagnosi, eoque certe difficilior dicenda est: quod, *puris*, a *muco* ubique distinguendi adhucdum nos lateat peritia; quod sub tabis pituitosae provectoris gradu, quod hanc non induxerit, *ulcus accedere*, ac phthisis vera pulmonum adjungi queat. Si quis interim ad phthiseos pulmonalis ulcerosae, quae alibi exponemus, signa attentius respexerit; si longum morbi catarrhalis, sine febre mox conjuncta, in homine vix ad phthisin praedisposito, sed laxae constitutionis, ac aliis forsitan mucosis fluxibus, primarumque viarum incommodis, non ita raro subjecto, decursum consideraverit; si febrim non prius, ac major jam

debilitas secuta fuerit, diuturno catarrho accessisse conspexerit; si materiae per tussin rejectae color, pelluciditas, tenacitas, rotunditas, levitas, quantitas a primo jam morbi initio conspicua, diversam a pure, quod parvum ulcus largiri jam posset, indolem ostenderit; si major sub inspiratione profunda libertas et immunitas a tussi subfuerint; si sputa interdum, comparente inprimis alibi dolore rheumatico, quin febris, dispnoea sequerentur, per menses disparuisse, ac tempore pluvioso, frigido, et catarrhis favente rediisse sint visa; si methodus corroborans aegrotanti conduxerit; tunc morbum non ex ulcere pulmonis, sed ex perversa in bronchiorum membrana mucosa secretionem venire, spes magna affulget.

Cath. chr.

Qui *chronico catarrho* sine tanta pituitae profusione, plerumque senes laxique homines, laborant: hi aut febre immunes, aut modo per vices et post atmosphaerae mutationes manifestas ab eadem correpti, nec maciem conspicuam, nec virium decrementum, ut in tabe pituitosa pulmonum, ostendunt; tenacem, in filis ductilem, ac fuso quasi vitro consimilem pituitam cum tussi, praeunte sat miti dispnoea, matutinas ad

moras expectorant; hoc facto, liberius respirant, ac plures per dies, interdum per menses, imprimis hibernos, similia patiuntur; sub coelo sereno calidoque, valetudinem recuperant, ac saepe aetatem provectam, sine aliis incommodis, attingunt. Nec semper pulmo, sed pharynx interdum, aut aspera cum larynge arteria, catarrhi hujus chronici sedem constituunt: ac primo in casu, scretu pituitae copiosae matutino, — in altero, tussi, sub dispnoea moderata, sat facili, ac sputis globosis ac viscidis, interdum erysipelate, aut herpete, quo pridem laboraverant, ad cutem redeunte, sine mora liberantur. Non rarum est interim, homines a chronico catarrho vexatos, ac flaccidis pulmonibus instructos, fortiori sub accessu, *peripneumoniae*, quam *notham* vocavimus (§. 188.), pericula incurrere; ac ob mucī non minus visciditatem, quam copia pulmones obruentem, et pituitae tenacis expectorandae impotentiam, a *catarrho*, quem *suffocatorium*, ex effectu, denominant, brevi temporis spatīo, strangulatorum adinstar, perire.

§. 514. Causae catarrhi tum generales, tum speciales recensendae nunc veniunt. Causae.



Quaecunque scilicet membranam, quae vias respirationi dicatas obducit, pituitariam, stimulo, ad maiorem fortemque inflammationem non protinus sufficiente, afficiunt; affluxum sanguinis haec ad loca adaugent, secretionem immutant, pervertunt: ea producendi catarrhi vim possident. Frequentissima ex istis, est materiae, quae per cutem expellenda fuisset, per frigus repentine admissum, retentio. Haec si ad partes musculosas, periostium, ligamenta, vel ad viscera feratur, *rheuma*, — ad mollem, qua mucus, nares, fauces, tracheam, bronchia obliniens secernitur, membranam delata, *catarrhos* producit. Qua ratione id faciat? id satis obscurum est; et quod magis difficultatem adauget, est: quod rarius ex corporis *totius*, quam ex *partis* solitariae, refrigerio catarrhus oriatur. Mephitim, quam pulmo, — hanc certe cutis non spirat; sed aliud, incognitum principium, quod excerni impeditum, quocunque feratur, irritationem inducat, pro parte irritata diversam, transpirationis materiae inesse, communissimi effectus testantur. Forsitan quae ad omnem corporis superficiem simul retinetur: ea, ob copiam, per alia mox organa, per renes potissimum, nec raro per tubum inte-

stinalem, promptius, ac pauca, quam partis unius refrigerium cohibuit, eliminatur materia. Nec mirum est, si destinata per cutem externam diffusi, — sed ab eadem repulsa, internae transpirationis affinia, laxiora, ac simul sensibilissima ad organa facilius, quam alias ad partes, ferantur principia; — vel, si illa ipsa, frigidioris ab aerae attactu occlusa, irritata, quam exhalare debuissent, sinu proprio stimulantem retineant foveantque materiam: qua scilicet causa, adaucto humorum affluxu, exhalantium vasorum manifestius stillicidium, folliculorum mucosorum infarctus, phlogosis, mutata secretio, plenitudinis, ardoris sensus, ac singula catarrhi, seu inflammationis superficialis et quasi erysipelaceae, symptomata, sine culpa praevii in humoribus vitii, sibi mutuo succedunt. Si mitior est phlogosis: tunc, febris excitandae impar, localem modo, brevique temporis spatio absolvendam affectionem producit; si fortior est stimulus, aut major sensibilitas, vel praevia totius, aut partis, longo sermone, clamore aestuantis, ad phlogosin dispositio: tunc membranae mucosae phlegmonosa inflammatio, cum symptomatis, et

exitu , pro partis affectae varietate, diversis, accenditur .

Sub hac igitur materiae transpirabilis reatentae, nec alias per vias sat prompte excretae noxa, quaecunque aut majorem, ac par est, humorum ad cutem affluxum excitant; — aut morbosam hujus organi sensibilitatem inducunt; — quaecunque membranam narium, faucium, tracheae, bronchiorum mucosam ad suscipiendam, retinendam stimulantem materiam praeparant: ea partes praedictas ad catarrhos quam maxime disponunt. Hinc immodicus hypocausti calor, ac succedens huic frigus atmosphaerae repentinum, — hinc partis corporis unius prae altera, vel camini ad ignem, vel solis ad radios, vel fotu vestium nimis sollicito, vel continuato exercitio inducta calefactio, ac subsequens illius ab aura frigidiori perflatus, — hinc vestium hibernarum ad inconstantes veris tepores praecox depositio, aut aestivi, levioris amictûs protractus in serum autumnum usus, — hinc anxia, nec tamen ubique possibilis, aerae liberioris fuga, ac certa quasi hominum literatorum, effoeminatorum *aerophobia*, balneorum calidorum, sudoriferorum, eorumque,



que, quibus cutis robur infringitur, sensibilitas augetur, abusus, — hinc frequens catarrhalis affectionis ad partem eandem reditus, ac inducta hic loci, cum sensibilitate morbosa, laxitas, — hinc forsitan congenita instrumentorum respirationi dicatorum imbecillitas, ad provocandos catarrhos praecipue disponit.

Sed et alia existere videntur, quae, vel per aerem inspiratum, sub quocunque caloris gradu, admota, vel ab eodem ex pulmonibus non satis eliminata, membranam pituitosam non aliter, ac transpirationis retropressae materia, afficiant. Vapore sulphuris, arsenici, licet pauco, per atmosphaeram diffuso, vel fumo, aut re quavis subtili, irritante per aerem dispersis, ac pulmonibus incaute susceptis, mox fortis in sensili membrana tracheae, bronchiorum, stimulus, et catarrhi breviora, vel longiora symptomata succedunt. Saepe, sub aere nebuloso, quin hic frigore notabili offendat, catarrhi, vix non omnes, vel ob latentem in hoc, subfoetido interdum, atmosphaerae lixivio irritantem materiam, vel quod illud ipsum, ab aqua jam nimis saturatum, exhalatos pulmonibus vapores minus prompte suscipiat, vel

quod humidum copiosius cum aere inspiratum, membranam bronchiorum mucosam continuo relaxet,prehendunt. An specificum, quod catarrhos apud homines subinde inducat, *contagium* existat? dubitare liceret; sed illius, quod morbillos, variolas, scarlatinam evolvit, manifesta in membranam narium, faucium, bronchiorum mucosam actio, ac celerrima catarrhorum, sub diversa atmosphaerae conditione per familias eodem sub tecto habitantes expansio, nec non ozoenae virulentae inter equos contagiosa natura, verisimile hoc reddunt.

Nec rarum est, ab acri, quocunque a partibus externis, internis, respirationis ad vias conjecto, catarrhales affectus oriri; ac frequentia ex ulcere, impetigine quacunque antiquis, blennorrhoea, sudore pedum, axillarum incaute tractatis, a rheumate, erysipellate, metastasi has ad partes aliunde conversis, catarrhorum exempla habentur.

Ex ipso adeo *consensu*, abdominali inprimis, non modo tusses, sed ipsos catarrhos oriri, experientia confirmat. Nec certe, cum et oculos ( §. 152. ), et fauces ( §. 171. ), et ipsos pulmones ( §. 189. ), hac a causa non raro incendi sciamus; cum tantam pi-

tuitae sub tussi ferina, cujus saepe in abdomine origo est, copiam in pectore secerni videamus; mirabimur, sensilissimam bronchiorum superficiem internam a nervis ventriculi, intestinorum, per bilem acriorem, saburras corruptas, aut per vermes, continuo irritatis, similia experiri, aut longas vanasque per tusses ad phlogosin ac morbosas secretiones incitari. Hinc ratio summae interdum virtutis emeticorum, purgantium in catarrhis, praecipuis epidemicis, cum gastrica febre manifeste conjunctis, atque adeo spontaneae, qua non pauci catarrhi solvuntur, diarrhoeae, elucet; quin igitur, cum summo aegrotantium damno, mox quamvis aut oris amaritiem, aut linguae spurcitiem, aut nauseam, vomituritionem, vel ipsum adeo vomitum, utpote prorsus in multis symptomatica, pro sufficienti emeticorum indicatione habeamus (§§. 186. 189.). Enarratae vix causae in membranam mucosam, nunc, qua late per has vias expanditur, omnem, nunc modo in partem illius, operantur.

*Coryzam* tamen (§. 507.), capitis ipsius, pedumque, apud teneros infantes frequentissima, refrigeratio potissimum inducit. Facilius haec in illis, qui nimis caput integu

C. special.

Coryzae.



mentis foveant, succedit. Non raro acrimoniae quaecunque ad nares, utpote declive, semperque pervium stimulis externis mucosae colatorium, feruntur. Ab acrimoniae arthritico ad nervos narium ac linguae deposito, et gustus, et odoratus in viro jacturam, ut nec salis ammoniaci volatilissimum odorem distingueret, sed modo aliquem ab illo stimulum accusaret, observavimus. Singularis plane *virus venerei* in membranam faucium nariumque mucosam est nisus, et frequens ab hinc *ozoenae*, his partibus facile funestae, occasio. *Morbillosum* praecipue coryza praecedit, comitatur contagium; atque ipsae *variolae* interdum hoc signo incedunt; vel ipsas abscessuli nares infestant, exulcerant, vel prorsus, ut vidimus, obliterant. *Scarlatinae* malignae furores in fauces, cava narium, jam alibi ( §. 296. ) adduximus. Nec vobis *leprosi* viri, in nares praecipue ruentis, tristissimi effectus ( §. 455. ) ignoti sunt. *Erysipelas* ( §. 281. ), et ipsa *tinea faciei* ( §. 447. ) non raro internam narium membranam infestant; ac sicut nares infantibus neonatis copiosius stillant: ita *dentitionis* imprimis sub opere coryza symptomata huic aetati familiaris, et abundans seri mucique na-

salis secretio est. Non raro dentes, alveoli maxillae superioris cariosi, istius ad antrum phlogosin, secretiones morbosas, et ulcera inducunt. Ictus, violentia quaevis ad nares, ad sinus maxillares, frontales, — vel et insecta his in cavis recepta, evoluta, similes in aliis effectus agnoscunt. Vel ipse *nicotianae tabaci* pulvis, qui saepe rebus non parum suspectis et acribus commistus, ad nares ducitur, istarum superficiem interdum aggreditur, exulcerat, ac sensum odoris non parum in multis obtundit, aut prorsus abolet. Nec minus *polypus*, excrescentia fungosa tum narium ipsarum, tum sinuum maxillarium, frontaliū, irritando, comprimendo, coryzae symptomata inducunt, vel forsitan violenter extracta, ad ulcera vel cariem narium contribuunt. Chronicus, a *calculo*, ad nasi cavum haerente catarrhus describitur; in aliis juncta cum laxitate membranae mucosae sensibilitas major, aut angustior narium conformatio, ad coryzas habituales disponere videntur.

Praeter generales catarrhi, fauces, laryngem, aut asperam arteriam occupantis, causas, aliae commemorandae hic veniunt. Ipsius quidem *raucedinis*, seu *branchi* (§. 509), difficillimae saepe curationis morbi, causa

Branchi.

est multiplex: ac illius non minus, quam *aphoniae*, frequens longinquis in partibus, in pulmonibus, ipso in utero, ac imprimis in abdomine, origo est. Insigne in vocis organo nervi, *recurrentes* potissimum, imperium exercent. A scarabaeo vivo, ab infante deglutito, mox raucitas observata est. *Aphoniae* a vermibus inductae exempla tum aliis, tum nobis ipsis oblata sunt; atque alibi (§. 217.) eandem *peritonitidis puerperalis* non insolitum phaenomenon sistere, retulimus. Ab injectione adstringente, post abdominis paracenthesi, ventris in cavum instituta, — ab inflammatione pericardii, quo loco plures, ex *recurrentibus*, ramulos nervosos accipit, *aphoniam*, *dysphagiam*, et mira vocis, nunc in acutissimam, nunc in profundam, mutatae, phaenomena alii notarunt. A nervo *recurrente*, aut lateris unius, aut utriusque, sub experimento in animalibus capto, — vel in homine, sub bronchocelis operatione, vel sub vulnere juguli, discisso, aut raucitas insanabilis, aut perfecta vocis extinctio, insequitur. Vix morbus est gravior, qui vocem aegrotantis non valide afficiat; ac ipsa quantum pubertas ac prima *seminis* secretio apud



pueros vocis organon immutet, est nemo, qui ignoret.

Sed cum toties, longinquas ad causas, vocis aliter aliterque instrumenta respondeant; frequentius tamen ad haec ipsa, ad fauces, laryngem, raucedinis causam haerere, experientia confirmat. Sunt, quibus per vitam vox clara, sonora recusetur, et qui perpetuum, sine morbo, loquendo raucedinem prodant. Potissimam vero istius causam sistunt, muci blandioris, laryngem ac fauces oblinientis defectus, aut major, quam par est, copia, aut excedens tenacitas, aut a pulvere in tracheam illapso impuritas; membranae ipsius mucosae laxitas, flacciditas; istius, ac folliculorum, glandularum intumescencia, inaequalitas, phlogosis, varicositas; exanthema, impetigo, erosio vel ulcus ad epiglottitis, laryngis internam superficiem; cartilagineum, quae laryngem constituunt, rigiditas fere ossea, immobilitas, fissio, fractura, compressio; depositio materiae rheumaticae, arthriticae, calcareae, tophaceae, metastasis; spasmodica, paralytica, musculorum laryngis affectio. Coeterum, quae alios catarrhos inducunt, inprimis susceptum, post cantus, exercitia oratoria, vel longas

vociferationes , ex vento gelido , contrario , ex potu glaciali , corpori aestuanti ingesto , refrigerium , raucedinem excitare valebunt . Qui vini potu vel maxime sunt dediti , vix non perpetua raucedine laborant .

Cat. trach.  
bronch.

Ab istis vix differunt causae , quae *tracheae* , *bronchiorumque catarrhum* , tam acutum ( §§. 511. 512. ) , quam chronicum ( § 513. ) , progenerant , ac omnis ex loco , in quem illae agunt , est diversitas . Ipsa quidem *tussis* , quae principalem hic ludere scenam videtur , commune multis , ut ipsi catarrho , affectibus , *symptoma* , non ipse morbus est ; totiesque oritur ( quod in genere monendum hic ducimus ) , ac stimulus quicunque aut intimus , aut vicinus , aut dissita ex parte veniens , vel in diaphragma , vel in pulmones ipsorumque vesiculas , vel in bronchia , vel in asperam arteriam , vel in laryngem , harumque partium nervos convertitur . Frequentissima tussis causa est membranae tracheae , bronchiorum internae , sensilissimae , irritatio . Quam acerba non thoracis universi convulsio ex aquae innocentis guttulla , nec oculis quidem molesta , per glottidem delapsa , mox oritur ! Atqui cum in pulmonum substantia , vel bronchiorum in cavis , similia contin-

gunt, et a corpore peregrino per tracheam pulmonibus adacto, a calculo hic genito, ab inspiratis longo tempore ac bronchiali cum glutine in unum concretis, diversae indolis, materiis pulverulentis per atmosphaeram volitantibus, — aut a polypis ex lymphatico coagulo in bronchiis, arteriosi ramisque sub vasis fallaci aspectu, formatis, — a bronchialium glandularum, folliculorum infarctu, a tuberculis, vomica, scirrho, — aut ab aere, aquis, cruore, puriformi, purulenta materia in celluloso pulmonum contextu collectis, — a vasculis istius varicosis, aut quascunque ob causas a sanguine praeter modum extensis, — ab irritante vapore cum aere in pulmones attracto, — a materia sudoris, a metastasi, ab exanthemate, impetigine, vel aeri quocunque ad pulmones coniectis, stimulus admovetur; — cum partes pulmonibus vicinae, pleura, mediastinum, pericardium, cor ipsum, vasa majora, oesophagus, diaphragma, hepar, ventriculus, lien, inflammatione, tumore quocunque, aneuvrismatico, steatomatoso, scirrroso, aut ulcere laborant, cum in cavo thoracis fluidum quodcunque colligitur; aut ipse thorax, morbosa ossium structura difformis, luxatio-



ne, fractura, carie costarum, vulnere, suis in motibus impeditus est; — cum longinqua nervorum, cum illis pulmonum, tracheae, bronchiorum, affinitate junctorum irritatio, prout de *branchi* origine jam diximus, succedit, — his innumeris in casibus mox tussis, nunc sicca, nunc humida, nunc primaria, nunc secundaria, generatur. In catarrho pulmonum, ea ipsa membranae mucosae, quam descripsimus, affectio, tussis molestias inducit. Post *chronicos* catarrhos, ac post ipsam, quam *pituitosam* vocavimus, pulmonum tabem, flacciditas hujus visceris conspicua per sectiones pathologicas detecta fuit. Haec *effectus*, non minus, quam *causa* hujus morbi esse potest; nec certe sola laxitas, nisi stimulus localis, quem ulcus antiquum, impetigo praepostere sanata, fluor albus, haemorrhoides, blennorrhoea, sudor pedum, axillarum, etc. incaute suppressa, non raro supeditant, accedat, qui stimulus secretionem morbosam hic loci tum augeat, tum quodammodo pervertat, sufficere videtur.

Prognosis. §. 515. Ex illis, quae (§§. 507. — 514.) dicta sunt, *prognosis* catarrhi jam satis elucet. *Narium fauciumque catarrhus*, raro, nisi morbi

alterius symptoma constituent, aut major inflammatio, suppuratio, accedant, periculum inducunt. Aliquando tamen, post diuturnam ac molestant *coryzam*, ipsius cerebri affecti symptomata sequuntur; nec ita pridem conspeximus virum, cui, a narium catarrho, per duos fere menses protracto, vehemente, obscuritas visus, aurium susurrus, loquelaе difficultas, circuli calvariam cingentis sensus, tremor maxillae cum epileptico insultu saepe frequente, ac cruris manusque, e latere sinistro, debilitas conspicua, — quin alia istorum causa apparuerit, non sine aquae in cerebri ventriculis collectae metu, successerant. Nata ex causis virulentis *ozoena*, perdifficilis, ac arte saepe major morbus est. Neglectis, aut irritatis a pulvere tabaci, aliisque, narium ulceribus, caro fungosa, nunc mollis, alba, vel rubra, sed expers doloris (sarcoma narium), — nunc livida dolensque, in *cancrum* degenerans, — nunc in longum, ut e naribus, vel anterieus, vel in fauces posterius, propendens, extensa, *polyposam* naturam assumens, nascitur. *Rau-citas*, ut morbus, periculum vix affert; ut signum, non raro exitialis observatur. *Catarrhus bronchiorum*, nisi male tractatus, aut

in illis, qui tuberculis pulmonum, ac certa in phthisin praedispositione laborant, plerumque sine noxa incedit. Periculosior est ille, quem dispnoea, calor, et febris comitantur; ac milleni, qui haec flocci penderunt, inflammatione pulmonum correpti, perierunt; aut, tuberculis hoc in viscere relictis, futuras ad phthises praeparati fuerunt. Catarrhus in longum protractus, licet febris deesse videatur, nihilominus suspectus est, ac transitum pituitosam pulmonum in tabem minatur. Haec ipsa, minora quidem, ac phthisis ulcerosa, discrimina agnoscit; sed facile aut in istam, — aut, sputis derepente suppressis; in spuriam peripneumoniam convertitur.

Cura.

§. 516. Sine medici auxilio quamplurimi a catarrhis, vel, tempore brevissimo, per largos, spontaneos sudores, — vel, longiorem ac inaequalem post moram, per pituitae densioris, aliquando striis sanguineis remistae, copiosae, ex parte affecta secessum, — vel denique per blandas diarrhoeas sub fine morbi succedentes, liberantur. Hinc in simplici, nec febre, nec dolore fixo, vel dispnoea stipato catarrho, res ipsi naturae com-



mitti, ac illis, quae cutaneam transpirationem intercipient, aut stimulum localem adaugeant, sollicite evitatis, tenuiori sub victu, potuque tepido, tempus, quo sponte solvatur catarrhus, exspectari sine artis quovis alio conamine potest. Sunt adeo, qui, loco potus tepidi, diapnoici, ad frigidae, ipsiusque glaciei ad usum in catarrhis, non certe ob aliam, quam quod saepe haec ipsa transpirationem externam promoveant, ac phlogosin localem, incipientem hinc inde dispellant, cum successu confugerint.

Sed, quotiescunque febris, aut gravius symptomata catarrhum comitatur; habito ad indolem istius, ad morbi causam, ad partem affectam, ad habitum aegroti, et ad anni constitutionem respectu, artis sine mora adhibendae necessitas urget. Rarum est, *coryzam*, tam violentis symptomatis, aut febre conspicua incedere; sed interdum haec utique subintrant; atque inflammationis ad nares, ad sinus frontales, maxillares, signa et abscessûs metum futuri manifestant. Hoc in casu, videndum est, quae febris phlogosin localem comitetur? ac si indolem vere *inflammatoriam* agnoscat, ad regulas jam traditas (§§. 46. 62. 71. 95. 112. 120.) — in ca-

su vero febris *nervosae*, ad principia exposita ( §§. 94. — 96. ), tractanda est. Vapor aquae, vel solius, vel cum aceto remistae, naribus, nisi penitus obstructis, attractus, — hoc vero in casu, ac in illo phlogosis ad fauces extensae, balneum oris ex lacte tepido, malvae decocto, praeter alia, potissimum conducunt. Devicta localis inflammationis formidine, morbus sibi ipsi, prout diximus, committendus est. Si forsitan tenacitas pituitae excretioni resistat; tunc vaporis, aut mannae in aqua solutae, per nares attractio hanc ipsam sollicitat. *Sternutatoria* aliquando hic opem praestiterunt, — sed ob incertam ac facile justo majorem actionem, non satis arident, medicamina.

Jam facto ad nares internas, vel ad sinus frontales, maxillares, abscessu, hic ipse, ne ossa subjecta corrodat, quam prompte fieri id potest, chirurgiae ad leges, pure contento liberandus, vel materia purulenta, ichorosa sinu frontali, maxillari inclusa, educenda est. Perforatio sinus frontalis mature, et caute suscepta, ratione et experientia fundatur. Pus, in antro maxillari detentum, nunc dente molari, qui hunc ipsum attingat, uno vel altero, in primis carie praesente, extra.

cto, et sectis, quae antrum investiunt, membranis, forsitan adhuc integris, — nunc, vel ad alveorum radicem, vel ipsas ad genas, vel palati ad fornicem, loco scilicet maxillae magis prominente, inciso, educitur. Ossis maxillae cum dentibus tribus a carie affectae portionem sat magnam separari curavimus; quo facto, aegrotata liquores assumptos ex ore in antrum, et ex isto per narem cum impetu projicere per jocum solebat, et tandem hoc a vitio perfecte convaluit. Sed ostium, quod ex antro ad nasi cavum, in sanis, patet; frequenter a praesente inflammatione obturatur; nec facile, ut aliqui proponunt, injectio ipsas per nares haec in antra apud omnes perficitur. Quo loco sinus maxillaris morbose cum oris cavo communicat; eo, ne ciborum, sub esu, portio penetret, cavendum est. Si ulcus cum carie, vel carne fungosa, hoc in secessu nascatur; haec artis chirurgicae auxilio curentur oportet. Quae, ex causis virulentis, ipsis in naribus *ozoena* se prodit: ea quantocyus internis, virulentiae specificis oppositis impugnanda, et simul externis remediis sollicitè tractanda est. Inter ista, mercurii corrosivi diluta solutio, ac



tandem suffimigia, potissimam hîc laudem merentur.

Ad *branchum catarrhalem* quod spectat, is eâdem, ac cynanche hujus indolis, ratione ( §. 178. ) percurandus, — ac si forte phlogosis intensior accedat; ut mitior cynanche *laryngea* ( §. 179. ) tractandus est. Vapores aquosi hic iterum egregie conducunt, et collectam ad laryngem pituitam resolvunt, rejectionem faciunt. Quas olim syrupo de *Erysimo* virtutes in raucedine tribuerunt, — hae non alio, quam coetera, quae fauces lubrefaciunt, obducunt, et ab acri sero quodammodo defendunt, fundamento nituntur. Lini-  
mentum volatile cum tinctura cantharidum ( N. LXII. ), laryngis regioni illitum — aut vesicans emplastrum huic ipsi impositum, in casu latentis rheumaticae, aut alterius acredinis, conveniunt.

In *catarrho bronchiali*, ut in coeteris speciebus, — sed, ob majorem pulmonum nobilitatem, scrupulosius, jam traditis generalibus praeceptis inhaerendum est. Humanitati non parum exitiosa fuit vulgaris, ac si venae sectio in catarrho ubique noceret, opinio. Haec quidem in casu febris catarrhum comi-  
tantis

tantis *nervosae*, aut *gastricae*, experientia plerumque fundata est; ac si vires deesse videantur; aut laxitas pulmonum, habitualis causam catarrhi constituat; subministrata venaesectio catarrhum, dispnoeam augere, vel ad pulmonis tubercula aegrotum disponere valebit; sed frequentius, in juniori praesertim floridaque aetate, inflammatoria catarrhi febrilis est indoles; et ommissa cruoris, fortiori sub malo, detractio, aut calefaciens adhibita methodus, aegrotantes in peripneumoniā, haemoptisin, aut et phthisin praecipitant. Vix interim tanta hic urget, ac alibi, sanguinis copiosius emittendi necessitas; nec facile *catarrhus*, ut vera pulmonum inflammatio, per solam superatur lanceolam; sed certe, naturae vires, certumque tempus, ut in *narium*, — sic *bronchiorum* in catarrho, requiruntur: sub quibus stagnans in folliculis mucosis pituita, mobilitatem, expelli ut possit, adipisci, vel stimulus a pectore revelli, ac impetus humorum a pulmonibus in cutem derivari, aut forsitan illud ipsum, quod pulmones irritabat, per cutem, sub aequali, blandoque sudore, separari queat.

Quidquod non raro, leviori ac recente sub malo, vel et in ipso *catarrho epidemico*

diaphoresis, pes haustum salinum pulvis remque *Doweri*, aut refractas tartari emetici doses, per potus tepidos ex floribus sambuei et ex malva, vel thapso verbasco, vel hordeo paratos, promota, — aut vapor aquae per fistulam ad pulmones aliquoties in die attractus, ad bronchiorum catarrhum sufficient! Vel et frigida epota apud alios suffecit, ac sua, per stomachum, pulmonum, aut cutis in nervos actione stimulum a bronchiis abegit, mutavit, ac breviori temporis intervallo, contradicente scholarum theoria, catarrhum dissipavit.

Sed maximas hoc in morbo laudes remediis, quae *bechica*, *pectoralia* dixerunt, tribuendas esse crediderunt, qui specificam his ipsis in pulmones virtutem adscribere nequidquam dubitaverant. Haec inter medicamina, tum illa, quae blanda mucilagine instructa sunt, ac similis farinae syrupi, vel et pingua, oleosa, — tum contraria his ipsis stimulantia, ex squilla marina, oxymelle inprimis squillitico, ex gummi-ferulaceis, gummi ammoniaco, ex kermete minerali, aliisque, numerata fuerunt. Haec iterum Theoria, neglecto casuum, sub quibus haec profuisse videbantur, accuratiore examine, quamplu-



rimis damnosa evasit: et cum a pinguibus oleosis persaepe ventriculus apud illos laederetur; apud istos, praesente jam phlogosi, ex novo stimulo admoto, non aliter, ac de ipsa peripneumonia monuimus (§. 198.), inflammatio membranae mucosae bronchiorum non parum augebatur. Saepe istius, a membranae, quae fauces obducit, affectione descendit, et a dulci mucilagine vel oleo sedatur irritatio; — vel quae nauseam, ut squilla, kermes, emetica, inducunt, per consensum ventriculi vel pectoris in nervos, vel in cutem operantur; non virtute specifica pectoris pituitam incidunt, resolvunt; sed saepe ob stimulum, quem, nimium jam, augent, puriformis copiam liquoris in bronchiis augere, et expectorationem suppressere cernuntur.

Varia hinc et hoc in catarrho medendi, atque nunc debilitans, nunc excitans, pro febris, causarum, aegroti habitu, diversa est ratio. Vomitorium interdum, sub certa inflammationis verae in bronchiis absentia, sub morbi cum saburris complicatione, sub pituitae collectae copia, tenacitate, vel debilitate, quam ut expelli haec posset, majori, sub tussi habituali, ac sub ipsa pulmo-

num tabe pituitosa, egregie conducet; sed tutior plerumque, in catarrho acuto, praemissis, quae ob febrem, aut ob localem affectionem requiruntur, auxiliis, est haustus salini cum refractis tartari emetici, aut vini antimoniatu dosibus, usus; nec raro tussis nocturnae cum fructu per opium sopitur ferocia.

Sub *tussi diuturna*, quae senes, laxosque homines divexat, antimonialia non minus, quam polygalae infusum amarae, gummi ammoniacum aceto squillitico solutum, — si acre herpeticum, vel aliud subesse videatur; vesicans, vel ulcus artificiale, potissimum conducunt. Similia in *tabe pituitosa pulmonum*, sed simul roborantia ex cortice parata, victusque nutriens, equitatio, itinera maritima, vel sub coelo sereno ac altioribus in locis instituta, — interdum, ut diximus, emeticum, fumigationes aromaticae, indicantur. Si *periodica* catarrhi natura, aliaque, eundem ad *intermittentium* familiam spectare docuerint; ex cortice, ut in istis, porrecto, medela est.



## O R D. II. G E N. II.

*MEDORRHOEA.*

§. 517. **C**onsideratis membranae mucosae, Transitio.  
 vias aeri hauriendo dicatas obducentis *catarrhis*  
*rhosis* affectibus ( §§. 504. 512. ), ad eos,  
 qui, non absimili mechanismo, pudendorum  
 mucosa intimaque velamina frequenter pre-  
 hendunt, et *Medorrhoeae*, seu *fluxus puden-*  
*dorum*, generali sub nomine compellari me-  
 rentur, descendimus.

§. 518. Est vero *Medorrhoea*, vel seri, Definitio.  
 muci, vel puriformis praesertim, sanguino-  
 lentae interdum, materiae, ex verendis mor-  
 bosa, et cum variis, vel ex phlogosi prae-  
 sente, vel ex partis impedimento, vel ex  
 humoris jactura, vel ex lege consensus oriun-  
 dis symptomatis incedens, distillatio.



Var. spec.

§. 519. Varias profluviorum hoc genus ( §. 517. ), et quas scholae passim aliuc, diverso sub nomine, demandant, species agnoscit. Vel enim sexus *virilis*, nunc ex glande, ejusdem viciniis, nunc ex ano, mucum, puriformem humorem, praeter ordinem naturae, eructat; — vel sexus *seQUIOR*, nunc dictis ex viis et illi communibus, nunc ex sinu, labiis genitalium, nunc ex vagina, nunc ex utero, pituitosum liquorem foede profundit; — vel haec ipsa, ex causis diversis ( §. 532. ) propullulans, aegritudo, nunc celeri, nunc lento decursu absolvitur; atque ob istas, accidentales certe magis, quam ob constantes validasque rationes, ut mala inter se distincta spectari, atque nunc *gonorrhoeae*, *blennorrhoeae*, vel *acutae*, vel *chronicae*, nunc *fluoris albi*, *leucorrhoeae*, nunc *haemorrhoidum albarum* denominatione, aut falsa, aut morbi sedem, materiae excretae indolem, haud satis exprimente, venire solebant. Ut rectius in hisce procedamus, hunc morbum distinguemus, ratione loci, ex quo scaturit, in *internam*, scilicet urethrae, vaginae, ac recti intestini, — in *externam*, ut puta, glandis apud viros, — apud foeminas, labiorum, aut sinus vulvae, — ratione cau.

sae, in *primariam*, mechanicam, phlogisticam, atonicam, contagiosam, — in *secundariam*, metastaticam, *criticam*, verminosam, gastricam, calculosam, — in *simplicem*, et in *complicatam*, — in *acutam* denique, seu brevioris potius intervalli, — et in *chronicam*, *habitualement* medorrhoeam.

§. 520. Hae, unius ejusdemque morbi differentiae, illam symptomatum inducunt, ac fere protinus *localem*, — nunc magis extensam, ac febrilem interdum, symptomatice scilicet, affectionem constituunt. Ea nempe, quae urethram, quae cavum uteri, vaginam, sinum muliebrem, anum, investit, dives nervis, vasculis, ac folliculis mucosis membrana, glandulae quae prostatam constituunt, quae penis ad coronam, ad vulvae labia, subtili velamento contextae, jacent, a stimulo quocunque affectae, non aliter, ac similis ad nares, fauces, laryngem, tracheam, bronchia haerens membrana, irritantur, ac in phlogosin, *erysipelaceae* plerumque, *phlegmonosae* interdum, naturae, rapiuntur. Sed juvat potiora ex istis, quo scilicet ordine incedant, possibili brevitate exponere.

Symptoma.

Medorrh.  
urethrae.

§. 521. Ac primo quidem de *urethrae*, utrique sexui communis, apud viros longioris magisque incurvae, apud foeminas amplioris, brevioris, nec recto intestino, ut in illis, sed vaginae appositae, *blennorrhoea*, seu *fluxu mucoso* ( *Medorrhoea urethrali acuta*, seu brevi ) sermonem faciemus. Apud foeminas, medorrhoeae haec species *urethralis*, per *consensum* fere magis, quam ob propriam urethrae hoc in sexu phlogosin, oriri videtur.

Hic morbus, eo quod frequentius ab impuro concubitu, quam aliis ex causis (§. 533.), oriatur, a scholis plerumque sub eodem, ac ipsa *syphilis*, tractatu exponi, et a plurimis cum eadem, sine tanto, ut credimus, experientiae fundamento, et a multis cum certo aegrotantium discrimine, confundi consuevit. Si quis interim consideret, *medorrhoeam urethralem* quocunque ex stimulo huic fistulae illato originem agnoscere, admissa virûs syphilitici in illa producenda potestate, fatebitur is, hanc urethrae affectionem multarum causarum effectum esse. Nec minus Veteres, qui, liquidum, hoc in morbo per urethram distillans, pro *semine corrupto* declarantes, hunc ipsum *gonorrhoeam* dixere, aut epitheto



*virulentae* superaddito, ab illa, quae benigna sit, distinguere voluere, veritatis a tramite aberrarunt.

Eadem hoc in morbo, quam in *coryza* (508.), — sed ad ambitum in viris certe, minorem, et ob majorem urethrae sensibilitatem, angustiam, positionem diversam, ob necessarium urinae per istam decursum, fortiora plerumque symptomata, pro sexus, causarum, constitutionis, diurnitatis differentia, diversa, et certa per stadia non inapte dividenda, se offerunt.

Ac primo quidem, vel stimulo mechanico, locali, vel delata, alia ex parte, ad urethram irritante materia, vel contagio, mulieris infectae ex sinu, nunc paucas ante horas, — frequentius tres, quatuorve post dies, — nunc post hebdomadem, — rarissime, si unquam, multo tardius, suscepto, nascitur, hoc ultimo in casu, ad partem urethrae anteriorem atque infimam, — in alio, ad aliam, pruritus, titillatio, genitalium coeterorum inguinumque consensus, ac fere major in venereum infaustam proclivitas. Succedit citius, tardiusve tensionis, caloris, ardoris primum moderati, — ac urinae, licet paucae, ad sui excretionem frequentius stimulantis sensatio.

In viris, membri spontaneae, nocturnae imprimis, et ingratae erectiones, cum aliquo labiorum urethrae rubore, tumore, pruritu super glande extenso, — in foeminis, urethrae vaginaeque extremas ad oras, ad lacunas mucosas, phlogosis, per labiorum vulvae superficiem et commissuram extensa, — in utrisque, post urinam expulsam, ardores majores novaeque mictionis necessitas, sequuntur. Hoc sub statu, secunda tertiave die, ex urethra plerumque humoris mucosi, puriformis, albescentis, guttulae modo paucae, copia, tenuitate et acredine, quo major est irritatio, plerumque augendae, ac lintea flaviusculo colore tincturae, distillant.

In quibusdam, vix aliquid, praeter unicam puriformis materiae guttulam, in ore urethrae haerentem, comparet; ac leviori sub causa, malum, hoc solo jam stadio contentum, post paucos modo dies absolvitur. In aliis, non multis, majori scilicet morbi sub impetu, nec primo, nec alio in stadio secretio in urethra augetur; sed in sola istius inflammatione, eâque, ob majorem violentiam, *sicca*, aegritudo consistit.

Stad. infl.

Ardore sub mingendo, ac nixu in expellenda vel pauca urina crescentibus, *stadium*

*secundum*, tertiam plerumque, vel quartam ad diem, orditur. Sub illis scilicet symptomatis, continuo adauctis, os urethrae magis magisque rubet, rigetque; dolor saepe per omnem urethrae longitudinem, ad perinaeum, extenditur, ab attactu, anteriori inprimis parte, *navicularem* ad *fessam*, increscit. Glans penis, aut foeminei labra sinusque pudendi rubent, lucentque; penis ipse calet, ac vel minime erectus, volumine augetur, aut plurimum retrahitur; cavum urethrae angustatur, nec lotium, nunc magis tinctum, aequali, indiviso, recto, plenoque rivo effluere sinit; erectiones frequentes, dolentes, inprimis ad noctem, dorsoque decumbentibus succedunt: sub quibus, urinae excretio ad parturientis quasi mulieris nixus ac tormenta aegrotum cogit. Pollutiones, sub his membri virilis tensionibus violentis, spasmodicis, sub somno contingunt; aut a vigili, voluptatis expertes et miseras aucturae, subinde tentantur. Jam vero major humoris puriformis quantitas per urethram continuo, sed praecipue matutinas ad horas, profunditur: qui humor flavas potissimum, atque subvirides, pertinaces in linteis maculas relinquit; ac saepe cum sanguine, per strias, aut intime remistus, sece-



dit, aliquando totum per morbum humor effluens colorem album retinere observatur. Quo major phlogosis, et, quae hoc mali sub impetu accedit, febris est; eo tenuior, magisque saniosus, foetens, atque acer, ut partes vicinas, quas alluit, erodat, exulceret, liquor distillat.

Suspensio  
fluxus.

Inflammatione majorem ad gradum adaucta, et magis magisque expansa: hic fluxus, inprimis apud viros, a frigore admisso potissimum, vel adstringentium injectionum ab usu, a nova venere, masturbatione, exercitio violento, a potu spirituosos, *suspenditur*. Mox ardor ac dolor sub mingendo insigniter increscit; universa nunc urethra tenditur, riget; penis ipse inflammatur, calet, tumescit, ac duritiem assumit; erectiones virgae frequentes, priapismus, cum doloris lancinantis ac urethram perfodientis sensu, ad fraenum inprimis directo, subintrant. His, *testiculi* unius, utriusque tumor inflammatorius (§. 524.), aut *bubo* inguinalis (§. 523.), interdum *ophthalmitis* (§. 150.), — ad anum, tenesmus, accedunt. Continuus, ad *siccam* nunc urethram, mingendi stimulus urget, nec fere gutta exprimitur lotii; repleta ex pelvi assurgit vesica, lumborum dolor, nau-

sea, vomiturnitio, vomitus, anxietas, jactatio, pressio, tensio, summusque dolor perinaei sequuntur; ac, nisi promptius feratur auxilium, cum abscessus, paralysis vesicalis, gangraenae, vitaeque instanti periculo, excretio urinae in totum supprimitur. Interdum plures, per urethrae longitudinem, glandulae lymphaticae tument, et dolent: quae, forsitan suppuratae, ac in illam apertae, tot impuros, ac patulos urinae abscessulos fistulasque scroti, perinaei, constituunt. Haec *inflammatoria* medorrhoeae urethralis periodus, tam vehementia, quam diuturnitate symptomatum, pro causae, sensibilitatis, habitusque universi ratione diversa, nunc brevior mitiorque est; nunc, si contagium praecesserit; plerumque ad octo, decemve dies extenditur; longiorem, sub vivendi, medendi ratione perversa, in moram protrahenda. Sed alia his cruciatibus persaepe junguntur, quae describi hic magis, quam alibi, merentur.

§. 522. Quodsi scilicet una magis ab urethra parte inflammatio, sat profunda, praedominet, ac sub ista, ut solet (§. 125.), humor puriformis in ambientem lateris illius cellulosam transudet, — aut glandula lym- Chorda;

phatica, folliculus mucosus ad conspicuam magnitudinem turgeant; aut spatia cellulosa, recipiendo sub erectionibus sanguini dicata, ex praegressa inflammatione, deleta, vel quamcunque ob causam ex parte destructa sint; oportet, ut penis erectus, quo loco corpora cavernosa a vicino tumore compressa, vel ipsamet ab inflammatione correpta, vel ob cellularum concretionem, deleta, turgere minus possunt, a solita rectitudine declinans, in latus illud ( *chordam* dixerunt ) vel brevi, vel *chronico* affectu, *curvetur*. Ad inferiora vero penis, quo loco urethram corpus spongiosum amplectitur, potissimum deflectit. Est interim in iisdem subinde aegrotis inconstans veretri, licet aequae erecti, incurvatio: quod non minus, ac ipsa medendi ratio ( §. 537. ), ac demum ipse *tumoris* sub penis *curvatura* defectus, *spasmi* praesentiam saepe multum hoc ad phoenomenon contribuere docet. Rarum est, nec visum nobis, quod ligamento penis suspensorio ab inflammatione correpto, ad pubem retrahatur hic idem. Interdum sub violenta penis incurvi erectione, sanguis, quod *stimatosin* vocamus, cum impetu, ac plures, ut novimus, ad libras, ex urethra prorumpit: quo facto,



symptomata inflammationis in quibusdam sedantur. Sed in quavis fortiore medorrhoea urethrali sanguis, ut monuimus (§. 521.), facile cum muco, quin igitur conspicua vasorum laesio ubique praecesserit, excernitur.

§. 523. In aliis, sub ipso morbi impetu, Bubo. glandulas inguinales a tumore cum phlogosi, tensione, dolore, ac certo in suppurationem nisu prehendi, seu *bubonem* (§. 83.), cujus varia est indoles, contrahi videmus. Triplici verum modo, causa morbi vel ipsas ad glandulas deducta, — vel alibi, vasorum lymphaticorum ad oras, — vel denique ad nervos genitalium, haerente, *bubo*, *idiopathicus* illinc, hic vero *symptomaticus*, nascitur. Uterque ex istis, variam, aut pro materiae absorptae, aut pro stimuli longinqui differentia, naturam agnoscit. *Symptomaticus* vix non ubique est bubo medorrhoeam urethralem simplicem, aut vix nascentem, aut vigentem concomitans; et sicut vulnus, emplastrum vesicans, vel sola adeo punctura, parti sensibiliori, et ex qua glandulae lymphaticae vascula sui generis suscipiunt, ad longas etiam distantias, illata, jam saepe buboni in illis generando sufficiunt: ita et quaevis ad

urethram irritatio, vel solus ab acri, cujus-  
cunque demum sit indolis, eidem introducto,  
contactus, vel simplex inflammatio, quin  
haec ipsas ad glandulas penetraverint, bubo-  
bonem producere queunt. Producent vero  
*superiorem*, quam vasa genitalium lymphatica  
ascendunt, glandularum inguinalium ad se-  
*riem*; cum stimuli ex crure affecto venientes,  
si ( non rara coeterum ) utramque inter se-  
riem vasorum communicatio lymphaticorum  
defuerit, *inferiores* potissimum ad glandulas  
tumorem promoveant.

Quamcumque vero causam in medorrhoea  
urethrali bubo agnoscat, nisi ulcus syphiliti-  
cae naturae se simul manifestet; incerta est  
tumoris, utrum idiopathicus, symptomaticus-  
ne dicendus sit, diagnosis; ac utraque in  
specie dubia est, a morbi initio, tum illius,  
quae resorpta sit, — tum ejus, quae sim-  
plici contactu stimulet, materiae natura. Nec  
etenim semper, qui *symptomatice* extollitur,  
bubo, aut mitior est, aut facilius dissipatur,  
et suppurationem effugit; nec tumor *idiopa-  
thicus*, aut crescit celerius, aut resolvi omnis  
recusat; nec denique minus *alia*, quam sci-  
licet vasa lymphatica susceperunt, et ingui-  
nales ad glandulas duxerunt, materia, ac

*virus*

*virus ipsum venereum*, bubonem hic loci producere potest.

In una, alterave glandula, praevia plerumque stimuli in genitalibus sensatione, bubo inguinalis comparet. Tensionem, et quasi chordam ex illis ad inguina tensam aegroti accusant; et in glandula affecta, calor, tensio, tumor durus, dolor, ab attactu sensibilibior, occurrunt. Si plures simul glandulae affectae sint, tumor inaequalis insurgit; sed una ex illis, coeteris incremento celeriori praecedit. Hoc facto, cutis colore mutatur, rubet, calet ac tenditur ipsa. Varium sic bubo volumen acquirit, et ab ovi, ad pugni magnitudinem, motum corporis gressusve protinus impediens, ascendit. In multis, febris sat intensa his phoenomenis accedit; in aliis, pauca inflammatio dolorque paucus se produnt; cutis pallescit, ac oedematosi tumoris naturam bubo assumit. Hinc varius istius, ac pro causae violentia, pro subjecti, medelae ratione, diversus est exitus. Pars plurima bubonum, quod pridem, ob falsam hypothesin, timuerunt, felici cum eventu, *resolvitur*; alii ex istis, in *abscessus*, non raro perquam taediosos, mutantur; *scirrhosam* aliqui duritiem, caloris sensusque expertes, as-



sumunt; paucissimi *gangraenam* subire cernuntur.

Ne vero bubo cum *hernia* inguinali confundatur, curandum est. Distinguitur ab ista, quod magis durus dolensque sit; quod loco profundiori haereat, magisque mobilis ab initio esse soleat bubo; quod lentius plerumque, ac *hernia*, et ex causis diversis, oriatur; quod cutis ruborem mox contrahat doleatque; quod *herniae* symptomata deficiant. Non facile cum *scrophulis* bubonem aliquis confundet, si latius illas, quam istum, extendi, si lentiori origine, vel ab ipsa infantia, nasci, si doloris plerumque expertes, nec tantae inflammationis, quam bubo, capaces esse cogitaverit. Utriusque complicatio mali, per attentum in ea, quae bubonem praecesserint, vel quae eundem comitentur, animum eruitur.

§. 524. Frequens medorrhoeae urethralis, *Epididym.* symptoma *Epididymitis* est: quod nomen morbo, quem inepto *herniae humoralis*, *testiculi venerei*, *gonorrhoeae in scrotum delapsae*, sub titulo hucusque novimus, melius convenire videtur. Non modo scilicet cum liquoris puriformis ex urethra excretio, quamcunque

per causam, supprimitur; sed et medio, — quidquod aucto sub effluxu, et, ut vidimus, sub dubio adhucdum istius principio, vel et sponte cessante blennorrhoea, tumor mollis et quasi pulposus prope ipsum, ut fere duplex videatur, testiculum, comparet. Dolor ventris, lumborum, coxarum, nausea, ructus, interdum vomitus, borborygmi, diarrhoeae, nonnunquam praecedunt; pondus ad testem sentitur; ac aliquis sub ingressu, vel attactu dolor se prodit. Post diem unum alterumve, hic tumor dolorque increscunt. Plerumque vero *epididymidis* portio inferior, vel et *tunica vaginalis*, non ipse testiculus, tumoris sedem constituit; ac in molem illa convexam, tamque amplam, ut testem vix non omnem, manifeste molliorem, circumdet, extenditur. Nunc dolor, inprimis ad noctem, augmentum capit; ac tumor ipse, jam durior, per totam epididymidem, per vasis deferentis, ac funiculi spermatici portionem, sub figura ovali, pyriformi, ascendit, ac pugni virilis magnitudinem non raro acquirit. Hoc rerum sub statu, vel ipsi testiculo, vel tunicae vaginali, ipsique scroto, inflammatio communicatur subinde; vidimusque, ex ista, paucarum intervallo dierum,

*hydropem tunicae vaginalis acutum* atque conspicuum, venisse. Interrea et ipsum *vas deferens* turget, ac tensum quasi refert funiculum, et venae spermaticae sanguine ultra modum distentae, et quasi varicosae, tumorem adaugent, et abdominalem ad annulum, forte ex spasmō constrictum, *strangulationis* periculum, sub ventris dolore, meteorismo, vomitu, singultu, minantur. Quicumque nunc motus, aut corpore erecto ingressus, prae dolore, per nervos spermaticos ad renum regionem extenso, impeditur. Nec tamen febris ubique hic urget, sed pauca est in multis; nisi major hanc sensibilitas et plethorica excitaverint constitutio: quo sub statu, et nausea, et dolores ad coxas, et tormina, ex lege consensus oriuntur. Plerumque hic tumor inflammatorius, qui ipse irritationis, phlogosis ad urethram praegressae, aut praesentis, *symptoma* est, post unam alteramve hebdomadem *discutitur*, ac rara est illius, modo recte tractati, *suppuratio*. Rarissima hic loci, ac forsitan ex dicta funiculi spermatici abdominalem ad annulum strangulatione repetenda, *gangraena* est. Frequentior epididymidis, a morbo superato, *durities*; interdum cartilaginea, et fere ossea, occur-



rit: quae interim, nisi major sit, et a causa irritante in molem fungosam excrescat, aut forsitan in plenum periculo carcinoma mutetur; per multos saepe annos, suspensorio suffulta, sine tanto salutis, vel ipsius fertilitatis, detrimento perfertur. Hoc rerum sub statu, aliquando *hydrocele* tumori testis accedit. Interdum ex uno ad alterum testiculum quasi transilit inflammatio; interdum omnis, restituto muci per urethram, suppresso forsitan, effluxu, disparet.

§. 525. Praeputii, penis *ante coronam*, Phimosis.  
ut reduci super istam non possit, morbosa strictura, *phimosis* vocatur. Haec interdum pueris *congenita* est; ac facilem urinae excretionem apud istos, — in viris, penis erectionem completam impedit. Sed *accidentalis*, multiplices ob causas, inducitur *phimosis*: ubi vel praeputii, glandem cooperientis, extremum ad limbum, diameter imminuitur; vel coles ipse molem hac sua vagina majorem acquirit. Rarius hoc ultimum, nisi ob natas forte tardius in glande inflammationem, excrescentias, verrucas, — frequentius primum, ob oedema, phlogosin erysipelaceam, ulcera, callum, frenuli laesionem, contingit. Ex

praegressis variolis, et abscessulo ex istis, praeputii ad limbum relicto, phimosis conspeximus. Scilicet ob laxam internae praeputii membranae, telaeque cellulosaе, qua haec cum externa connectitur, naturam non minus, ac ob declivem et pendulam hujus veli positionem, facilis est serosi, lymphatici, puriformis humoris, — quin, ipsius urinae, ex urethra, per ulcera laceratâ, ab anasarca, vel a phlogosi praegressa, infiltratio. Sub ista, praeputium stringitur, tumet, pallescit, interdum vesiculis seu *bullis cristallinis*, superiorem ad marginem, obsidetur, ac viam lotio, vel et muco, saniei, alluentibus, aucto abhinc stimulo, praeccludit. Hinc frequens apud illos, quibus longum et angustum est praeputium, ad phimosis, tam sub urethrae, glandis medorrhoea, quam si ulcera venerea, alia, hic loci lateant, occasio habetur; ac nisi promptum huic malo feratur auxilium; praeter urinae, saniei, excerni impeditae incommoda, et praeterquod glans ipsa penis erosa, interdum vicina cum praeputii portione concreseat, — per alteram, acri a sanie collecta, abscessus sub forma elevatam, consumtam, vel, quasi glans altera, pro parte, vel tota, penetret, strangu-

letur, ac junctam cum *paraphimosis* (§. 526.) *phimosin* formare videtur, — a celeri haec tenuis membrana *gangraena* corripitur. Alias in longum satis tempus trahitur, et *chronicam* phimosis indolem assumit.

§. 526. Contrarium exposito (§. 525.) vitium, cum scilicet praeputium arcte penis *Paraphimosis* retro glandem contractum, hanc super ipsam abduci nequit, *paraphimosis* vocatur. Haec igitur, ipsa ex *phimosis*, repulso violenter, nec prius laxato, post glandem praeputii annulo, aliquando exorta, communior apud illos est, quibus brevius magisque angustum natura praeputium, ac ampliorem sine velo glandem esse voluit. Interna scilicet potissimum illius membrana subtilior, laxior, sensibilior, quacunque ex causa, irritata, et cum tela cellulosa vicina a phlogosi correpta, intumescit, revolvitur, et a cute externa in unum, vel plures in annulos contracta, cum ipsa glande, quae tumet, livet, vel bullis cristallinis obsidetur, non sine celeritiae *gangraenae*, colem mutilantis, vel adeo lethalis, periculo strangulatur. Interdum, minus vehemens. hoc malum, ob insertas praeputio verrucas, per longum satis tempus,



quasi *chronicum*, protrahitur. De tumoris insignis, a lymphâ coagulabili, inter praeputii laminae congesta, producti, ad capitis infantilis magnitudinem in paraphimosis adaucti, et ab experto chirurgo feliciter resecti, exemplo nobis constat.

**Ophthalm.** §. 527. Jam alio in loco (§. 150.) *ophthalmitidis*, quam medorrhoea urethralis violenter suppressa inter omnes *acutissimam*, inducit, mentionem injecimus. Difficilis hujus, rari quidem, phaenomeni explicatio est; ac si genitalium cum oculis consensus, ut videtur, pro causa debeat admitti; non minor tamen illorum cum larynge, vel cum thorace consensus, similem in ista morbum, quod sciamus, non inducit.

**Stad. relax.** §. 528. Haec fere sunt praecipua, quae stadium medorrhoeae urethralis inflammatorium apud multos circumdant, et ex partium consensu oriuntur, symptomata. Sed, unde consulto recessimus, ad morbi principalis (§. 521.) descriptionem redeamus!

Tantium scilicet sedes malorum, licet ardor dolorque per totum urethrae decursum se prodant, raro a fossa naviculari ultra pol-

licem cum dimidio extenditur: quo loco, ab attactu potissimum, ut a carbone accenso, dolente, rubor erysipelaceus urethrae superficiem, et cryptas mucosas suffundit. Interim frequens prostatae glandulae, post hunc morbum ab aegrotis diutius neglectum, vel aliquoties repetitum, suppuratio, scirrhus, ac pendens ab istis ischuria, — phlogosin non tam raro, ac creditur, ad urethrae posteriora haerere, et ipsius perinaei tensionem, tumorem, dolorem, in aliis symptomatica, in vera prostatae ac colli vesicalis, vel seminalium interdum vesicularum inflammatione consistere, nimis confirmant.

Hoc igitur stadium, sub quo majora medorrhoeae urethralis discrimina urgent, ac febris interdum valida accenditur, per octo, decem fere dies protrahitur; quo tempore, sub debita cautela, symptomata vel sponte decrescunt; humor effluens magis magisque albescit, tenacitatem majorem assumit; ardor sub urinae, minus tinctae, excretionem, erectiones dolentes gradatim sedantur ac denique cessant; muci copia quotidie imminuitur, ac potissimum densae, albescentis, ponderosae nubeculae sub forma, aut filorum vermicularium pellucidorum adinstar, fundum

urinae petit; nec raro, urethrae extremum ad ostium, in *pseudomembranulas*, hoc ipsum obturantes ac momentaneum lotio allidenti obstaculum posituras, coalescit. Tandem unius, aut alterius spatio hebdomadae, singula hujus morbi localis, nisi novis erroribus, quod, ob reliquam in urethra irritabilitatem, facile est, — aut ob menstrua, foeminae plethoricae, irritabili supervenientia, etc., revocati, ac demum in *chronicam medorrhoeam* (§. 532.) conversi, symptomata disparent.

Medorrh.  
vag. acut.

§. 529. Ex dictis vero symptomatis, alia, sexum modo unum, alia utrumque divexant. Sed licet foeminae, sub mictu, ad urethrae principium, ac omnem posthac per vulvam, non parum doloris accusent; prima tamen, in ea, quae per contagium patiuntur, medorrhoea, irritationis indicia, loco, quo virus proxime pertingit, ad *vaginam* esse, demonstrant succedens, mox ab impuro concubitu, hac in parte titillatio, calor, ac tensio; demonstrant summus vaginae, ab actu, vel ab admissio viri congressu, dolor; ac demum ipsa interdum oculorum inspectio: qua, mucum, licet omnis ad ostium vaginae



declivius *confluere* videatur, ex hoc tamen amplioris superficiei canali potissimum depluere docemur. Hinc major ille sub urina mitenda tenesmus, non minus quam uteri ipsius, ligamentorum, pubis, lumborumque lassitudo, dolor, vel ex solo harum partium cum vagina consensu, — vel in quibusdam a modo congressus, conceptionis ob metum, infecti, quo contagium externis magis applicatur, pendeat. Haec igitur *medorrhoea vaginalis*, quoad materiae profluentis colorem ac indolem, cum urethrali (§§. 521. 528.) conspirat; sed longe mitius plerumque foeminas, quam viros, mulctat; licet plura in illis, *ad anum*, ob vaginae viciniam, ob muciacrioris ad istum confluxum, incommoda scaturiant; ac ob spongiosam laxamque vaginae structuram, ob declivem ejusdem positionem, ob novas a menstribus recurrentibus irritationes, frequentior in *chronicum* affectum (§. 532.) mutatio contingat. Exempla, ubi foeminae, medorrhoeam, cujus ipsae symptomata necdum persenserant, viris dederunt, haud pauca habentur.

Medorrh.  
ureth.

§. 530. Vel sine contagio et quovis a stimulo mechanico, vel alio, imprimis herpe-

Medorrh.  
Recc. Int.

tico, rheumatico, *recti* intestini ostio applicito, vel a muco infecto, sub horizontali decubitu, ex vagina versus anum confluyente ( §. 128. ), vel haemorrhoidum tumentium, vel scierhi prostatae, aut alterius tumoris actione, demum ex nefando flagitio, — sub iisdem interdum, ac in ipsa dysenteria symptomatis, ad *anum* medorrhoea comparet, ac mucus puriformis, a pure, quod fistulae, abscessus, hic loci non raro largiuntur, diversus, coloris albi, flavescentis, aut viridis, subinde sanguinei, copiosus, sponte secedit.

Medorrh.  
externa.

§. 531. De muci puriformis ex labiis sinuque mulierum externo fluxu jam diximus ( §. 521. ). Sed et viri interdum, licet raro, ex glande penis sola, vel loco, istam ac praeputium intermedio, seu veretri ad collum, vel demum ad internam praeputii superficiem, inprimis sub phimosi ( §. 525. ), eundem copiose, nec dote, ab illo, quem urethra plorat, distinctum, sine ulceris praesentia, cum partis affectae rubore, splendore, ardore, tumore fundunt: quod mali genus *spuriam* quondam *gonorrhoeam* dixerunt. Nullus hoc in casu urethrae ardor, nulla in mittenda urina, ubi simplex, nec ad urethram

extensum est malum, difficultas occurrunt; sed tenax albaque materies glandem, aphtharum, ulceris, aut et pseudomembranae sub forma, integram et illaesam obducit; ac, pro causae natura, vel paucas post dies, vel solito medorrhoeis descriptis (§§. 521. 528. 529. ) longiori decursu, secedente interdum epidermide, siccatur.

§. 532. Quaecunque vero ex dictis medorrhoeae speciebus (§§. 520. 528. — 530. 531. ), cessantibus licet irritationis sensibilis indicis, ac stadio *relaxationis* (§. 528. ) jam aliquot per hebdomadas protracto, nihilominus aut nunquam siccatur, aut ob exiguas rationes repullulat: ea, utroque in sexu non infrequens, in sequiori, frequentior, *habitualis*, vel *chronica* vocatur. Scilicet, quin ad locum, ex quo mucus effluere continuat, sub mictu, vel ardor, vel dolor, — quin, in viris, erectio molesta, vel sub humoris genitalis ejaculatione, urentis caloris sensatio in urethra, — quin ad vaginam in foeminis, sub coitu, perceptio ingrata supersint, humor tenax, albi plerumque, — interdum et alterius, coloris, — nunc paucus, matutinas imprimis ad horas, vel tempore, quo nixus

Medorrh.  
chronica;



suscipitur, aut stimulus praecessit, — nunc multus, continuo, distillat, ac viscidum sensimque acredinis et proprii foetoris non expers gluten genitalia inquinat, viresque, sub mucī secedentis excessu, non parum infringit. Atque haec est *secundaria*, quae, utroque in sexu, ex acuta, et ex ea, quae contagium agnoverat, neglecta, vel iterum iterumque redeunte, frequenter procedit, medorrhoea. Glandis, sub ista, *impetiginem*, nisi talem, quam impuritas produxerit, breviorē, non vidimus.

Med. foem.  
insons.

Alterius originis, non vero diversae penitus naturae, est humoris, aspectu mucosi, ex foeminarum genitalibus fluxus diuturnus, *fluor albus*, *leucorrhoea* Auctorum; quod genus profluvii *medorrhoeam foeminarum insontem* vel contagio carentem, vocabimus.

Copiosi, utilissimique vapores ac mucī fontes, uteri, tubarum, vaginae cava irrorant. Haec ita contingunt; ne sana in foemina, aut virgo sit, aut mulier, excepto menstruum, coitus, partusque vicini, praesentis, peracti, tempore, indecorus e vagina fluxus sequatur. In humana interim, quae corpore erecto incedit, foemina, frequenter, ex causis adeo non semper tam

magnis, liquidum hic loci, aut copiosius, quam par est, et morbosum secernitur; aut per vasa lymphatica abduci non potest: quo fit, ut humor serosus, mucosus, puriformis, coloris subalbidi, flavescentis, vel ad viridem, subnigrum tendentis, — odoris nauseosi, vel et foetidi, nunc modo paucis, cum menstrua vel instant, vel cessarunt, diebus, vel sub nixu, motu corporis fortiori, ciborum, potuum spirituosorum intemperantia, perspiratione suppressa, vel ad horas matutinas, vel incertis, vel periodicis subinde intervallis, — nunc vero continuo, aut paucus, aut plurimus, nunc blandus, nunc acris et vicinias arrodens, distillet. Non absimilis tunc membranae, quae genitalia obducit, status, ab eo narium, gutturis, tracheae, bronchiorum, quem ( §. 506. ) descripsimus, dicendus est; ac saepius verum *vaginae catarrhum*, acutum, chronicumque sistit; — alias ex coryza suppressa nascitur; — vel hanc ipsam, a pudendis aversa, ut exempla docuere, et tussim, et asthma, et tabem pulmonum pituitosam ( §. 513. ) producit *medorrhoea*.

Communissimum haec ipsa, urbium inter *Dispositio* humidaeque regionis delicatulas, imbelles,

cachecticas, laxique habitus incolas motu corporis privatas, — frequentiore apud juniores puellas, vel illas apud mulieres, quae sepius abortum, aut, aetate teneriori, plures, sibi que vicinos nimis, difficilesque partus, — aut nullos usquam, steriles, expertae sunt, — quae propria crudeles prolibus ubera subducunt, — quae semetipsas masturbant, — quae menstruo fluxu privantur, aut parcum nimis, difficilemque fundunt, aut nimium patiuntur, morbum constituit; sed nulla est aetas, nullusque corporis est habitus, quae medorrhoeae hac specie, ex causis diversis ( §. 534. ), non interdum laborent; et virgo impubes, matura, et foemina coelebs, et uxor, et vetula imprimis, hoc a fluxu haud raro foedantur. Vel sub ipsa graviditate fluor albus interdum foeminam continuo divexat.

Sedes.

Quo ex fonte profluvium hoc morbosum scaturiat, est quaestio. Ex *utero* venire, negant, qui hujus ad osculum in teneris puellis, in virginibus, in gravidis, clausum respiciunt. Uterum accusant, qui menstruum ex hoc ipso fluxum stillare noscentes, floris albi, vel praevii, vel mox a menstruo cessante venientis, vel menstrua supplentis,

succes-



successionem considerant. Nos certe sinum externum, vaginam prae aliis, non raro et uterum, et tubas istius aliquando, humorem, de quo agimus, largiri, sectione pathologica id ipsum docente, putamus. Virginibus os uteri connivet; praegnantibus humano clauditur ab ovo; sed quoties hae viae patent: toties ex uteri, tubarumque cavo humorem quemvis morbose secretum per loca declivia ferri, ac per vaginam stillari nil impedit. Nisi *uterus* hoc in morbo frequentius ipse laboraret; vix tanta in *abortum* sub isto proclivitas, nec *sterilitas* tam saepe in foeminis hoc profluvio affectis observanda venirent.

Nec certe, quae hoc sub morbo fluunt, ex pituitae folliculis singula venire, aut si stere *mucum*, credendum est; sed humor *puriformis* (§. 128.) ex omni, qua late parent genitalia, superficie irritata, non aliter, ac de urethra stimulis affecta diximus (§. 521.), secernitur, et cum mucos cervicis uterinae vaginaeque excernitur mistus.

Materiae  
indoles.

Hinc difficilis non raro *medorrhoeae inson-  
tis*, tum ab illo, quod contagium plerumque ex urethra non minus, quam vagina induxit (§§. 521. 529.), profluvio, tum a *purulento*, ex latente in genitalibus mulierum inter-

Distinctio  
morbj.

nis, aut vicinas, quae cum istis communicant, ad partes abscessu, vel ulcere, pendente effluxu distinctio; et nec materiae per vaginam defluentis aspectus, nec alia ejusdem, quam sensus discernant, qualitas, nisi ex cauto rerum, quae praecesserunt, ac symptomatum examine lux aliqua affulgeat, ad diagnosis sufficiunt. Difficultatem vix parit *menstruorum decolorum, pallidorum, albidorum*, ex sero vel mucro potissime consistentium, vix sanguine tinctorum, quae virgines interdum ac mulieres chloroticae sub certis *periodis* patiuntur, a fluore albo, qui promiscue ac sine ordine, vel cum inordinatis, aut nimis jam mensibus succedit, distinctio. A pure, vel mucosa materia ex ipsa vesica veniente, medorrhoea per continuum effluvium, quod ex vesica, a paralyti non affecta, non nisi laxato pseudosphinctere contingit, sat facile distinguitur. A vera *gonorrhoea* (§. 547.) differt medorrhoea, quod seminis fluxu, nisi voluptas, — sensus tamen aliquis comitetur, ac major debilitas sequatur. Ad *purulentum* e vagina effluxum quod spectat, hic sese origine, quam praegressa inflammatio, suppuratio ad uterum, vesicam, intestina, peritoneum, exhibuit, ac signis

istarum (§§. 227. 264. 243. 220.) a *medorrhoea vaginali chronica et insonti* distinguit. Magis ardua, impossibilis interdum, est istius, ab *acuta*, per contagium plerumque inducta, vel ab aegrotis celata, vel quodammodo protracta, vel demum complicata (§. 529.) distinctio. Si fides coitum impurum neganti haberi queat, et cohabitantis mariti sanitas testimonium confirmet; si ardor, dolor, vel urinae difficultas, conspicua, a morbi initio defuerint; si profluvium passu lento, aut brevi tempore, priusquam menstrua prodirent, aut mox ab istis, inceperit; si junioribus puellis, loco sanguinis, serosa, mucosa ex utero materia, sub iisdem, ac solent menstrua, phoenomenis, ac certis modo *periodis*, effluat; si blanda primum ac pauca satis, albidaque materia, sub mitioribus symptomatis, ac sensim sensimque copiosior, sub lumborum, ossis sacri, coxarum dolore, ventriculi languore, effluxerit; si laxa corporis conditio, vitaeque inners, aut quae diximus alia, vel quae infra dicemus (§. 533.), praecesserint: tunc profluvii indoles insontis et chronici vix dubiis obruitur. Augebitur difficultas, si major effluentis liquoris acredo jam adsit, ac, sub debita licea



genitalium puritate, haec ipsa tamen, aut illa viri coeuntis arrodant, exulceret, vel medorrhoeam urethralem ( §. 521. ) ex istis, quae interdum contingunt, inducat. Interim facilius breviorque istorum in viris, quam a contagio suscepti, malorum est cura, ac fidelis symptomatum, quae foeminam a morbi principio, blandiora, tenuerunt, et nunc magis ad lumbos ventriculumque divexant, hic faciem, — nec tamen semper, ne errori sit locus, sat claram, accendit, fluorem album sub fluxu menstrui cessare, quod menorrhoea ex *contagio* non faciat, siue quovis fundamento, cum humor uterque, cum sanguine mistus, distinguere non possit, dixerunt.

Symptomata.

Sed ipsa symptomatum, quae medorrhoeam chronicam ac insontem foeminarum circumdant, historia, diagnosis certitudinem adauget; ac si forte simplex, sine ulcere *venereo*, medorrhoea neglecta ( §. 529. ) illam, quod non raro contingit, induxerit; non magno certe in praxi errore haec causa ignorabitur. In genere *localem* medorrhoea aegritudinem, nisi totius debilitas systematis praecesserit, constituit; et quae coetero in corpore sub illa succedunt; hujus morbi symptoma, effectum, non vero causam sistunt.

Hinc pauca in sanis coeterum mulieribus, donec major humorum jactura sequatur, ab initio, et per menses, quin annos, totius corporis incommoda se produant; ac primum, sibi genitalia plus aequo madere, mox vero, quibusdam, ante quam menstrua se prodant, ac postquam cessaverint, diebus, humorem serosum, lutea ex pallido tingentem ex vagina aufugere observant. Sensim sensimque in plurimis, nam in quibusdam derepente hic fluxus sat copiose prorumpit, cum horis matutinis lectum, in quo, supinae, nil adverterant, deserunt; pituitosum sibi humorem e vagina per crura descendere percipiunt. Hic effluxus interim suspenditur; sed sub alvo cum nixu deposita, sub corporis exercitio, post lautum prandium, redit, atque temporis tractu augetur. Jam primum oculi quasi humidi, aut *vitrei*, et arcu sublivido, plumbeo, utriusque tumor palpebrae aquosus, cum faciei pallore, tumore, comparent. Morositas, pigrities, lassitudo, ac aliquis ventris, dorsi, lumborum dolor per os sacrum extensus, accedunt. Ventriculi tandem functiones labescunt; digestio tarda, difficilis, oppressio, morsus, dum jejunaesunt, ventriculi, ructus et aquae vomitus

acidæ, sequuntur; interdum alvus adstricta, interdum laxa est; debilitas corporis, genuum impotentia, crurum perfrigeratio quotidie augentur; sub motu corporis et acclivium ascensu, cordis palpitatio, anhelatio, se produnt.

Hoc rerum sub statu, periodicus sanguinis ex utero fluxus consueto ab ordine, plerumque tardior et paucus, interdum nimius, recedit. Augetur muci hoc tempore, vel et parum a sanguine tingitur, fluxus; incommoda plura, lumborum tensio, dolor obtusus per uterum, laterum mollitudinem, abdomen, pelvim et crura extensa increscunt. Interea color habitusque materiae mutatur: flavescit, virescit ista; odorem spirat nauseosum; ipse vaginae sensus a spisso, quod hic confluit, glutine obtunditur; fastidium creant maritis uxorum amplexus; quæ interim, licet et hoc interdum sub statu concipiant; plerumque tamen, ob systematis vitium uterini, vel steriles redduntur, vel partum immature expellunt. Saepe uterus, aperto, praeter ordinem naturae, osculo, et gravior, profundius descendit, ac interdum prolabitur. Gluten ipsum genitalia inundans ex parte per urinas abstersum, vel turbidas, subalbas, asininas



has reddit; vel floccos, aut filios in illis capillares, pellucidos, aut crassam gravemque nubem ad fundum constituit; ex parte, vaginae inter rugas et in profundis lacunis diutius retentum, corrumpitur, acridinem, foetorem contrahit, ac in ichorem conversum, pruritus, voluptuosum interdum, ardorem ac phlogosin internam producit, vaginae superficiem arrodit, ac uterum, vesicam, anum, in consensum trahit. Interdum saniosa, livida, subatra, foetidissimi odoris materia tam copiose prorumpit: ut et gressus impedire, et lectulos altius subterpositos illuvies penetrasse sit visa. Hoc tandem sub statu, pallor subflavus corporis, debilitatis, nervosi systematis affecti symptomata, anxietas, tristitia, cephalaea, anorexia, increscunt; accedunt febricula lenta, cum pulsu parvo, duro, inaequali, frequente, macies cum tussi arida, quam breves per intervalla thoracis dolores, ac nocturni sudores pessumdant; vel pedes primum, mox vero crura, corpus universum, hydropico tumore inflantur; uteri interdum haemorrhagia jungitur; ac singula tristem morbi perlongi eventum praenunciant.

Causae.

§. 533. Sub diversarum medorrhoeae specierum historia, causarum simul potiorum mentionem injecimus. Quae vero ex istis referendae supersunt, aut, ad meliorem morbi intellectum, uno quasi agmine disponi merentur, has adduci nunc interest.

Med. acut.

Medorrhoeae acutae *urethralis* (§. 521.), *vaginalis* (§. 529.), *recti intestini* (§. 530.), *externae* (§. 531.), causam, in quovis stimulo, mechanico, vel alio, has in partes agente, quaesivimus. Quae vero causae hunc ipsum inducunt; has, tum ipso *in corpore*, — atque tunc, mox ipsam ad partem, quae aegrotat, mox alibi, generari, atque hic, vel ad illam deponi, vel lege consensus, vel partium mechanismi, in eandem operari, — tum corpori, vel parti, quam offendunt, ab *extus* inferri, — tum *ambobus* his modis oriri, dicendum est. In dictis hinc partibus, ut in aliis, communibus ex causis, phlogosis accendi, et ad humoris mucoso-puriformis secretionem porrigi occasio potest. Frequentius, ut nos ipsi non semel observavimus, rheumatica materia, aliunde in urethram profecta, medorrhoeam induxit. Similes de podagrico, seu arthritico, aliove

ab acri observationes in fastis medicis occurrunt. Ex sola gingiva, ob dentem eruptioni vicinum, dolente, ut in aliis frequenter diarrhoeam, — sic pluries, eodem in homine, medorrhoeam urethralem exortam esse legimus. Ex fortiori, per catharcticum, stomachi, intestinorum stimulo, praesens medorrhoea augetur. Ex recto intestino a phlogosi, haemorrhoidalem vel aliam ob causam correpto, ad urethram medorrhoea nonnunquam comparet. Ex fluxu vaginali, perinaeum ac anum infestante, hic ipse ad similem secretionem stimulatur. Ex vicino urethrae, vaginae, recto intestino, tumore, vel ex prostatae induratae, ex polypi, aut scirrhi uterini, aut abdominalis ex visceris morborum has in partes pressione, medorrhoea haud raro scaturivit. Ex cereolo, canali urethrali, — ex pessario vaginae diutius immissis, a cerevisiae, vini, recentium, nec fermentatorum potu, ex materia acriori, pudendis injecta, ex concubitu cum foemina, fluore albo acriore laborante, leprosa, vel summopere impura, frequenter medorrhoea originem desumsit. Sub alterius stimulantis materiae, in parte corporis quidam praesentia, ad motus urethrae, vaginae cujuscunque



naturae stimulus, latitantem alibi fomitem has ipsas ad partes invitat, accendit, et medorrhoea *complicata* inducitur.

An ex ul-  
cere?

Nec certe, ut ista sequantur, *ulcus* in urethra requiritur; nec in ipsa, quam contagium ex concubitu impuro excitaverat, medorrhoea, pathologicae sectionis testimonio, nisi raris, et complicatis, ut videtur, in casibus, *ulcus*, aut reliqua ex isto *cicatrix* detecta fuerunt. Praeterea nec *ulcus*, primis jam morbi diebus, cum vix incipit phlogosis, adesse, — nec, superficiale et parvum, mox tantam puriformis copiam materiae largiri, — nec tam celeriter, ac solet, medorrhoeam repelli posse, supponi prudenter potest. Vel ipsa tandem partium coeterarum, narium, oculorum, anique, puriformem materiam striasque sanguinis, sub acuto dolore, sine ulcere, fundentium copiosa exempla, et nudus genitalium, in mulieribus medorrhoea laborantibus, aspectus, pristinam, quae *ulcus* in simplici communique moedorrhoea supponit, theoriā falsitatis convincunt.

Praesentis aliquando, ad urethrae canalem, *ulceris*, facile *venerei*, signa indicare sat certa vix possumus. Si violenta, ac diuturna ad urethram inflammatio, cum perversa vivendi,

medendi methodo, praecesserit; si, cessante jam illa, modo pauca, interdum vero nulla, sub insigni ardore, dolore, sub attactu, loci semper ejusdem, materia effluat; si cereolus tenuior, canali immissus, cruciatus quamplurimum exasperet; si effluens materia non intime cum sanguine, sed cum striis cruentis remista, secedat; si longum per tempus haec symptomata, consuetis remediis resistent; tunc utique justa satis dubia de urethrae integritate nos premunt. Interim ardentissimum, et constantem uno eodemque in loco, ac simul a quovis attactu violenter adauctum, cum nullo effluxu, urethrae, a concubitu suspecto, dolorem, sine lue insecuta, observavimus.

Communissimam vero causam medorrhoeae ( §§. 521. 529. 531. ) sexus unius cum altero, ex simili contagio genitalibus infecto, congressus constituit. Hujus contagii origo prima nos latet; sed quacunque ex causa, nunc quidem cessante, sponte primum descenderit; an *idem* cum illo, quod *luem veneream* inducit, dicendum sit, sub iudice lis est. Ex eadem certe scaturigine propullulat utrumque; — sed indole, si modo, *simplex*, cum altero non confluat, *diversum* et nobis

An venerea.

utrumque ( §. 521. ) videtur. Omnisso interim, quod satis incertum sit, *antiquitatis* hujus profluvii, prae *lue*, majoris argumento, potiora, quae allatam opinionem sustineant, fundamenta, ab eximiis licet Viris sat fortiter concussa, adducimus.

Donec igitur infensi hominibus contagii, quod *syphilidem* communicat, indolem rectius definire discamus; id ipsum, virus esse dicamus, quod concubitu impuro plerumque corpus, praevio locali affectu, subintrat, — susceptum ab isto, solius naturae, vel aliorum, quae nota sint, auxiliorum beneficio nunquam, — per solum vero *mercurium*, systemati vasorum ingestum, ac ab isto, incognitas ad leges, mutatum, efficacia, certitudine, quam nullibi morborum internorum hoc metallum manifestet, evidenter majori, celerique, seu *specifica*, virtute, extinguitur. Medorrhoea, quae, simplex, sine *ulcere venereo* incedit, sponte, vel sine artis auxilio plerumque, sub debita modo cautela, dispareret; et a mercurio medelam certe nullam, non raro vero damnum sat evidens, agnoscit. Ab hac ipsa, vel male tractata, vel inconsulte suppressa, non paucae aegritudines descendunt; sed *lucem veneream*, seu morbum



a solo mercurio, tam celeri, tam evidente successu, domandum, *viginti octo annorum* in arte medendi experientia instructi, abhinc venisse, conspeximus *nunquam*. Dolores artuum nocturnos, hoc ipso in Clinico instituto, accusabant non pauci, qui sola medorrhoea sese pridem fuisse affectos testabantur; sed *mercurio* hos dolores vel alia, quae de lue suspicionem alebant, symptomata, non potuimus auferre; mitigarunt, abstulerunt hinc inde, quae in *luem*, sola, nil possunt, alia auxilia. Praeterea in nullo veritas tam saepe medicis, quam in istorum examine, nasconditur. Foeminae, quae ulcus genitalibus haud offerunt: in *vagina*, quo oculus non penetrat; id ipsum pati, — et sub aspectu *medorrhoeae*, *luem* viro incauto conferre queunt. Sub angusto latet interdum ulcusculum praeputii, vel latet forsitan, quin symptomata id doceant, in urethra. Vel ea, quae longo a tempore suscepta fuit, continuat, et sub recentioris medorrhoeae symptomatis, huic ipsi inconsulto adscribitur, antiquior jam istâ, lues. *Circulationis extravias* jacere ad urethram in illa virus, est dictum; sed quomodo, quam tantas, tamque longas, in parte, tenuissima epidermide in-

structa, turbas, excitare videmus; *resorberi non posse*, non debere, dicetur materia: cum vel ipsum cuti applicitum acre *cantharidum*, licet cuticulam non eleuet, resorberi, — vel osculo, vel suctione *luem* oris cavo inseri fateamur? Opinionem, a mucosae urethrae, ne hic ulcera ex acri nascantur, defendi, vel ipsum hoc elui ac prius excerni, — symptomata, longitudo medorrhoeae admitti recusant. Quot non denique, vel a solo puriformis, in medorrhoea, materiae effluxu, praeputium inter e glandem, ob solius saepe munditiei in viris defectum, — vel anum inter et vulvam, in foeminis, ulcera nascuntur! quae, licet de affluxu humoris iniqui continuo ex urethra testentur; *benigna* tamen indole vel paucis, solisque exterius remediis jam cedunt, nec *luem* inducunt! . . . Experimenta quorundam, qui se, cum desumpto ex ulcere venereo, et in urethram deducto ichore, medorrhoeam creasse, — vel ex materia puriformi, sub ista, per urethram stilante, et vulnere per artem inducto inserta, *ulcus venereum* produxisse docuerunt, ignorare non possumus; sed primo, minime virus venereum, in urethram advectum, vel, quod necdum conspeximus, ex corpore jam

a lue infecto, in hunc canalem depositum, *medorrhoeae venereae* aliquando producendae impar esse censemus; et *medorrhoeam* interdum, licet casu, in quo ulcus urethrae deesse vix credimus, rarissimo, virulentam hanc indolem habere, ac luem propagandi potentia valere, nequaquam ex eo, quod hanc nunquam, sat certam, viderimus, negamus; secundo, ex paucis hac super re institutis, nec satis hucusque confirmatis, experimentis inconcussa veritas quod *ulcera benigna* frequentius sub ipsa *medorrhoea*, quin indolem *veneream* ostendant, inundentur ab ista, infringi haud potest. Quamplurimi, qui luem ex concubitu acquirunt, non fluxum ex urethra, contagio licet maxime exposita, sed *ulcera* ad penem rebellia, ut luis praenuncia, patiuntur; et qui utroque ex malo laborant; hi saepe per mercurium a lue, — a *medorrhoea* nequidquam liberantur.

Quodsi vero communis et simplex *medorrhoea* contagio inducta, ex *acri sui generis* oriatur, et *veneream* rarissime originem agnoscat; oportebit et *bubonem* ( §. 523. ), et *epididymitem* ( §. 524. ), et *phimosin* ( §. 525. ) et *paraphimosin* ( §. 526. ), quae profluvii illius symptomata constituunt, nisi for-

Causae  
hub. epid.  
etc.



sitan praesente simul venereo ab ulcere oriantur, similis esse prosapiae. Ac revera, hoc ipsum vel sola jam, quod a cereolo urethrae immisso, per merum consensum *bubones* oriri sciamus, experientia confirmat; ac altera, quod sine mercurio, ac methodo communi haec symptomata medorrhoeae, quin *lues* unquam sequatur, felicissime dissipentur, vix dubium relinquit. Ab ulcere tibiae leviori per externam violentiam inducto, mox eodem in latere bubonem inguinalem observavimus; a digiti laesione, glandulae axillarum in tumorem durum assurgunt (§. 523.); hinc ex urethrae phlogosi ex suppressa cum adstringentibus, vel a frigore, medorrhoea, similia vasorum actione lymphaticorum contingunt. Ab istis, portionem liquidi morborum sub ipsa medorrhoea abduci, nil obstat; sed licet hoc fiat, licet *circulationis extra leges* haerere tunc dici hoc virus non queat; nihilominus, modo ulcus venereum non adsit, *lues*, — vel bubo resolvatur, vel suppuret, si ex propria judicium experientia feramus, non sequitur.

Epididym.

Nec minus *epididymitis* (§. 524.) ex solo, qui urethram divexat, stimulo, ad leges licet non semper cognitae, proficiscitur. Ab

incau-

incauta spirituosorum, adstringentium in urethram instituta injectione, a frigore suscepto, quibus saepe medorrhoea supprimitur, ab equitatione, coitu, sub ipso hoc fluxu continuatis, frequenter hoc malum inducitur. Qui testes mox a primis medorrhoeae diebus suspensorio committunt: his rarius, ex ista, has ad partes inflammatio succedit; sed hoc ipsum, rem satis non explicat. Ex urethrae vasis lymphaticis nulla cum testibus communicant; inflammatio in urethra locum anteriorem magis occupans, in communi medorrhoea vix deferentes semen cannales attingit; licet graviori sub malo ad hos ipsos extensam sectio pathologica monstraverit. Cum parvo in urethra sub urina mittenda ardore, sat longo, priusquam signa medorrhoeae sequerentur, tempore, hunc se morbum manifestasse conspeximus. Post suppressum in illa profluvium, saepe dolor, inflammatio in urethra, quamvis tumor circa testiculum nascatur, non urgent; restituto interim profluvio hic ipse tumor facilius dissipatur. Videtur hinc solus urethrae ab acri, vel a stimulo mechanico, irritatae, cum testibus consensus hoc mirum symptoma explicare; nec certe veneream hic morbus frequentius, quam ipsa

medorrhoea, indolem agnoscit. Vel a sola urinae retentione, et stranguria qualicunque, testiculos, cum dolore, tumuisse, ac illis dissipatis, subsedisse, observationes docuerunt. Ex mercuriali unguento potiore, quam ex aliis exterius adhibitis, effectum non vidimus; nec *luem* hoc ex malo, nisi ulcera praecessissent, oriri conspeximus.

Phimos.  
paraph.

De phimosi (§. 525.), paraphimosi (§. 526.) natura idem dicendum est. Nascentur hi morbi ex quovis, tum glandi, tum praeputio, vel utrisque, applicito stimulo, per violentum, vel et naturae contrarium, congressum, per fraenuli sub concubitu laesionem, per acre quodcunque hic loci collectum, receptum, depositum. Saepe ulcus venereum, ut causa, hic latet; frequentius sola impuritas, ac puriformis materiae, sub medorrhoea glandis, praeputii, urethrae profluentis acredo haec symptomata, — interdum ulcera superficialia, benigna producant; quae *lues* non magis, quam ipsam, quae simplex est, medorrhoeam, insequitur. Ex phimosi violenter post glandem reducta, paraphimosi non difficulter exoritur.

Nec alia est fluxus puriformis, mucosi ex ano (§. 530.), vel medorrhoeae externae



( 531. ) natura, et causae prorsus similes haec mala<sup>1</sup> producant. Ex suppressa medorrhoea vaginali, mulierem ad *anum* eodem morbi genere affectam fuisse novimus.

*Chronicae medorrhoeae* ( §. 532. ), pudendorum plerumque *debilitas*, cum *morbosa* his in partibus *sensibilitate*, pro fundamento est. Universi interdum *debilitas* systematis, et quae istam inducunt, inertia corporis, victus parum nutriens, viscidus, pinguis, aquosus, potuum, balneorum tepidorum abusus, atmosphaera humida et frigida, laxa fibrarum a nativitate constitutio, haemorrhagiae aliaeque evacuationes, morbi, vim vitae frangentes, praegressi, labor nimius, animi pathemata deprimentia, somnus diuturnus, hoc ad profluvium disponunt. Interim, nisi major his, genitalium se jungat *laxitas*, et innixa huic ipsi peculiaris *sensibilitas*; vix fluxus, de quo agimus, ex sola totius debilitate, orietur. Ubi stimulus sat longus genitalia vexavit, et impetuoso humorum affluxu, vasorum robur infractum, nervorum *sensibilitas* adaucta sunt, haec ipsa, ut secretio morbosa minori sub stimulo, quem congestio humorum suppeditat, in longius tempus continuet, jam sufficit. Sic praegressa medorrhoea acuta, vel

Medorrh.  
chron.

male tractata, vel ob diætae erroris protracta, vel pluries renovata, in sexu utroque, sub valido licet totius systematis robore, in chronicum ac rebelle frequenter mutatur profluvium. Ex sola urethrae virilis, per phlogosin prae viam quamcunque, inducta, certis in locis, *angustia*, — post istam, urinae albidantis, vel calli comprimentis a stimulo, chronica medorrhoea provocatur. Ex *ulcere* interdum, licet rarius, profluvii istius origo est. Quae vim uteri vel maxime infringunt, ac majorem hac in parte sensibilitatem relinquunt, abortus, partus praematurus, difficilis, aut in tenera aetate sibi nimis vicinus ac frequens, placentae extractio violenta, veneris abusus, masturbatio, haemorrhagiae uterinae, aut vasorum hujus visceris, a menstruis suppressis, nimia dilatatio, potissimam chronicae medorrhoeae causam largiuntur. Sed nihil sensibilitatis perversae hoc in morbo actionem tam manifeste, quam fluoris albi, menstruorum instante, vel declinante periodo, incrementum, demonstrat. Hoc quidem phaenomenon, alii vasorum systematis uterini sanguineorum in uterum patentium, auctae tunc temporis, nec tamen sanguini transmittendo adhuc satis capaci diametro attribuunt; vix

autem aliam muci ex utero, vagina, quam ex sexus utriusque urethra, eodem certe sub morbo stillantis, suspicamur esse originem; nec tam *mucosae*, quam *puriformis* est indolis, quae hic funditur, ac levi sub phlogosi, menstruorum impulsu in foeminis periodice renovata, ex integra partis affectae superficie *secernitur*, non ex sanguine, jam *facta*, *propellitur materia*. Hinc ex stimuli augmento, quod menstrua periodus ad uterum inducit, chronicae hoc in sexu medorrhoeae periodicum incrementum, — nec aliter, quam illud, quod ex coena lautiori, ex potu spirituosio, ex solo corporis exercitio majori, ex repetito concubitu, utroque in sexu aequaliter succedit, derivandum est. Eodem fere modo depositum ad uterum non gravidum, ad vaginam, urethram, vel ad anum, acre rheumaticum, herpeticum, scrophulosum, vel aliud, si visceris debilitas praecesserit, aut morbi diuturnitate inducta sit, rebelles ex istis fluxus, qui stimulante alias in partes coniecta materia, illico dissipantur, ac aliorum haud raro *crisin* morborum sistunt, inducit. Hinc ex dispersis, ut diximus ( §. 514 ), coryza, catarrho bronchiorum, vel et asthmate, impetigine, ulceribus chronicis,



sudore pedum, axillarum, sat saepe medorrhoea in foeminis, — et hac ipsa, cum repellentibus, incaute suppressa, vel pristina iterum salutis incommoda, vel pejora, nascuntur. Quae vero sanguinem copiosius, quam par est, ad uterum cogunt, vel alliciunt, et congestionibus hoc ad viscus viam sternunt: ea, vasorum his in partibus tonum infringunt, ac sensibilitatis simul morbosae rationes adaugent. Huc spectant imprimis vestes, seu thoraces, quibus foeminae a tenera juventute utuntur, arctiores: ut quorum actione mechanica, cruor, corporis superficie sat ampla, et visceribus pectoris, abdominis, non parum compressis, pelvis ad vasa nimis urgetur; lectio librorum libidinem excitantium, praematura matrimonia, negatum uteris fertilibus conceptionis partusque, salutare quamplurimis, officium, — crurum, genitalium noxius, per *carbones* accensos, vel et *turbam*, ut vocant, infensam nervis uteri mephitim spirantes, suppositos, vel per balnea tepida fatus frequentior, — arcta nimis, aut rarius renovata fasciarum, quibus menstruo sub fluxu genitalia circumdant, applicatio, ac sanguinis in vagina collectio, stagnatio, — cruoris, a puerperio, natura sic

jubente, ad *mammæ* ruentis, lactisque fontes aperientis, violenta, in pueros inhumana, his a glandulis aversio, et ad uterum, his, lege consensus, adeo affinem, a partu viribus exhaustum, revulsio, — lochiorum major, hoc ipso denegatae lactationis ab opere inducta copia, diurnitas, — partus partum insequentis, pendens iterum hoc ipso a vitioso conamine, nec igitur civium numero favens acceleratio, — remediorum, quae *emenagoga* dixerunt, aloeticorum, irritantium abusus, — uteri, vaginae descensus, prolapsus, — pessariorum, ob ipsa hæc mala, gestatio diuturna. Sed imprimis vestium muliebrium, quibus hiberno sub gelu fere iisdem, ac sub fervida aestate, utuntur, tenuitas, et crurum, regionis uterinae ab aura frigidiori, *caligarum*, quibus *Asiae* mitioris foeminae prudenter utuntur, defectu, neglecta custodia, reprobandae hic veniunt. A cutanea transpiratione suppressa, nisi renes mox suppleant, diarrhoea frequenter descendit; ac sub uteri systemate jam infracto, facilis est serosi ac suspecti humoris hanc ad partem conversio. Non raro ex frigore genitalibus admisso, fluor albus, quasi verus *vaginae catarrhus* inducitur: qui, saepius repetitus, chro-

nicæ medorrhoeæ excitandæ non est impar. Interdum et aliæ hunc morbum causæ, spinæ vitia lumbalis, ac istius, vel et uterinæ regionis, contusio, concussio violens ab ictu, casu, quibus uteri quaedam, ut aliis a causis, *paresis* inducitur, inferre videntur.

De profluvii puriformis ex ani vitio locali pendentis causis jam diximus (§. 530.), *Hæmorrhoides*, ut vocant, *albae*, non ex vasis hoc nomine instructis, sed ex stimulo per varices inducto, ac per phlogosin intestini recti superficiei, ac folliculis mucosis hujus loci illato, propullulant. *Pollicaris* ab *ascaridis* numero majori ad rectum nidulante, frequenter hoc, stimulum, tenesmum, et augmentam muci puriformis secretionem experitur. A prægressa dysenteria diuturnus sæpe stimulus intestinum divexat, ac puriformis prolabitur materia.

Externam medorrhoeam (§. 531.), major genitalium, apud viros non minus, quam apud foeminas, imprimis a menstruis absolutis, impuritas, — in parvulis subinde *ascaridum pollicarium* ad vulvam ascensus, ac inducta ex istis continua irritatio, genuerunt.



§. 534. Varii, quos magna jam parte ex Prognosis;  
posuimus ( §. 510. — 532. ), nec ab illis,  
qui alias inflammationes sequi noscuntur ( §.  
126. ) diversi, *medorrhoeae acutae* sunt exitus.  
Frequentissime haec ipsa *resolvitur*; aut in  
fluxum pertinacem, contagio carentem, seu  
*chronicam medorrhoeam*, convertitur. Rarior  
*suppurationis*, nisi male tractati, neglecti, hu-  
jus morbi, eventus est; ac licet illa sequa-  
tur, nisi virus *venereum* inflammationem ge-  
neraverit; hujus indolem nequaquam sponte  
assumet. Interdum, quamvis rarius hoc fiat,  
sub stadio *medorrhoeae inflammatoriae*, quod  
in genere majoris hoc in morbo significatio-  
nis est, accedente inprimis novo, ex spiri-  
tuosis assumtis, ex celebrato concubitu, ma-  
sturbationis commisso vitio, alioque stimulo  
fortiori, *gangraena* penis succedit. Quae, in-  
flammationis ob summam violentiam, fere *sicca*  
est, urethrae affectio: ea, majori, quam  
si plurimum efflueret, periculo stipatur; sed  
*siccam* conspeximus, licet valde ardentem,  
per sex fere hebdomadas extensam, quam  
nulla periculi indicia circumdabant, *medor-*  
*rhoeam*. Non ideo, si multum puriformis,  
contagiosi liquoris ex urethra distillet, quod  
virus susceptum promptius *eliminetur*, — sed

quod minor inflammationis sit impetus, citius hic morbus absolvitur. Contagii principia, ab initio modo unica forsitan humoris infensi guttula, per urethrae ostium (ut seminis, a coitu cum muliere menstruâ correpta, sanguine, ipsa virili in urethra, tincti exempla docuerunt) suscepta, secretionem morbosam, qua idem contagium copiosius, quousque phlogosis continuat, evolvitur, inducit. Nec finem, quo cesset hoc ipsum, sat certum, nisi omnis jam in urina emittenda, vel ejuculando in semine calor et ardor urethrae disparuerit, erectiones violentae, dolentes, cessaverint, indicari, — nec humorem, qui effluere continuat, licet aliqua ex istis supersint, cum certitudine virulentiae accusari licebit. Non raro haec phlogosis urethram, maxime virilem, certis, pluribusque interdum in locis, inaequalem, duriorem, crassio-rem, et quasi callosam, cum diametri illius decremento, tortuosam relinquit. Hoc urethrae sub statu, lotium difficulter, aut tenui, ac in plures diviso rivo, aut guttatim, praemissa puriformis, et post locum obstructum collecti, liquoris portione, exprimitur. Nunc fere *continua* sunt haec obstacula, et certis temporibus, minora, post corporis exercitia

violenta, equitationem inprimis, ac potuum spirituosorum, veneris post abusum, majora, — nunc, *spasmodicae* magis naturae, in totum sat diu, ut videtur, sublata. Sub majori hunc ad canalem impedimento, urinae fluxus in universum, et cum vitae periculo, nisi citius auxilium feratur, supprimitur. Plerumque haec urethrae vitia post repetitas, licet minime fortiores, medorrhoeas, non modo ad *bulbum*, quo loco phlogosis primariae sedes haud fuerat; sed et plures post annos, comparent, et difficilem propriae originis explicationem efficiunt. Interim in multis, a medorrhoea acuta, frequentius, ut ex symptomatum silentio apparet, dissipata, nihilominus major urethrae sensibilitas, et in pristinos affectus, vel minoribus, ac minime contagiosis, ex causis, promptitudo se prodit: et sub ista, *phlogosis chronica*, vix dolens, et *occulta*, ut in oculis, ac ipsis in bronchiis apud dispositos ad phthisin homines, non rara est, frequentius, quam ipsi animadvertant aegroti, subesse, — per universum canalem ad bulbum, ipsamque ad prostatam, et collum vesicae, lente extendi, — telam cellularem, quae urethrae membranam mucosam exterius laxè circumdat, non mi-



nus, quam illam, quae vasa prostatae in glomerem coadunat, lymphæ coagulabili infarcire, - ac tandem callosam harum partium duritiem, non aliter, quam *chordam* a medorrhoea acuta relictam, *chronicam*, in aliis, inducere videtur. Hanc genesin, prompta semper loci penes callum haerentis, ad phlogoses natura confirmat, et abscessuum spatii illius, ac in prostata, mole saepius insigniter aucta, frequentia ostendit.

Spirrh. abs.  
prostat.

Haec *prostatae* a pluribus certe causis pendens, sed post multiplices medorrhoeas acutas, urethrales, licet multos ab illis post annos, apud *senes* frequentior, durities, ex eo, quod, vel uno, vel utroque ex latere, urethram distrahat, comprimaturque, fere perpetuas urinae difficultates, suppressiones frequentes, discrimine plenas vesicae nimis dilatatae paralyses, ac fere eadem, quam ex calculo vesicae, symptomata inducit. Portio hujus glandulae, quae ad urethrae ex vesica egressum, ac loco posteriori est posita, tumefacta, vesicam versus assurgit, hujus ostium obturat, atque, ut aliorum observatio, ac aliquae hoc in museo pathologico Ticinensi conservatae ex cadaveribus virorum vesicae docent, hujus visceris in cavum altius et ad

ovi anserini magnitudinem interdum, — ostii non modo egressum ex vesica, sed aliquando et descensum per uretheres in istam, praepeditura, — vel et ostii vesicalis, ne claudi quavis ex parte possit, et hinc simul urinae incontinentiam, productura, ascendit. Aliàs, uno ex latere magis tumida, scirrhusa *prostata*, vel et *seminalium vesicularum*, quos iterum hoc in *museo* utroque ex latere vesicae, magnos, possidemus, *scirrhi*, vesicam exterius ac lateraliter comprimendo, similes effectus producunt. Vel ad recti intestini confinia extensus glandulae tumor, docente cereolo, atque digito in anum immisso, sub perpetua in perinaeum pressione, ac sub tensione, dolore ad urethrae radicem constante, ingressu difficili, hoc ipsum coarctat, faecum has per vias descensum intercipit, vasorum haemorrhoidalium infarctus, tenesmus ac ani medorrhoeam rebellem creat. Crescunt hae miseriae, quotiescunque nova phlogosis tumori se jungit: qua saepe lenta suppuratio, abscessus hanc ad glandulam insignis, vel plures, minores excitantur. Hi abscessus omnem urinae defluxum nunc supprimunt; nunc, ostio vesicae distracto, homine nolente, partim effluere hanc sinunt;

nunc sponte vel in urethram, vel in rectum intestinum, vel in spatia huic ipsi et vesicae intermedia, vel per sinus fistulosos in perinaeum, aperti, licet lotio interdum pristinas per urethram vias aperiant, mox novo ichore repleti, pristina symptomata reducunt; vel, fistulis cum urethra, et cum ipso perinaeo, scroto, vel recto communicantibus, urinae simul et ichoris his ex partibus, apertura vel unica, vel multiplici, effluxum foedum, et gangraenas generantem, inducunt.

Coeterum, incerta est satis medorrhoeae acutae, vel mitis, vel fortioris, quoad morbi durationem exitumve, prognosis. Sub leviori phlogosi, diuturnior saepe medorrhoeae decursus, — sub paucioris materiae effluxu, major, ne ad urethram callosa succedat durities, metus est; ac saepe, qui parum sub initio urgebat, morbus aegrotantis, Medici, vel causae ignotae ex culpa, cum discrimine inopinato augetur; saepe alter, a principio ominosus, sub recta vivendi medendique ratione, brevi tempore fugatur. Sub optimo, ut apparet, rerum successu, timor est, ne *chronicam* hic fluxus, facile leviores per stimulos revocandus, naturam assumat. Apud foeminas, ob majorem sensibilitatem, laxio-



rem partium ob habitum, ob irritationem a menstruis periodicam, frequentius, quam in viris, haec ita succedunt. Constitutio corporis laxa, debilis, sensibilior, scrophulosa, vel alio ab acri frequentius vexati, adultiores jam homines, prae aliis, ex medorrhoea acuta, in chronicam labuntur.

Sub *chorda* ( §. 522. ), ubi penis validius erigitur, non rarum est, sanguinem ex urethra effluere: quo saepe profluvio, illud morbi symptoma quamplurimum imminuitur.

*Bubones* ex solo *consensu* venientes, resorptionem vix non ubique admittunt. Qui ex resorpta simplicis medorrhoeae materia ortum, *idiopathici*, sumserunt: hi, sine luis periculo, resolvi queunt; ac si forte suppurent, non aliter, quam abscessus in parte glandulari, qui lentiolem quidem, pro ratione inflammationis, sed felicem plerumque curationem admittunt, considerari merentur. Difficilioris curationis est, qui cum scorbutica, scrophulosa diatesi incedit, ac facile in ulcus mali moris mutatur, bubo. Quem ulcera venerea, non ob solum consensum, sed, paulo tardius, *idiopathicum*, produciunt, bubo, hic luem certe indicat, ac inducit veneream. *Secundarium*, ex lue confirmata ve-

Bubon:

nientem, sine ulcere pudendi, bubonem non vidimus. Bubones, qui resolvi, suppurare recusant, *scirrhosam* aliquando, remediis rebellem, — et hoc rerum sub statu, interdum malignam, *carcinomaticam*, sub cruris, cui respondent, tumore aquoso, motusque jactura, indolem assumunt. Similia ad *testes*, sub medorrhoea acuta, ad epididymem inprimis, inflammatos, nec benigna, saepe lenta, resolutione liberatos, in quibusdam contingunt, tumorque scirrhosus interdum funiculum spermaticum fere integrum infestat. Quibus semel, ex medorrhoea acuta, testes tumuerunt; his facilius ex novo contagio hae partes inflammantur. An cum jure sit dictum, testiculorum ex hoc contagio duritiem in *carcinoma nunquam* abire: de hoc quidem dubitamus; sed exemplis sat certis, ac propriis destituti, contrarium defendere non possumus. Febre *nervosa*, lethali, vetustum testiculi tumorem fere integre disparuisse, observatio habetur. De *phimosi*, *paraphimosi* periculis jam satis monuimus (§§. 525. 526.). Concretio praeputii cum glande, in prima existis, lubenter succedit, ac penis erectionem, concubitum fere impedit. Factam interim, a tribus jam septimanis, praeputii concretionem

cum

tum parte glandis laterali, per injectiones, solvere nobis licuit. Utroque in malo, praeputii, — in paraphimosi, ipsius etiam glandis, gangraena timenda, et ex maculis sublividis, nigris, ex vesiculis sero similis coloris turgescantibus, praevidenda est. Rarior est, sed exemplis non caret, bubonis in *gangraenam*, quam haemorrhagiae subinde praecedunt, comitantur, mutatio.

Difficilioris curationis est *chronica*, tum Med. chron  
illa, quae ex acuta, contagiosa, descendit, tum altera, quae *fluoris albi*, apud foeminas, sub nomine venit (§. 532.), ac *habitualis* jam reddita est, *medorrhoea*. Augetur difficultas, cum, praeter pudendi laxitatem, sensibilitatem morbosas, — vel totius languor systematis, atque prona in spasmodicos affectus dispositio, — vel scrophulosa, scorbutica, arthritica, rheumatica, impetiginosa constitutio accedat. Si forsitan vitium organicum, si polypus, recisionem non admittens, aut si major arte humana scirrhus uteri, recti intestini, vel prostatae, stimulo, compressione, pudendorum secretionem morbosam inducant: tunc prognosis illorum, et illam chronicae medorrhoeae, plerumque infaustam, constituit. Praeter frequentem mulierum haec



profluvio laborantium *sterilitatem*, si forsitan conceperint, frequentes, ex causis non magnis, *abortus* patiuntur. Quae urethrae ex callo, angustatione, popullulat; — haec, chirurgicis auxiliis, novae inflammationis, et aucti effluxus beneficio, dissipata duritie, interdum dissipatur medorrhoea. Non parva interim profluvii, licet morborum, cui natura jam dudum assuevit, habenda est ratio; atque eodem, citius, quam par est, per artem suppresso, frequenter incommoda salutis majora, ut videtur, non ex ipsa, cessantis tunc, effluxus materia, alias in partes deposita, — sed stimuli assueti, cum parte alia, affluente, communicati, ignotas ad leges (§. 374.) nascuntur. Hinc variis a morbis foeminas, medorrhoeae hac a specie *praeservari*, tum hoc quidem sensu, tum eo, quod latens morbi alterius materies ad uteros ferri consueti, profluvium hic excitet, minus illo incommodum, — vel quod causae morbi antiqui, quasi per *fonticulum*, pars aliqua quotidie diffletur, non ubique tam absurde a vulgo contenditur. Non rarum est, diuturnae medorrhoeae difficilem vaginae, vel uteri ipsius *prolapsum*, — ac tandem plenas discrimine *cruoris* hoc e viscere *jacturas* accedere.

§. 335. Cura medorrhoeae, in genere, a Cura generis  
causarum, sedis, temporis, symptomatum  
ratione dirigitur. Desideranda, nec ficta pie-  
tate arcenda forent, si certiora, quae conta-  
giorum medorrhoeae, vel et luis ipsius, po-  
tentiam delerent, nossemus, auxilia. Res, in  
*Europa*, sub tanto Populorum cum Exteris  
commercio, perardua, nec legum subjecta  
imperio esse videtur proposita a quibusdam,  
sed soli forsitan tempori reservata, utriusque  
veneni *destructio*. Major interim in illas,  
quae corpore quaestum in Republica faciunt,  
Magistratus attentio, — Virorum, qui uxo-  
rem, quam possent, ducere recusant, mino-  
rem in Civitatibus ad numerum reductio, —  
subministrata celeriter infectis, tacita, et gra-  
tuita, pro miseris, subsidia, infaustos virus  
tam late diffusi per Provincias progressus ubi-  
que non parum fraenarent. Quod ab impuro  
concubitu contagium utrumque certius aver-  
tat, vel, susceptum, mox corrigat, deleat.  
que, adhuc quaeritur remedium; summa in-  
terim partis contagio expositae, nec protracta  
in longum, mundities, et genitalium, ad ul-  
timos recessus, cum liquido, ne tempus per-  
datur, quocunque, imprimis cum sapone,  
purgatio, vel instituta, illius sub defectu,

cum pulvere quovis absorbente aspersio, — lotii, mox a concubitu suspecto emissio, — cauta tepidae, vel aquae calcis, in urethram, vaginam, injectio, pericula quodammodo imminuunt. Securos non reddit viros, muliebrium, attentum licet, cum ad vaginam hoc extendi non queat, examen. Illorum urethra, vel sponte, vel antea compressa, si dolorem manifestet, aut ploret, si rubeat ad ostium, nisi morbi alii, contagii insontes, forte praecesserint; concedendi amplexus id satis indicabit pericula. Post praevium, qui suspectus est, congressum, quin justum symptomata timorem adhucdum confirment, ab omni tamen cum sanis intimiore commercio, quod adhaerens pudendis externis, internis, virus, sine hominis infecti morbo evidenti, sese facile communicet, abstinere oportet. Coeterum ab illis, quae universum systema, vel imprimis quae pudenda stimulare, quae sanguinis ad ista affluxum provocare, vel quae urinae acrimoniam augere possent, sibi caveant aegroti. Necessaria in viris est testium, seu scroti, mox a morbi initio, suspensio. Frequentius humor, qui effluit, vel, sub longiori, et angusto praeputio collectus, id ipsum, vel glandem stimulat, exulcerat, tepido cum lacte abluatur, vel injecto simili,



vel aquoso liquore educatur oportet. Decubitus in dorsum mollior, pollutiones in viris nocturnas excitare, — in foeminis, virulenti, corrosivi humoris defluxum ad anum, cum damno dirigere consuevit. Positio coxarum declivis, materiae, supino corporis sub situ, in vagina stagnantis, effluxum promovebit.

§. 536. Nullibi auxiliorum tam ferax est, C. med. ac. quam ubi morbi vel *sponte*, qualicunque, non prorsus contraria, sub methodo, solvuntur, Scriptorum ingenium; atque hinc tantae in medorrhoea, de qua loquimur, curanda, — quin ideo morbi magis pateat indoles, aut quibus certo ille vix indiget, divitiae! Quam, *venereo* sine ulcere, contagium induxit, — ea, sub recta vivendi ratione, non minus, ac aliae, quas insons forte stimulus invexit, medicae sine artis subsidio, vel a sola natura, perfecte, quin *lues* timenda sit, vel in plurimis, persanatur *acuta medorrhoea*. Prout virus istius natura, — sic et verum, quo extingui mox posset, antidotum, nos latet; et quae forsitan, primis a concubitu suspecto diebus instituta, medorrhoeam illico et in cunabulis jugulasse legitur, — ea, vel modo animi, ob suscepti

contagii timorem agitati, ac, ut sibi facile persuadet, jam sensu pruritus, caloris in urethra, vagina, multati, curas demulsisse, — vel, quaecunque demum fuerit, saepe magis venenum his e canalibus *eluisse*, quam in istis *subegisse*, *suffocasse* videtur, *injectio*. Non raro nimios illorum, qui se in contagii pericula incurrisse accusant, timores nutriendo, vel methodi adhibitae laudes immodicas decantando, — si non lucri cupedinis, aviditatis, — saltem levitatis, inscitiae, suspicio movetur. Sunt interim aliqua, nec certe spernenda, quae fortiora mitigare medorrhoeae symptomata, quae pericula avertere, et quae saepe breviorum morbi decursum reddere queant, artis praesidia.

Praeter illa scilicet, quae a suspecto concubitu facienda, evitanda esse docuimus (§. 535.), oportet nimiam partis a viru, aut alio a stimulo correptae, irritationem, inflammationem, et, quae ex vitio locali, vel alibi per solum consensum descendunt, symptomata compesci; oportet morbi effectus, qui chronicam inducere medorrhoeam minantur, praeverti.

Per injectiones.

Quamprimum igitur, stadii, quo morbus hominem ex contagio *invadit* (§. 521.),

symptomata comparent, non pauci, et eximii inter hos Viri, praeditos virtute, aut *stimulante*, aut parvis infectae mucum *solvente*, aut nervorum illius sensum *obtundente*, aut denique irritatam ejusdem superficiem *defendente*, liquores, per siphonem huic operi idoneum, tepide, frequenter, et caute injiciendos praescribunt. Ut, quid nos ipsi sentiamus, fateamur, quaecunque sub *acutae medorrhoeae* principio, et inflammatorio sub stadio, in urethram pelluntur, res, ejusdem a sensu naturali alienae, — licet sapor id linguae haud indicet, irritantium effectus hic edunt; ac nulla, quam intensiois ad gradum, intercedit differentia. *Stimulantium* usus, aut hypothese, qua, per auctam ab illis mucii secretionem, et nunc demum contagium posse abluui, expelli, — aut alteri, qua factam a viru irritationem huic propriam, per aliam, ab ista diversam, posse protinus deleri, sibi promittunt, innititur. Quid de virus suscepti, per auctum ex urethra effluvium, *eliminatione* sentiendum sit, jam supra ( §. 534. ) docuimus; et quamvis facta per artem *secundaria* irritatio, *primariam* interdum posse auferre videatur ( §. 375. ); vix tamen hoc ipsum in casu suscepti indomabilis *contagii*, locum



inveniet. Vel ipsi hujus methodi fautores, irritationem artificialem, nimis exiguam, vix agere, — majorem, quam par sit, nocere fatentur. Quis igitur, sub tanta sensus in urethra, sub diversis temporis intervallis, inconstantia, — sub tanta in variis hominibus irritabilitatis urethralis differentia, vel praescribendae arbitrio *formulae*, vel solius, quae idem non eodem semper modo sapit, *linguae* judicio, irritationis gradum faciendae sat certo docebit? Quis impetum, quo liquorem in urethram propelli deceat, ac illius quantitatem, vel satis ut penetret, vel ne stimulo nimis aucto officiat, probabili conjectura indicabit? Quis curationis, vel a chirurgo, rerum satis experto, labore per horas repetendo, absolvendae, patentia in vulgum, incommoda, — vel si res ipsis, tam variis, aegrotis committatur, laesionis pericula, incensum non vocabit? Quis denique tempus, quo ab injectione, vel inutili, vel noxia, oporteat desisti, sat aequè definiet? Plura tamen, hunc in finem, pro injectione, adhibita fuerunt: inter quae, praecipuae sunt, solutiones vitrioli martis, cupri, zinci, aeruginis, ammoniaci salis, olei terebinthinae, balsami alterius. Ex mercurio, variis sub formis

injecto, aliqui efficaciam, quam nec ipsa *in-  
lue*, nisi jamjam evoluta, agnoscit, *specificam*,  
quaesiverunt. Qui virus venereum a *mucositate*  
perpetuo involvi, vel aliter, contagii poten-  
tiam deponere contendunt: hi certe, suppo-  
sita etiam Venerea medorrhoeae communis  
natura, veneni in superficiem folliculosam  
*effectum*, pro *causa* habuerunt. Nec *acida* ve-  
neri virus indoles sat firmis argumentis, ut  
ex *alcali* caustico, ex lapidis caustici, vel  
demum aquae calcis ex usu, quae utrumque  
in finem adhibent, spes magna virtutis afful-  
geat, innititur. Qui artem destruendo con-  
tagio imparem agnoscunt: hi saltem nervos  
urethrae, vaginae, ut minus sentiant, cum  
calcis plumbi, ex aceto solutae, — vel opii,  
aqua distillata dilutorum auxilio, obtundere  
satagunt; et conspecta, istius inprimis, in  
chronica ophtalmitide virtus (§. 154.), huic  
satis opinioni suffragatur; sed in *acuta me-  
dorrhoea*, vix aliter opium, quam stimulum  
augendo, operatur; atque tam parum ex re-  
medio, in urethram injecto, hic loci, vel  
tempore brevissimo, retinetur: ut liquori in-  
jecto, quae interdum hunc sequitur, sympto-  
matum mutatio, vix queat adscribi. Qui  
urethram defendit mucus, hic alio vix un-

quam, sine stimulo manifesto, suppletur, viscoso, quod vix penetrat, aut satis urethram oblnit, medicamine.

Quae interim hucusque injectionibus opposuimus dubia: ea, ad negandas clarorum Virorum experientias nequaquam movemus. Nostrum sat raro ab aegrotis, sub primis *medorrhoeae acutae*, jam certe praesentis, initiis, expetitur auxilium; et quoties hoc ipsum novae methodo favebat: toties, quod coeterarum nos phlogosium cum injectionibus tractatarum analogia docere debuisset, poenituit consilii. Sed ut cautos vos reddere, ut nimios multorum hoc in morbo, tam communi, curando ausus, quoad rationes id possunt, fraenare, daretur; *experientiae*, ad quam toties, qui experiundi scientia haud pollent, appellant, in medicina fallacias et hic morbi tetigisse, non credidimus inutile.

C. exspect.

Nos igitur, qui *tutiores*, quodammodo licet longiorem, *breviori*, sed facile ancipiti, curationem praeferrimus, acutam sibi ipsi relinquimus, medorrhoeam; ac modo symptomata istius, si forsitan nimis urgeant, moderari curamus. Ad victum quod pertinet, modo febris si desit, consuetum, sed a rebus irritantibus, aut difficulter subigendis alienum



concedimus. Quae sale abundant, ea, quod urinae ardorem mox augeant, evitari oportet. Pro potu, aquam, eamque, ne pauca, et hinc acrior, urina urethram offendat, sat multam, propinamus; sed nimia, aut gravi stomacho mucilagine saturata, quod haec, in sanguine mutata, ad urethram non veniat, potulenta reprobamus. Si vino assuetus sit aeger, nec multum irritabilis videatur, nec febricitet; hoc ipsum, portione moderata, ad prandium, concedimus. Alvum, nisi sponte apertam, clystere emolliente quotidie movemus. A motu fortiori, equitatu, saltatione, contrectatione, refrigerio, compressione genitalium, a lecto molliori, a sexus alterius, lasciviam excitante, consortio, ab animi pathemate majori, abstineant aegroti. Effluentem ex urethra materiam cum tepida, aut lacte subcalido, frequentius abluant; aut, quibus longius, angustius praeputium impedimento est, injectione, qua et mulier vaginam repurget, simplicissima, bis, terve in die, utantur. Urinam, nisi satis recollectam, quam minus frequenter id possint, emittant.

Si febris accedat, et, in homine robusto, plethorico, inflammatoriae naturam assumat; detracto mox vino, et ciborum quantitate ac

indole mutatis, venaesectio, antiphlogistica sine sale aut nitro, tamarindorum decoctum, indicantur; sed rarior istius, sub dicto regimine, necessitas, — ac in corpore debili, gracilique, manifesta satis a sanguine detracto damna, sensibilitatis adauctae effectus, comparebunt. Sub magnis pudendorum tensione, calore, dolore, cataplasma anodinum cum laudani portione, vel et balnea tepida, tum corporis dimidii, tum inprimis localia ex lacte, vel malvae decocto, usurpentur frequentius. Si ob spasmi magis, quam inflammationis vehementiam, ex urethra nil effluat; ex *opio* medicina petenda est. Si major verendorum inflammatio id jubeat; hirudines, peni, ad locum dolentem, ad perinaeum, vel ad labra muliebria ponantur. Saepe interim has turbas, erectiones dolentes, spasmodicas, pene quidquam ad inferiore depresso, *opium*, ad noctem porrectum, — ac si corporis debilitas, sensibilitas morbosa subesse videantur; si tenuis ac diaphana materies ex urethra distillet, ac pulsus frequentes, contracti tangantur; corticis peruviani decoctum, cum tincturae thebaicae portione, dissipabunt. Interdum clyster emolliens cum *opio* injectus quam optime conducit. Fortiora alvum hoc

in morbo purgantia, quae urinae difficultatem, ac singula symptomata mox augent, eane pejus fugienda sunt.

§. 537. Nec aliter symptomata, quae sub Chordae. stadio medorrhoeae inflammatorio emergunt, praepediri, tractari merentur. Ad penem incurvum ( §. 522. ), cataplasma emolliens, hirudines ponenda sunt, vel et opium liberaliter interne porrectum conducet. Sub dolente ac violenta penis erectione, *priapismo*, princeps in *opio* est positum remedium.

§. 538. In bubone ( §. 523. ), cui *ulcus* Bubone *venereum* non subest, curando, ad stimuli, quo inducitur, indolem respiciendum, et hic ipse tollendus est. Suppuratio tumoris glandulosi, ut inutilis, taediosa, ac foedam cicatricem inducens, quovis modo praecavenda, et bubonis *resolutio* tentanda sunt. Si fortior ad urethram inflammatio hunc generet; tunc illi, ad methodum praescriptam ( §. 536. ), succurendum est. Si forte spasmodica ad urethram affectio stimulum cum inguine communicat; tunc ea, quae ad istum commendavimus ( §. cit. ), in subsidium vocentur. Si forsitan suppressus ex urethra, vagina,



materiae effluxus, hoc malum induxerit; tunc, suppressionis pro causa, vel inflammatio in illis arcenda, vel spasmus tollendus, vel ope cereoli, pessarii, secretiones morbosae revocandae sunt. Sub incipiente glandularum inguinalium affectu, praemissis praemittendis, rasisque hac in parte pilis, frigidam applicari conducet. Sub inflammatione jam provecta, fortiori, si venae sectio instituta sit, aut minus indicetur, hirudines parti bubonibus vicinae applicandae sunt; vel cutis tensa ac rubra scarificanda est leviter. Post haec auxilia, mitiori sub malo superflua, cataplasma ex lacte et pane, nec tamen nimis calidum, sub die, — ad noctem vero, ob metum refrigerii, emplastrum gummosum, continuo tumori imponenda sunt. Sub vehementi, spasmodicoque dolore, folia hyosciami, cicutae, in pulvere, aut opium cataplasmati jungenda sunt; ac ad noctem ex opio medicina portigenda est. Ab *emeticis*, in bubonum curatione, ut in aliis inflammationum speciebus, licet aliqui laudaverint, abstinemus. Nec *unguento mercuriali*, quod cruris, quo ex latere bubo est, parti internae illiniunt, sed quod modo venereae metus infectionis adhiberi consuluit, hic opus

est. Si tamen, sub tardiori bubonis, vix calentis ac rubri, ingressu, aliquo, ad promovendam resolutionem, stimulo indigere videamur; tunc linimentum volatile, vel mercuriale, quod hic specificè non aget, unguentum, possunt indicari; sed facilius hunc finem, victus abundantioris, vini concessi, et levis frictionis ad inguen institutae, decocti corticis beneficio obtineri licebit. Interdum, quod et nos conspeximus, vicina bubonis suppuratio, ac purulentæ fluctuatio materiae jam tactu distingui videtur; quae tamen signa, quin tumor felicissime resolvatur, subinde haud impediunt.

Si bubonis *suppuratio* evitari non queat; in ea rite pertractanda, ad regulas (§. 134.) praescriptas respiciendum, et nunc vires totius systematis, vel modo partis, erigendae, nunc vero moderandae sunt. Lentior est supurationis in glandulis progressus; ac melius plerumque naturae, quam arti, nisi cutis tenacitas hoc jubeat, committitur abscessus divisio. Tunc vero vel ferro, vel causticis haec fiat, modo plenam abscessus maturitatem acquisiverit, nil interest. Si pejor hic suppuratio sub aegrotantis debilitate, contingat: saepe cortex, vinum, lautior victus, —

vel, si dolor violens accedat, opium, huic remedio junctum, conducunt. Coeteras in abscessu, vel ulcere bubonis curando caute-  
las Chirurgia vos docet. *Mercurio*, ut specifico, hic nunquam, nisi *lues* simul, ex ulcere, accesserit, indigemus; sed in ulcere calloso et antiquo percurando, mercurius praecipitatus ruber, eidem inspersus, ac methodus confortans, meliora praestabunt.

Si *scirrhus* his in glandulis durities sequatur; tunc ad ea, quae ( §. 135. ) dicta sunt, ac alibi dicentur, spe felicitis eventus, eheu! non magna, descendimus. Nec tamen reliqua in quibusdam, a bubone resoluta, glandularum inguinalium *plenitudo* majorque *sensibilitas*, vel *dolor inconstans*, quae saepe victus lautior, chinae decoctum, unguentum volatile cum tinctura thebaica, maris balnea, dissipabunt, pro *scirrhus* imponant! *Carcinomatis* vix unquam sanationem, ad regulas, alia hujus operis in parte exponendas, impetramus. Rarior hic loci *gangraena*, praescriptas ( §. 136. ) ad leges tractanda est.

§. 539. *Epididymitis*, medorrhoeae acutae effectus ( §. 524. ), pro causae ac symptomatum ratione, diversam medendi methodum expo-



exposcit. Nunc enim febris haud magna, vix sanguinis missionem sibi exigit; nunc, mitis ab initio, post primos jam dies augetur, ac tam intensa fit: ut non una, sed plures interdum, venae sectiones reddantur necessariae. Jam sub praevia medorrhoea, testiculos suspendendi consilium dedimus (§. 535. ); interim stadio inflammationis cessante, testes sibi ipsis committi, in multis opportunum est. Qua ratione tumor scroti increscit, eo magis suspensorium relaxandum esse, ne compressio succedat, quivis facile intelliget. A motu quovis absterneat, ac in lecto supinus in dorsum decumbat aegrotus. In robustis, plethoricis hominibus, venae sectio, tumoris, ac doloris incremento majori praemittenda, — ac si vehemens tunc febris, cum pulsu pleno ac duro insurgat, ea ipsa aliquoties repetenda est; aut, si hoc minus necessarium videatur, hirudines decem vel quindecim scroto apponendae sunt. Sanguine, si ita videatur, detracto, mox a morbi principio frigidam aut puram, aut cum saccharo saturni remistam, circa scrotum continuo applicari, ac testes frequentius in illam demergi oportet. A camphorae spiritu cum extracto saturni et aqua remisto, scrotum in-

flammari conspeximus. Praeterea alvus clysteri solvenda, vel et blando, ex manna, tamarindis, medicamento movenda est. Cibi modo pauci, facilesque concedendi, spirituosae, calefacientia fugienda sunt. Si major ad urethram, perinaeum inflammatio simul urgeat; emollientia huic ipsi, quod frigida, confirmata jam phlogosis vix perferat, apponenda sunt. Si magis nervorum irritatio, ut vidimus, quam vera inflammatio, epidymidem ad consensum vocaverit: tunc *opium* ad noctem propinandum, vapores aromatici, ex sella perforata, ad scrotum, testiculis suspensis, dirigendi, ac inprimis clysteres, cum laudani portione fere dupla, liberato prius a faecibus intestino, injiciendi sunt. Vel in ipso, qui cum valida inflammatione inceserat, morbo, sanguine jam satis emisso, *opium*, sub reliquo in nervis stimulo, porrigatur. Sub majori jam testium tumore, duritie, dolore, et provecta jam nimis inflammatione, cataplasma emolliens, quod sub initio nocuisset, applicandum est. Mercuriale unguentum, quod plures hic scroto illiniunt, sine quovis effectum, nisi malo adhibuimus, et si aliis profuisse asseritur; hoc, minus remedio, quam morbo in resolutionem tam prono, ad-

scribendum videtur. Sub fortiori inflammatione, fluida circa testem collecta materia per tactum discerni videtur; sed licet manifestum et praemagnum, hac a causa, *hydrocelem acutam* conspexerimus (§. 524.); incauta tamen foret, ac facile gangraenam induceret tricuspidis hoc in casu administratio. Testiculum, ab incauto chirurgo, hydrocelis curationem cum tricuspide suscipiente, in medio perfossum, ac diras abinde convulsiones, inflammationem horrendam in *Bruchsaliensi* Nosocomio inducta, observavimus. Illa interim a regula, in viro ad Clinicum Institutum suscepto discessimus: cui, violento sub coitu, sanguis ex urethra copiosus prorupit; ac altera jam die tumor magnus sinistri accessit testiculi. Dolor ingens, tensio, figura ipsa tumoris, dysuria, singula, nobis, primo aspectu, morbi indolem celaverant. Cum vero manifestam in parte fluctuationem distinguere licuisset; sectionem tumoris institui curavimus. Effluxit humor copiosus, primum flavus, pellucidus, acris ac foetidus, mox vero puriformis albidaque materies. Nato posthinc ad *urinam* mittendam novo stimulo, haec ipsa, non per urethram, ut pridem pauca, sed ipsum per scroti vulnus multa,



effluxit. Hinc istud, ad locum usque, unde lotium, *lacerata* sub coitu ex *urethra*, in scroti telam cellulosa[m] descenderet, dilatatum, immisso urethrae cathetere flexibili, viginti fere dierum spatio sanatum fuit.

Medorrhoeam, ubi forsitan, *suppressa*, epidymidis inflammationem produxit, candelarum, et, ut aliqui proponunt, cereolorum novo *contagio infectorum*, in urethram, sub ipso inflammationis vigore, mittendorum auxilio restituere, inopportunum, damnosum esse putamus. Inflammationis in urethra *effectus* est, in multis, testiculorum inflammatio; illaque ipsa medorrhoeam non raro *exsiccatur*, non a suppressione profluvii inducitur, urethrae inflammatio. Cessante vero ad urethram phlogosi, si tumor testiculi continuet; cereolorum interdum cum fructu tentabitur applicatio. Vel a sola *angustiae* ad urethram, cum cereolis medela, ad testem tumor illico disparuit.

Si, quod rarum esse solet, *suppuratio* testiculum, aut vicina eidem integumenta, hoc ex morbo, prehendat; *luis* sine metu, in emollientis usu cataplasmatibus, donec pus mollior promineat, perseverandum, aut emplastrum ex gummatibus apponendum est. In

inflammatum, ex ictu sclopeti vicino, suppuratumque testiculum, sectione aperiri curavimus; ac licet pars magna substantiae, filiformis materiae sub specie, e vulnere exiverit; major tamen testiculi portio, matura sectione, salvata fuit. Suppuratio, quae, sub scroto, illaeso testiculo, contingit, a ferro brevi tempore curatur.

Suppuratione longe frequentior est, *epidymidis* non modo, sed et ipsius *testiculi*, ab inflammatione praegressa, *durities*; ex quo satis patebit: quod, si, ab initio non ipsum adeo testem inflammari sit verum; sub fine tamen morbi, res aliter se habeat; et phlogosis, et, pendens ex ista, lenta progressu, *durities*, tum illum, tum funiculum spermaticum, quam longe ad renes fere usque pertingit, non raro corripiat. Varias, et hoc gravi sub malo, methodos commendant Scriptores. Epidymidis *durities* saepe sponte dissiparet; aut, manens, pericula haud movet (§. 534.); ad testem conversa, difficilis curatu, et saepe nullo, melius, quam valide agente, irritante, et mali exitum forsitan in *carcinoma* praecipitante, remedio, suspensorio solum suffulta, tractatur *durities*. Quam alibi (§. 135.), sub inflammationis in du-

ritiem exitu, proposuimus, — haec et praesenti in casu, tentanda est methodus. Mercurius, stimulum, non raro scirrhis funestum, inducit; et nec specificè hic agere, nec, scroto, perinaeo inunctus, per vasa lymphatica in ipsum transire testiculum potest. Limentum volatile, unguentum cum camphora, atropae belladonnae, mandragorae radices, externe, — cicutae, aconiti extracta, interne, exterius, adhibita, ononidis spinosae, daphnis mezerii decoctum, gummi ammoniacum in aceto squillitico solutum, electricitatem, ac ipsos adeo cancrorum lapides, commendari, — sed malum nunquam ab istis superari, sat certo novimus. A scroti balneo, ex aqua cum opio remista, frequenter instituto, hoc ipsum dissipatum fuisse, experto a Viro percepimus. Num usus candelarum, medorrhoeam revocandi fine, in urethram missarum, ut alias, ex suppressione istius inductas aegritudines, sic et testiculorum aliquando duritiem dissolverit; de hoc, ex propriis decidere nequimus exemplis; nec aliquem, per novam medorrhoeam, ab eo testium affectu liberatum fuisse, unquam audivimus.



Si majorem jam molem ac duritiem testis acquisiverit, ac dolor lancinans eundem frequentius penetrare sentiatur; tunc certe testis mature suscipienda est amputatio. Si spermaticus simul, usque ad annulum, jam tumeat, ac durus percipiatur, funiculus; tunc, ob portionis istius, abdominalem supra annulum haerentis in malignam inflammationem, in carcinoma, vel in gangraenam abiturae, vel lethalis haemorrhagiae ob metum, peiori sub omine operatio suscipitur. Post *sarcomatis* testiculi, *recentis*, sectionem, ab illustri, ac versatissimo in chirurgicis Viro arteriam spermaticam, quae suo, necdum fracto, vi temporis, elatere, se citissime abdomen versus retraxerat, non potuisse ad annulum ligari; ac sanguinem copiosum exinde, lethali cum eventu, interna ad loca, prorupisse, exemplo nobis constat.

§. 540. In *phimosi* ( §. 525. ), quae ut C. phimosis. medorrhoeae acutae symptoma incedit, curanda, tum penis ipsa corona, tum praeputium, ita, ut hoc, super glande reduci queat, praeparanda sunt; hinc impeditae reductionis ad causas probe respiciatur, oportet. Sursum coles ad ventrem, si modo profluvii ex ure-

etiam hoc sub situ difficultas non impediat, deligandus, motusque corporis evitandus est. Si febris, pulsusque pleni ac duri simul adsint: venaesectio, pro necessitate repetenda, hirudines, ac methodus debilitans, clysteres indicantur; nec major praeputii, quae raro hic sese manifestat, *rubedo* exspectanda est. Post venam sectam, cum satis recens est inflammatio, *frigidam* eidem, vel solam, vel cum aceto, saccharo saturni, conjunctam applicari, saepiusque renovari oportet. Sub majori jam et fere phlegmonoso praeputii tumore, tensione, fomentatio, vel balnea penis continua, tepida cum lacte, decocto malvae, cataplasmata anodina, sat mollia, praefenda sunt. Lac tepidum, decoctum hordei, vel malvae, emulsionem arabicam, dilutam, ut glandis, praeputii superficiem probe abluant, concretionem impedian, sine impetu, frequenter injici nunc competit. Phimosis sub fine, si tumor praeputii *oedematosus* supersit, aluminis solutio applicata conducit. Praeputii, quam aliqui hoc in casu instituunt, sectionem, ob non pauca pericula, ob deformitatem perpetuam, et congressus impedimenta futura, vix unquam, — ac certe minus, si ipsa *gangraena* accesserit, ad-

mittendam esse censemus. Si forte, ablata jam praeputii phlogosi, ulcera sub illo haerere videantur; tunc mercuri sublimati grana aliquot, in aqua distillata soluta, ter, quaterve in die, injiciantur; vel si longioris callositas praeputii extremum ad limbum, ne reduci hoc possit, impediat; hujus partem velamenti *circumcidi* juvabit. In *phimosi chronica*, cum tumore praeputii, scarificatio istius frequens, moderata, obstacula solvit.

§. 541. *Paraphimosis* ( §. 526. ) ad curam quod spectat, in ea, ne penis stranguletur, et glandem a gangraena mox corripientem amittat, ne lotii quaevis supprimatur excretio, festinandum est. Coles igitur, erectus, ad glandem, a manu, cui nivem, aut glaciem subtiliter contusam imposuimus, aliquomodo comprimendus, — vel saltem frigidae cum glacie, et saturni extracto remissae, immittendus est; quo saepe praesidio praeputium super glandem posse protrahi, contingit. Si spasmodica magis constrictio esse videatur; ad *opium*, sine mora, veniendum est. Si res minus succedat; tunc, ad regulas chirurgicas, praeputium, sine mora, quot in annulos post glandem vitiose con-

C. paraph.



tractum est, ne corpus cavernosum unum vel alterum laedatur, ac tumori *varicoso*, concubitum impediendi, locus sternatur, incidendum est. Si forte glandem gangraena prehenderit: haec raro cavernosa ad corpora, firmiori tegumento celluloso instructa, penetrabit; sed vel sponte, vel facili negotio, glans tota separabitur. Hoc praestito, ne urethra, ut docuit exemplum, concreseat, per fistulam eidem immissam, cavendum est. Interim gangraena, paraphimosin sequente, ac partem cellulosa, quae corpora cavernosa investit, consumente, penis *chronica curvatura* originem aliquando agnovit. In *chronica*, mitiori scilicet, *paraphimosi*, ut ipsa in phimosi (§. 540.) scarificationes praeputii conducunt.

C. stad.  
relaxat.

§. 542. Consideratis stadii medorrhoeae inflammatorii symptomatis (§§. 537. — 541.), ad illius, quod *relaxationis* appellavimus (§. 528.), curam descendimus. Haec vero in plurimis ab ipsa natura absolvitur. Nunc igitur, si quid de solito, illinc, victu detra-ximus, vel si, ob febris praesentiam, anti-phlogisticis, ac potui paulo magis indulsumus; sub fuga veneris in longum tempus conti-

nuanda, diactae rigorem, pro gradu stimuli minoris, imminui, ac methodo debilitanti, ne *chronicam* profluvium hoc indolem, quod in foeminis, prae viris, timemus, assumat, renunciari oportet. Si totius debilitas systematis aut morbum praecesserit; aut, inquietas ob noctes, ob dolores violentos, ob victus tenuitatem, ob humoris mucosi jacturam, sequatur; tunc, ultimi sub fine hujus stadii, praeter cibos nutrientes, cum vini portione, liberius porrectos, ad corticis vel frigidum infusum, vel decoctum ascendimus. Sed plures, hoc a morbo, *localis* modo, in genitalibus, *debilitatis*, *laxitatis*, *sensibilitatis* morbo, sae reliquiis, laborant; atque hinc localibus magis, vel solis, vel corroborantibus universum systema superadditis, remediis indigebunt. Per gradus igitur ad ista veniendum, genitalia frequenter cum frigida, in viris lavanda, in foeminis, simul eluenda sunt. Si longius, quam par est, profluvium continuet; *injectio* in urethram, vaginam, aquae calcis recenter paratae, solutionis cum opio, vel solius ( N. LXIII. ), vel superaddito saccharo saturni ( N. LXIV. ), nunc utique tentari sine ullo discrimine potest; qua certe sub methodo, brevem in sat multis, — nec tam

longum in aliis, morbum sistit medorrhoea; ac praecipitis non incurrimus curae pericula.

Ex ulcere *venereo* pendentem medorrhoeam, vel cum, *luem* adesse, symptomata testentur, adhibito mercurio, ut hanc ipsam, — et quod reliquum est, exposita vix methodo, tractamus.

C. med.  
foem.

§. 543. *Vaginali acutae* ( §. 529. ), non alia, quam *urethrali* utroque in sexu ( §§. 535. 536. 538. 542. ) *medorrhoeae*, medendi est methodus. Tepida semicupia in foeminis majorem, quam in viris, in stimulo frangendo, utilitatem manifestant; ac potior est, vel sub ipso stadio inflammationis, injectio. num cum emollientibus, vel cum lacte, emulsione arabica in vaginam, sine impetu, factarum, quam in urethram, leniendi facultas. Venam tundendi rarior hoc sub morbo apud foeminas necessitas habetur; nec potius quantitas siti major, quod vaginam saturatior paulisper urina non allidat ac irriter, et quod major genitalia post emissam urinam lavandi concedatur facilitas, requiritur. Sed, ut communior, hoc in sexu, medorrhoeae acutae in *chronicam* est transitus; ita fere majorem *relaxationis*, in illa, quam *inflammationis*, sta-



dium, attentionem medicorum sibi exigit. Hinc sese lecto tunc temporis, sub majori corporis ac animi quiete, mulier committat; ac, si forte majores fluxum sanguinis nervorum turbæ comitari consuescant; has cum opii portione componat. Tardiori, a cessante jam phlogosi, medorrhoeae, cum externis ( §. 542. ) medendi, melior, absoluto a diebus jam tribus aut quatuor menstruo, habebitur occasio. Facile fortiolem *vagina*, quam urethra virorum, opii, vel sacchari saturni portionem admittet. Sat profunda sit, ac saepius in die, praemisso, cum aqua simplici vaginali clystere, instituatur, indicata adstringentis solutionis injectio: quam supino in situ mulier per aliquot minuta retinere conetur; appropinquante vero menstrua periodo prorsus omittat.

§. 544. Habito ad causas respectu, non aliter, quam acuta urethralis, vaginalis medorrhoea ( §§. 535. 536. 542. 543. ), tractandum est muci puriformis, ex *ani* locali affectu inductum profluvium. *Haemorrhoides mucosae*, ut vocant, easdem, quas sequenti *de sanguineis profluviis libro* trademus, ad regulas moderamur et sanamus. Similiter de

C. med.  
recti.

tenesmo, ac mucoso ex vermibus recti intestini profluvio, tum de illo, quod ipsam dysenteriam insequitur, aliuc sermonem transferimus. Si ex acri, vel a contagio, recti orificio admotis, irritatio ac phlogosis oritur; nisi ulcus venereum, quod specialem sibi curam exposcit, hic lateat; tunc, positis circa anum hirudinibus, vasorum repletionem moderari, alvum cum oleo assumpto laxam servari, ac, stimulo fortiori sublato, ex emulsione arabica injectiones institui oportet. Cesante jam phlogosi, et profluvio in longum decurrente, externa, quae in medorrhoea vaginali commendavimus (§. 543.), remedia adhibenda sunt. Foeminam cum felici curationis eventu tractavimus, quam, ex suppressa cum adstringentibus medorrhoea vaginali, impuro concubitu contracta, mox similia illi, ad anum symptomata, — et neglecto, a duodecim jam annis, feroci hoc incommodo, recti intestini indurati pertinacissima, et faecum, nisi diffluentium, excretionem protinus nunc impediens constrictio afflixerant. Frequentes, sed parvas, ex lactis cremore dulci, injectiones tepidas in anum institui, butyrum cacao eidem intrudi, posthinc vero agarici frustula praeparati, ac post

ista, cereolos sensim sensimque majores im-  
mitti curavimus, ac fere naturalem hac me-  
thodo habitum extremo intestino conciliare  
potuimus. Nec ad ipsam vaginam, inprimis  
vero externum ejusdem ad ostium, hujus exi-  
tus medorrhoeae, inprimis recidivae, cum  
ulceribus conjunctae, in duritiem parietum  
insensilem, ac virgineam angustiam, desunt  
exempla.

§. 545. Sub *externa medorrhoea* (§. 531.), C med. ex-  
tern.  
non seposita causae, quae morbum induxit,  
ratione, potissimum in munditie partis affe-  
ctae studium ponendum est. Hinc fatus aquo-  
si, demulcentes, emollientes locis a phlogosi  
correptis admovendi, ac similia, sub longiori  
praeputio, injicienda sunt. Dissipato cum  
istis stimulo, ad externa, quae robur infra-  
ctum restituant, majorem partis sensibilitatem  
corrigan, inprimis ad ea, quae (§. 542.)  
adduximus, fortiora paulisper, remedia ma-  
turius pervenimus.

§. 546. Qua ratione *chronica*, ex acuta  
descendens medorrhoea (§. 532.), praeca  
C. med.  
chron.  
venda, curanda sit, partim jam diximus (§§.  
542. — 545.). Quodsi proposita jam metho-



Ex ulcere.

do superius esse malum, docuerit eventus; tunc potissimum, an *ulcus*, vel, cum rarissime hoc adsit, exulceratio superficialis, in urethra lateat, inquirendum est (§. 533.). Est interim sua et huic rerum aspectui fallacia; et exquisitam, longamque saepe locus sub *medorrhoea* acuta affectus, sine ulceris praesentia, sensibilitatem, ut novimus, conservat; nec aut puris, ichoris, ab humore *puriformi*, in cryptis urethrae mucosis stagnante, tam facilis est distinctio; aut sanguinis paucillum in illo conspectum, continui laesionem sat certo confirmat. Quodsi etiam de *ulcere* securos nos esse jubeat diagnosis; an *veneream*, seu malignam, hoc ipsum, an vero benignam modo indolem foveat, priusquam *luis* symptomata compareant, haud satis constat; vel, si forsitan constaret, *mercurialium* tamen usus internorum, nisi viru jam

Per inject. in corpore evoluto, proficius haud foret. Interim injectio mercurii corrosivi (N. LXV.), non quidem *specifici*, ut vocant, sed *ulcus* depurantis remedii virtutem promittit. Si hoc ipso, frigidae, vel ipsius glaciei, frequenter ac brevi tempore anteriorem ad urethram applicandae, per usum, molestum non cesset profluvium; tunc, aut spiritus vini rectificatus.

ficatus cum aquae sex vel septem partibus remistus, aut vitrioli solutio ( N. LXVI. ), vel et corticis quercûs junioris, ex diluto tandem ad saturatius veniendo, decoctum, aut lapidis caustici solutio ( N. LXVII. ), aut myrrhae liquamen, cum tinctura thebaica, saccharo saturni et aqua ( N. LXVIII. ), per longum satis tempus, sed majori sub cautela, adhiberi merentur. Interdum rhabarbarum, ad dosin, quae alvum vix moveat, vel et balsamus copaivae, terepinthina, apud viros, per quorum urethram remedii vis penetrat, exhibita fuerunt. Vel ipsa cantharidum tinctura, qua tamen vix uti, hoc in casu, vellemus, sine laude non fuit. In casu sensibilitatis ad urethram morbosae, potissimam ex *opii*, vel sola ( N. LXIII. ), vel juncta cum saccharo saturni ( N. LXIV. ) solutione, actionem speramus. Ab *internis*, hoc sub malo, nisi debilitas universalis subesse videatur, expectari effectus haud potest. *Olibani*, hoc sub statu laudati, experimentum hucusque non fecimus.

Nec minor est virtus *cereolorum*, vel et syringis ex resina elastica paratae, tam in casu, quo *ulcus* latere suspicamur, quam inprimis si laxitas urethrae, profluvii causam formare

videtur. Jam sola interdum *equitatio*, et inducta per istam moderata perinaei concussio, — vel et vini abusus, aut novae medorrhoeae susceptum contagium, phlogosin acutam in urethra revocando, longaevae finem imposuit medorrhoeae. Parum refert, quae demum cereolorum, qui singuli tantum mechanico in urethram stimulo agunt, ac eandem comprimunt, extendunt, eligatur compositio; modo gradatim a minoribus ad majores ascendi, ac eosdem, laesionis sine periculo immissos, tempore sensim sensimque longiori in urethra non modo relinqui, sed et ad ventrem firmari curemus. In vesicae cavum delapsi, et calculo crystallino pro nucleo servientis cereoli, in museo pathologico, servamus exemplar.

C. angust.  
urethr.

Sed ad feliciora hujus saeculi inventa, vix dicti cereoli, vel ex resina elastica cylindri, catheteres, cum vel *chronica medorrhoea*, vel *urinae difficultas*, *suppressio*, non ex urethrae aut phlogosi, aut spasmo, sed ex mechanica ejusdem *angustia*, nascuntur (§. 533.), licet morbum radicitus vix tolerant, numerandi sunt. Sub ulcere, fistulis urethrae, perinaei, sub prostatae tumore, abscessu, ac pendente ex istis ischuria, saepe



anicum in hoc summo subsidio solatium habetur. Si vel minor, quem majoribus semper praemitti oportet, cereolus urethram haud penetret; tunc *musica* interdum *chorda*, prius oleo inuncta, canalis feliciter, ut nos quoque novimus, angustias superavit.

Si fortis in urethra inflammatio, vel aliud, Suppressio  
urinae. urinae fluxui contrarium, obstaculum, cereolorum, catheteris introductionem impediat; tunc, maturo consilio, vesica, aut per rectum intestinum, aut ad perinaei, — aut denique ad pubis regionem, cum tricuspile, ut in *sexto, de retentionibus, libro* diffusius exponemus, perfodienda est. Plerumque his in chronicis urinae suppressionibus vel prostatae, vel colli vesicae tumor ac durities, ne tricuspis per rectum intestinum, perinaeum, sine laesionis periculo, ad vesicam feratur, impediunt; ac optimo *ad pubem* hoc viscus perforavimus consilio. Qua vero nos lege cereolis, cathetere, tricuspile, his in casibus anti conveniat, — qua denique ratione abscessus, fistulae perinaei, urethrae, tractandi sint, *Chirurgia vos docet*. Vix prius, ac dum jam nimis adoleverint, tumoris, et duritiei chronicae ad prostatam symptomata se produnt, vel accusantur ab aegris. Hinc raro, si un-

quam, auxilium a methodo ( §. 135. ) exposita admittunt; nec unguenti mercurialis ad perinaeum, laudata a multis, inunctio, nec interna, ex cicuta, mercurio, vel aliis, medicamenta, nobis opem, in casu graviori, tulerunt. Plerumque tamen per vices invadit, et nova ex *phlogosi* augetur urinae ex prostatae tumore difficultas: quam saepe hirudines, linimentum volatile perinaeo applicita juverunt. Interdum a *spasmo* excitantur, et per vapores aromaticos, ex sella perforata perinaeo admissos, per clysterem emollientem cum opio injectum, vel per cataplasma anodinum perinaeo appositum, tepidumque per balneum, moderantur haec incommoda.

G. med. in-  
sonis.

Quae foeminam divexat, vel ex *acuta*, contagiosa ( §. 529. ) descendens, vel aliis ex causis ( §. 533. ) oriunda, *insons medorrhoea* ( §. 532. ): haec equidem vix aliâ, quam *chronica* quaevis, methodo generatim tractanda est; interim propiorem sibi mali istius, urbium apud incolas quotidie invalescentis, cura considerationem exposcit. Quae igitur occasionem huic foedo profluvio dederunt ( §. 533. ), ea sollicitudine vel maxima evitari, — atque num illud alterius, primariae, aegritudinis effectum, — num totius sy-

stematis conjuncto, num solo genitalium e vitio descendat, — num foemina majorem cum hoc fluxu habitudinem jamjam contraxerit, inprimis discerni, — ac tandem, desumptis ex hac ipsa cognitione indicationibus, symptomatum, si urgeat, vehementiam, opportunis auxiliis fraenari oportet.

Cum vero facilius praeveniri, quam, adul- C. prophyl.  
tum, auferri queat hoc vitium; interest quamplurimum, ut curâ parentum tenerioribus puellis, a prima pubertate, tum *menstruae* excretionis imminens, tum pendentis ab ejus neglectu, vel a vivendi ratione perversa, *morbosi* profluvii matura suggeratur cognitio. A sola rerum, quae proprii conditionem sexus, ac valetudinem concernant, communi ignorantia, et a male intellecta multarum verecundia, quamplurimas virginum, mulierum, matrumque juniorum aegritudines, a primo principio, neglectas, ac multum, priusquam paterent, adauctas fuisse, doluimus; nec earum, quae jam per annos non paucam, quin de morbo suspicionem formassent, vel eandem parentibus, medicis prodidissent, pituitam ex uteris stillaverint, nobis desunt exempla. In genere, nisi major in urbibus, quam sperare audeamus, sequio-



ris in sexus physica, et morali educatione mutatio succedat; — nisi matrum corpora futurarum *victu, vestitu, artuum exercitio*, sanitatis ad leges accommodatis, majori, quam solent, sollicitudine firmentur; — nisi nuptiae in civitatibus praematurae evitari, matrumque circa prolem alendam officia, ut ab ipsa natura, sic a legibus praescribi queant; — ac demum, nisi major illarum, quae *Ci- ves Reipublicae* donant, partus sub opere, cura apud omnes habeatur; — ars Medica quidem amissam mulieribus hoc ex profluvio salutem hinc inde restituet; sed morbum tam late inter illas extensum, ac numero populorum tam infensum, praevenire, sola, non potest. A frequenti inprimis *pudendorum catarrho*, quem toties frigus, illis, a subdito forte igne calefactis, admissum inducit (§. 533. ), et quo major cum profluvio habitudo in multis inducitur, foeminae sibi caveant.

C. interna.

Quodsi igitur vel morbus quicunque alius, vel totius laxitas, debilitas systematis, hoc profluvium induxerint, comitentur; tunc illa, quae his ipsis opposita sit, methodus, — sub majori autem fibrarum inertia, corticis inprimis, martialium, cibi nutrientis, vini,

exercitii moderati, balneorum frigidorum usus, — ac lenta si febris jam urgeat, elixir vitrioli, *localis* simul *affectionis* curationi praemittenda sunt. Nec prorsus ea, quae *interne* adhibentur, generali laxitati dicata, medicaamina, suos in ipsa genitalia effectus perpetuo recusant; sed vidimus foeminam hoc a fluxu violenter vexatam: cui, quoties martis limaturam stomacho ingesserat, toties fluor illico, sub magna anxietate, suspendi, usuque martis seposito, reverti consuevit. Rarum est, huic morbo *plethoram*, pro causa, subesse; ac si menstrui defectus frequenter eundem praecedat; ex eadem utrumque symptoma origine, locali scilicet ad uterum obstaculo, plerumque descendit. Hinc *raro*, si unquam, *venaesectio* foeminam, *chronico* huic fluxui subiectam non laedet. Nec minus ea, quae, ob serosi, mucosi humoris in sanguine redundantis insanam hypothesein, toties commendarunt, purgantia ventrem remedia: tum ex eo, quod totius debilitatem, sensibilitatem adaugeant, tum quod viscera pelvis stimulo contrario exagitent, cum damno praescribuntur. Si latens in ventriculo, intestinis, saburra haec exigere videatur: emeticum ex radice ippecacuanhae, vel rhabarbarum cum

magnesia calcinata, juncto cinamomo, praeferri merentur. Si vel solâ cum magnesiâ, vel lapidibus cancrorum, vel aqua calcis, profluvii hoc genus aliquando exsiccatum fuisse legimus: id certe, symptomaticum, ex ventriculo, ab acida saburra vexato, hinc opportunam corpori nutritionem denegante, uterique secretionem per consensum turbante, originem potissimum traxisse, arbitramur. *Mercurius*, quem aliqui hic morbi laudarunt, si pro *purgante* alvum remedio aegrotis praebeatur: non minus, ac alia hujus classis medicamina, debilitatem praesentem adauget; — si, ob *mucosam*, ut supponunt, cruoris indolem, pro *incidente*, remedio offeratur; ad hypothesis magis, quam verae indicationis ad leges praescribitur. Si forsitan acre venereum, herpeticum, vel scrophulosa dispositio fluorem ex utero induxerint; aliquem subinde locum mercurius habebit.

G externa.


Sed, vel universi debilitas systematis hunc morbum praecedat, comitetur, sequatur; vel ex vitio genitalium locali hic pendeat: *externorum* ubique requiritur subsidium; ac ultimo in casu haec jam sola sufficiunt. Temporis interim, quo foeminam profluvium ex utero vexavit, et contractae cum eodem ha-



*bitudinis*, rationem non parvam hic haberi oportet; externaque remedia, sub majori cautela, sensim sensimque, a mitioribus ad fortiora progrediendo, adhibenda sunt. Si alius, isque major forte, morbus, a fluente ex utero pituita subsidium habuisset: incauta profluvii suppressio primariam facillime aegritudinem revocaret. Plura interim *habitudinis* ex legibus infractis, quam quod in aliam iniqua materies repulsa, deposita sit, partem, nascuntur a suppresso hoc profluvio salutis incommoda ( §. 534. ).

Primum, quod *externe* adhiberi mereatur, remedium, est *frigida*: qua, pro balneo locali genitalibus affusa, vel lumborum regioni aliquoties in die, a certa altitudine, instillata, ac simul ex syringe sat crassa, pluribusque foraminulis instructa, in vaginam injecta, puriformis, per stagnationem, locique calorem hic corrupta materies eluitur, et nervorum inertia, et laxitas partium quam optime corriguntur. Sub majori pituitae acredine, foetore, *aqua calcis* vel sola, vel cum corticis peruviani decocto, frigide injecta, melius conducet. Sub magis diuturno ac rebelli profluvio, ad illas, quas in urethrae chronica medorrhoea, ex opio, saccharo saturni, vitriolo

albo, commendavimus ( §. 546. ), — sed, ob minorem vaginae, quam urethrae sensibilitatem, fortiores, injectiones ( N. LXIX. LXX. ) gradatim ascendimus; vel has ipsas, per spongiam marinam, coni inversi figura instructam, filoque munitam, — vel contortum, pessarii in modum, similique liquore imbutum linteum, aliquot per horas, vaginae, cujus simul prolapsus impediunt, committimus. Nec minus *suffragia* ex thure, mastiche, aliisque rebus aromaticis, ad externa genitalia, vel simul per tubum, ne calor vaporis obsit, sat longum, ad vaginam directa, commendari merentur. *Equitatio*, in multis, hoc sub morbo, egregie conducit; nec profluvium abinde, ut expectari licuisset, augeri, sed manifeste imminui, intelleximus.



## O R D. II. G E N. III.

## GONORRHOEA.



§. 547. **A** *medorrhoea* ( §. 518. ), seminis Definitio.  
 humani morbosum profluvium, *gonorrhoeae*  
 sub nomine, ob indolem prorsus ab ea di-  
 versam, consulto separamus. Est vero *gonor-*  
*rhoea* fluxus seminis, vel analogi humoris,  
 morbosus, vel *continuus*, ac stillatitius (*com-*  
*pletus*) vel, sine penis erectione perfecta, et  
 a minori, vel a nullo libidinis stimulo, *hinc*  
*inde*, contingens (*incompletus*).

§. 548. Humorem in matura aetate ad te- Morbi nat.  
 stes secretum, ac per vasa deferentia in ve-  
 siculas seminales depositum, natura, pro spe-  
 ciei humanae propagatione, hoc, non amplo,  
 receptaculo, futuros in usus custodit: donec  
 copia adauctus, et ex parte resorptus, geni-  
 tales non modo nervos, sed et totum syste-



ma, vi magna exstimulet, atque animal humanum generationis ad opus invitet; vel ab illo, quibuscunque ex causis, huic stimulo resistente, sub insomniis, pro aetatis, constitutionis, vitae, ac morum ratione, saepius, aut rarius, *pollutionis nocturnae* sub nomine, expellatur. In *vigilante* interim, *sanoque* viro, si stimulos externos evitet, seminis, praeter voluntatem, perraro fit excretio; ac ut ista, in homine volente, naturae ad finem, succedat, veretri erectio praecedat, et ad copulam foecundam praeparentur genitalia, necesse est. Nec in *dormiente* adeo homine frequentius, quam id seminis collecti copia inducat, hic liquor sub somni ludibriis disperditur; nisi aut victus succulentior, potus spirituosus, sub vita otiosa, ingesti, aut intimius cum sexu altero commercium, vel amor, vel obscenorum lectio librorum, imaginum lascivarum aspectus, libidinosa colloquia, mollisque in dorsum decubitus, naturam exstimulent. In *aegrotante* vero homine, vel dormiat, vel vigil sit, ob varias rationes, et inprimis vel ob totius systematis nervosi, — vel ob specialem genitalium debilitatem, sensibilitatem, vel demum ob stimulum his partibus admotum, seminalis excretio liquo-

ris constitutos a natura limites excedit, et cum insigni sanitatis detrimento, vel sub somno, vel, quod peioris jam conditionis signum est, sub ipsis vigiliis, a causa minori, ac saltem sine debita penis erectione, aut et sine consuetae voluptatis sensu, contingit *pollutio*. Sed et altera existit, rarior longe illâ, virorum conditio: cum semen dormientis non minus, quam vigilantis ex urethra, praeter omnem voluntatem non modo, sed et libidinis, voluptatis sine sensu, ac sine veretri erectione, distillat.

Sunt quidem, qui *vivi* semen viri, quod sponte in *cadavere* factum esse concedunt, sine sensu voluptatis ac tentigine, vel, in dormientibus, sine animae ludibrio venereo, effluere negaverint; sed quamvis haec raro medicorum ad aures perveniant mysteria; duo tamen nobis ipsis, jam pridem, quae contrarium ostendant, oblata sunt exempla: unum, juvenis, sed impotentis cum uxore dilecta, viri, qui suae culpam impotentiae, in seminis, sub somno, sine quovis, de quo sibi constaret, animi ludibrio, ac sine ulla voluptate effluentis, frequentem jacturam non immerito rejecit; — alterum, quod magis raram est, viri, a prima juventute castissimi,

ac licet sexaginta jam annos numerantis, plurimo tamen semine dotati. Hic nempe, cum, in aetate juvenili, robustus, laute nutritus, et a quovis alio sibi stimulo venereo longe cavens, in febrem malignam incidisse, ac in summo periculo versari, medico celeberrimo videretur: ea ipsa, qua mortem hic timebat, nocte, *ter* semen copiose sub somno emisit, ac altera jam die sanitate perfecta gavisus est. Cum vero hujus viri, jam senis, nobis commissa valetudo fuisset; frequenter in illius urinis, nisi semen hinc inde dormiens, a quo plurimum reficiebatur, perdidisset, hoc ipsum ad pollicis unius et majorem altitudinem in fundo vasis deteximus. Ex *prostata*, ut alii jusserunt, hunc album, seminique simillimum liquorem derivavimus; sed cum aliquando, curru, saxosas per vias, celerrime ruditerque veheretur: sub medio cum nobis sermone, et cum certe nulla venereis de rebus cogitatio subesset, sibi lotium ex urethra praeter arbitrium fluxisse monens, id ipsum, quod effluerat, *semen*, odore, colore, consistentia distincte nobis obtulit. Nil certe obest, quin, sub majori vesicularum seminalium *plenitudine*, vel sub *laxo* ostiolorum, quibus istae in urethram deplena-



ter, *habitu*, vel sub praegressa foraminulorum excernentium *erosione*, sub nixu corporis fortiori, equitatu, hic liquor in urethram exprimatur.

Quid, *foemineo* in sexu, humorem, sub coitu, non certe quovis, nec omni a foemina, sed tamen a multis, sub optato congressu, profundi solitum constituat, — quam ille originem agnoscat; hoc, licet de re perquam communi agatur, hanc usque in diem sat certo non perspicimus. *Semen esse*, antiquitas, *ovaria* pro *testiculis* considerans, pronuntiavit; Recentiores, ex magnis rationibus, negarunt; sed, forsitan minori veritatis argumento, a muci, circa extimam vaginam, fontibus prodire dixerunt. Haec scilicet excretio, in multis, — copia, celeritate, et impetu majori, quam a cryptis mucosis repeti ut queat, contingit; nec humor expulsus, tenacem, ut mucus, indolem ostendit. Augetur quidem et istius, sub coitu, per vaginam, secretio; sed quae sub iisdem, ac in viro, phoenomenis, per pauca momenta copiosius contingit, ea non minus in sexu sequiori, quam seminis in viris effusio, voluptatem ex coitu perceptam, oestrumque veneris promptissime extinguit; vel, stimula

continuato, lentius, aut minime, succedit; vel, si frequentius provocetur: eadem, quam major, in viris, jactura seminis, laesae valetudinis incommoda ( §. 549. ) producit. Haec denique, diversa a mucro vaginae, materia, non minus, ac semen virorum, sub somni ludibriis, sine quavis genitalium irritatione externa, muliebri e sinu hinc inde profunditur; et commune nimis utrumque apud sexum masturbationis vitium, aequali in utroque successu, suscipitur, aequali demum salutis amissae poena castigatur. Frequentius in *equariis*, plurimarum equarum, num venerem appeterent, et ad conceptionem essent pronae, examini attente interfuimus. Uno hic ab equo, plures ad venerem equas, ad mammas, genitalia, admoto capite, irritari, ac suam generationis ad opus promptitudinem, largissima liquoris flavescens, pellucidi, ex genitalibus explosione, significari observavimus. Quod certe, in uno ex grandiorum classe animalium observatum, tam conspicuum, phoenomenon, quid in foemina humana conceptionis sub opere contingat, sat clare manifestat.

Quodsi vero, quae ad prolem generandam, utroque in sexu, contingit, tam semi-

nis

nīs virilis, quam humoris, apud foeminas, analogi, excretio, vel a stimulis aequo minoribus, vel praeter arbitrium, tentiginem, suscitatur; tunc morbus, quem *gonorrhoeam* vocamus, oritur, cujus febiles in ipsos non minus aegrotantes, quam in generis humani propagationem, effectus, describere conabimur.

§. 549. Non modo qui, praeter arbitrium, aut medio sub somno, aut vigiles, obscoenum liquorem e genitalibus, minori sub stimulo, deperdunt ( §§ 547. 548. ); sed et illi, qui, necdum *gonorrhoea* laborantes, tamen ultra, quam aut aetas, aut vires permittant, venerem ardentius, libidinosi, colunt, aut semetipsos masturbant, juniores imprimis sponsi, uxores, immaturae aetatis pueri, puellae, aut senes tardiori matrimonio juniore cum foemina juncti, ex nobilissimi, licet pauci, liquoris dispendio non minus, quam ex *convulsiva*, quae singulos coitus comitatur ( §. 467. ), et quam in ipsam epilepsiam transivisse, ex variis exemplis utroque in sexu captis, recordamur, totius systematis agitatione frequente, primum, viribus languentes, de flatibus, de stomachi in-

Symptoma-  
ta.



fracto tenore, conqueruntur, pallescunt, ac pristinae formam elegantiae deponunt; capite gravantur, susurrus aurium, aciem oculorum imminutam, animi moestitiam, anxietatem, — sub motu suscepto, dispnoeam cordisque palpitationem accusant, tremunt manibus, et cruribus vacillant. Interea febris haud adest, ac cibos sat avide assumunt; sed in corporis nutritionem converti, quotidie magis, magisque macilenti, non sentiunt.

Tabes dorsalis.

Huc vero malorum cum ventum est, vel et illi, qui ex propria semen voluntate jam nimis sparserunt, aut cum uxore, aut soli, decumbant, cum palpebras vix clauserint, mox, inprimis in dorsum extensi, ac lecto molliori cubantes, veneris sub somno ludibria, ac novam seminis jacturam patiuntur. Jam vero, si novo concubitu id mali praevenire contendant: se minus aptos ad coitum persentiunt, ac saepe sub dimidia, vel nulla, penis erectione, priusquam sinum mulieris adire potuerint, — interdum jam a solo foeminae dilectae aspectu, vel, oblata rei lascivae imagine, commemoratione, sponte liquorem seminalem, sub exigua, aut fere nulla voluptate, amittunt, ac vera gonorrhoea laborant. Interdum, quod jam divus medici-

nae *fundator* intellexit, cum urinam, aut ster-  
cus reddunt, semen genitale copiosum et li-  
quidum profundunt. Ex *prostata* partem  
istius venire, cum ratione asseritur; sed ma-  
gna, quae hoc profluvium insequuntur, *debi-*  
*litas*, nervosa symptomata, ea satis, nobi-  
liorem hic simul liquorem deperdi, et ex  
partium, quae hoc secernunt, violento et in  
longum continuato stimulo, secretionem se-  
minis enormiter, et cum totius interitu nu-  
tritionis, augeri, demonstrant. *Spinalis* vero  
nervos *medullae* hic magis, quam alios, hoc  
sub morbo, vexari, tum formicarum, aut et  
frigoris, ex collo, per columnae vertebralis  
longitudinem descendendum sensatio, tum  
lumbalium musculorum major, quam aliorum,  
ut spinae dorsi promineant, extenuatio, satis  
ostendunt, ac *tabis dorsalis* nomen, licet aliam  
haec originem interdum, quam ex *venere*,  
agnoscat, non ineptum esse, confirmant.  
Non raro summi ad caput, nucham, lumbos,  
vesicam, anum, dolores hic urgent; vidi-  
musque, hoc ipso in *Clinico Instituto*, juve-  
nem, qui, *onaniae* ex crimine, tum vertigine  
caduca, tum pedum tanta, ut eisdem insi-  
stere non potuerit, debilitate, tum denique  
erurum, ad articulos inprimis, quin macies

jam magna adfuisset, dolore vehemente laborabat. Alterum conspeximus, qui sub ipso onaniae delicto, cum terror accedens, spermatis omnimodam excretionem violenter cohibuisset, a dimidii corporis paralysi correptus fuit.

Quodsi nunc malo, quotidie incrementum sument, obicem non ponant; *febris lenta* accedit, ac sub pulsu celeri, exili, pomeridiani horrores, rubores genarum, calores interni, urentes, sudores nocturni, colliquativi sequuntur; hebetes fatique fiunt, cadaveris speciem ambulantis assumunt, vel corpore obstipo rigescunt; tument oedemate pedes; variae ad cutem maculae, vel pustulae, vel et ulcera nascuntur; oculi in profunda, et fere vacua orbita sepulti, coecutiunt; diarrhoea accedit, deciduntque capilli; et qui nimiam, plerumque vanam, sic aliis generandis operam dederunt: hi vitam, vel ipso juventutis sub flore, ephemeram, aut sponte efflant; aut manu violenta, suarum, quae tantis calamitatibus stipatae sunt, dierum pertaesi, concludunt. Non rarum est epilepticas convulsiones hanc originem agnoscere; et qui sub fortioribus epilepsiae alterius insultibus frequentius polluantur: — hi citius, non



adeo primarium ob morbum, quam ex *tabe dorsali*, per seminis jacturam inducta, necantur. Nec fortissima animalia hoc funesto libidinis effrenis excipiuntur effectu; sed *equos mares*, summi pretii, qui sibi ipsis, sub violento lumborum motu, semen elicere solebant, in tabem eandem incidisse, ac perver-sae poenas voluptatis dedisse, memoria tenemus.

§. 550. Variæ ad gonorrhoeam (§§. 547. 549. ) causae contribuunt. Nunc etenim *debilitas*, *sensibilitas morbosa*, *universalis*, nunc illa *genitalium* potissime, subesse observantur. *Convalescentes* hinc inde semen ex illa, sub somno, frequentius, quam sub ipsa sanitate, amittunt, ac vires deperditas difficiliter recuperant. *Inedia*, *meditatio*, ac *studia profunda*, *moestitia*, non minus huc spectant: ut qui nimis, veneris cupiditates jejuniis animique intensae lucubrationibus, arcere conentur, nocturnae pollutionis causam saepe longe adaugeant. Sed frequentius certe ipse *veneris abusus*, tam ob auctam systematis universi debilitatem, quam ob genitalium infractum robur, ac morbosam sensibilitatem, hunc morbum inducit. *Debilitatem genitalium* majorem

Causae.

progenerant nimium harum partium in suis functionibus adimplendis exercitium, stimulus continuus, sanguinis congestio, ac frequentior seminalium receptaculorum depletio; vel illa, quae istorum foraminulis excretoriis vim facere, ac eadem laxare, erodere queunt. Hinc, amato objecto destituta, et vi solius phantasiae difficilior promovenda, seminis per masturbationem expulsio; — hinc coitus, brevi temporis intervallo frequentius, quam natura exposcat, tentatus: sub quo sanguinem interdum, loco spermatis, a viris libidinis excretum fuisse, docuit experientia; — hinc seminis violenta, sub ipsa ejaculatione, ob terrorem incussum, retentio; — distractio vesicularum seminalium ab hernia vesicae, tumore scirrhuso, tum proprio, tum visceris adjacentis; — spermatis collectio, in corpore laute nutrito, nec sibi satis a stimulis venereis cavente, nimia; — frequentior plenarum vesicularum, sub nixu ad alvum deponendam fortiori, compressio; — equitatio diuturna ac incommoda; — lapsus in perinaei regionem, aut violens contusio; — sectio calculi praegressa; — frequens urethrae, testiumque, sub medorrhoea acuta, irritatio, potissime huc spectant.

*Sensibilitatem morbosam* his in organis inducunt, tum ea ipsa, quae robur istorum infringunt, tum inprimis morbi urethrae, prostatae, vesicae, vaginae, uteri, ovariorum, rectique intestini, praegressi, ac iterum *gonorrhoea acuta*, *spasmus vesicae*, *calculi* in ista, vel in ipsis vesiculis seminalibus haerentes, *drastica remedia*, vel *diuretica*, apud viros, fortiora, *aphrodisiaca*, inprimis *cantharides*; acre quodcunque verendis admotum, *rheumaticum*, *arthriticum*, *herpeticum*, *venereum*, *leprosum*, *semen ipsum*, varias ob causas corruptum; — vel quaevis his in partibus *phlogosis*, vel *suppuratio*, sub *fistula ani*, *ulcus cancrosum*, *venereum prostatae*, *colli vesicae*, *seminis excretionem*, — nec semper per *urethram*, sed, quibus patet *via morbosa*, per loca, provocasse sunt visa. Sed vel ipsa *seminis*, aequo frequentius excernendi infelix *consuetudo* saepe facit, ut, ad minus volumen reductae seminales vesiculae, vel paucis et aquosis a semine ad novas depletiones facilius stimulentur. Quin sollicita magis, quam corporis, maturi ac vegeti, vitaeque *socialis*, nec a victu lautiori, nec a sexus alterius consortio sibi satis caventis, conditio id suadeat, fuga veneris,



in quibusdam, a natura fervidioribus hominibus, pollutionis nocturnae ac nimiae causam largitur: ut *veneris morbosae* non raro ipsa *conjugali in venere* sit posita medela. Haec ipsa vero ex genitalis humoris abundantia descendens pollutio, si diutius continuet, in *habitualement* converti, et a causis non magnis in corporis detrimentum in dies frequentius succedit.

Sub majori vero, tam universi systematis, quam genitalium ipsorum debilitate, cum sensibilitatis incremento morbozo conjuncta, vel sola imaginatio, vel longinquae adeo partis, non summa, irritatio, ad mirum frequenter pudenda consensum provocabunt. *Hydrophobia*, enormes interdum erectiones, ac unum intra diem, triginta pollutiones induxit. Apud viros literatos, hypochondriacos, nimis frequens subinde seminis jactura est. Jam sola de rebus venereis cogitatio, vel papillarum ad mammas irritatio, quibusdam ex sexu sequiori, genitalis secessum liquoris inducit. Ipsa purgantia medicamenta, quae in vesicam et urethram proprie non agunt, ob nervorum tamen communia principia, erectiones fecerunt. Temporalis ex musculi vulnere, pollutionis historia occurrit. Dum virgis caeduntur pueri

jam puberes, non erectionem modo, sed et seminis jacturam aliquando patiuntur. Vel solus jam clyster, calidiori ex aqua injectus, pollutionem induxit. Ex colica spasmodica lethali, pollutio secuta est.

§. 551. Jam ex sola, quam hic exposuimus, morbi historia (§. 549.), ejusdem simul pericula sat clare elucent. Nulla quidem tam *aurea* fuit, quin temperantiae *amor* leges violaverit, *aetas*; sed multa sunt, in quae descendere, praescripta hic vetat brevis, et quae mores hominum ab antiquis discedere, ac unius, in omnem quasi gregem, vitia proserpere fecerunt. Tam late scilicet, luxuriosas per urbes, per plurima, utriusque sexus proli alendae, educandae dicata hospitia, per integras virorum, mari, terraque, sine conjugis consortio, viventium, societates, expansum *onaniae* vitium, quemadmodum a solis medicorum hortatu monitisque extingui omne non potest; ita promptius a bonis legibus ac morum disciplina restitutis, quam ab arte salutari, auxilium exspectat. Innumera hoc ex fonte, in quavis Republica, ob deletam in prima juventute cum uxore coeundi potentiam, divortia, or-

Prognosis.

bata prolibus conjugia, ac praematura civium funera quamplurima repetenda sunt. Quot non systematis nervosi vitia, convulsiones, epilepsiae, paralyses, hebetudines, amentiae, vitae taedia, — quot non haemoptyses, phthises, febres lentae ac hecticae, — quot non leucorrhoeae, uterique haemorrhagiae, prolapsus, ex hac unica obscoena scaturigine propullulant! . . . Quae morbi alterius symptoma est, ea, prognosin illius fere sequitur, vel exacerbat, atque nunc facile, nunc vero difficulter superatur, gonorrhoea. Tristior est status viri, cui semen, vigilantibus, ex pene non erecto, sed flaccido effluit; tristissimus, si ulcus, aut fistula, quae auferri non possint, alienas huic fluido vias aperuerint. Ubi lenta jam febris hominem adurit, et in exhaustis a tenera juventute, vel longam per venerem corporibus, tam ipsa gonorrhoea, quam, socia huic morbo, coeundi, generandi impotentia, medelam vix non omnem recusant; ac in genere, provector, vix unquam, — quae recens est, non facile, gonorrhoea curatur.

Cura.

§. 552. Ex ipsa causarum (§. 550.) cognitione, hoc etiam in morbo, curationis



petendae sunt regulae. Vel quovis in casu, quae totius systematis actionem paulo fortius incitare, ac sanguinis ad laxiora, sensibilio-  
ra genitalia affluxum augere queunt, potus generosi, aromatica, lasciviae incitamenta, decubitus in lecto molliori ac in dorsum, fugienda sunt. Subita et omnimoda consuetudo a concubitu abstinencia periculo non vacat. Qui nimio veneris ex cultu, cum somno indulgent, polluantur; hos ex isto interdum de nocte expergefieri, ac lotium, si possint, ut mittant, moneri oportet. Si stimulum praesentiant; tunc lectulum quantocyus deserendo, pollutionem non raro avertent. Cui sub somno ex pene erecto semen effluere consuevit: huic, ut a primo erectionis molimine evigilet, suspensorio et scrotum, et coles simul munienda sunt.

Pollutiones nocturnae ac nimiae, ex seminis, aut analogi apud foeminam liquoris *abundantia*, oriundae, non aliter, ut diximus (§. 550.), quam veneris salutaris prudenti concesso usu domantur. Interdum victus tenuior, vegetabilis, corporis exercitium ac labor, vini, et rerum, quae stimulum genitalibus addunt, evitatio, in plethoricis venae-  
sectio, jacturam moderabunt; sed pauci, sa-

nitatis particulam majoris, cum auxilio, quod optimam, in dubiam, aut pejorem convertat, valetudinem, nubere si possint, lubenter rescindent; ac saepe, ex certa organi fertilioris constructione pendens abundantior secretio, a quovis artis, nisi noxio, molimine, sibi leges imponi haud sinit.

Quae vero nocturnae, diurnae, pollutiones, gonorrhoeae, *debilitatem* pro causa agnoscunt; has, victus facilis, sed nutriens, parva, saepius, portione, ex carne tenera, succosa, — cancrorum, testudinum, ranarum jusculis non calidis, cum ovo, — ex amygdalis, *chocolode*, ut vocant, ex recentibus, ac paucis aliis vegetabilibus, farinaceis porrigendus, — potus ex frigida, cum vini generosi non magna quantitate, — motus corporis, pro viribus, in aere sereno, nec frigido nimis, nec calido, susceptus, frictiones cum pannis asperis, fumo aromatico imbutis, cauta, genitalia ne irriteret, equitatio, amica, proprio cum sexu, consortia, non parum moderabunt. Evacuatio hic quaevis, nisi aliae, sat fortes, rationes hanc exigant, evitanda; sed simul quae robovent, cautissime, ne stimulum augendo, fluxum seminis mox revo-cent, longo tempore adhibenda sunt.

Peruvianus hinc *cortex* cum aqua decoctus, emulsione arabica, et aquae cinamomi portione superadditis, egregia hic praestat. *Aquarum* usus *mineralium*, ob validam in urinis pellendis potentiam, non satis tutus apud omnes videtur; et facile *martis tinctura* cum succo pomorum parata, vino martiali, suppletur. Vel et ferrum, in pulvere, cum cortice cinamomi ac saccharo porrectum, conducet. *Spadanae* interim non raro hic cum fructu, vel solae, vel lacte remistae, porriguntur. Ex *balsamicis*, nisi obsint, hic parum exspectamus auxilii. *Adstringentia* interne porrecta, cum in *chronica medorrhoea* rarius fluxum cohibuisse sint visa, parum quoque aut nihil in testes ac vesiculas seminales operari viderentur; interim, cum major simul totius systematis hoc in morbo, quam in quavis habituali medorrhoea, debilitas occurrat: adstringentia levi manu porrecta, qua ipse cortex et ferrum virtute prosunt, interdum conducent. Potissimam hic laudem meretur *frigida*, corpori, lumbis, perinaeo, genitalibus ipsis, brevi tempore, ac saepius adspersa, vel per clysteres hinc inde, sed pauca quantitate, in rectum intestinum injecta. Apud foeminas, nisi jam nimis hac in parte




irritabiles, frigidae per vaginam injectio suadenda est. Sub corporis non jam extrema debilitate, balnea, ac tandem natationes in frigida, conveniunt. Sed cum tanta in aegrotis, per seminis jacturam exhaustis, *sensibilitas* hic urgeat: *opium* a multis hoc in morbo laudari, rejici ab aliis, videmus. Non raro hoc genus remedii, ob stimulum, quem prima actione inducit, ob lasciviae imagines, quas in praedispositis revocat, non minus, quam ob virium inertiam, quam, illo cessante, relinquit, cum damno porrigetur; sed quemadmodum in penis, sub *acuta medorrhoea*, erectione, curvatura violenta (§. 537.), sub testium tumore symptomatrico (§. 539.), insignes *opium* virtutes praestitisse est visum: sic quoque sub isto morbosae sensibilitatis ad genitalia effectum, inprimis per clysteres ex frigida, vaginae, vel ano injectum, non minora aegrotis beneficia praestabit.

Primorum vero Medicorum consilio, *lactis*, in gonorrhoea et tabe dorsali, usus non immerito commendatur. Hoc igitur tam ad victum, quam alia ratione, qua copia debili et in acidum coagulum proclivi a stomacho perfertur, inprimis cum latens *acredo* genitalia, exstimulet, concedi, ac *humanum*, ex

ipsis, nisi stimulus, apud viros timendus, hoc vetet, uberibus sugi, vel mulsum recenter ex capris, aut vaccis, quod magis lacte asinino, tenuiori, hoc nutriat, praeberi cum fructu potest. Si flatus, pondus ad ventriculū, ructusve acidi sequantur: *lac* illico suspendi, ac post sedatas cum magnesia calcinata, et rhabarbari pauxillo, turbas, iterum, cum aqua calcis, vel *spadana* remistum, tentari, — si vero facilius ab aegroto perferri non queat, in totum seponi meretur.

Si forsitan *mechanicam* gonorrhoea, ex calculo, fistula, tumore, ulcere cancroso, agnoscat originem; nisi aliquod interdum *Chirurgia* hic offerat, — nullum *Medicina* hic suggerit consilium.





## O R D. II. G E N. IV.

## GALACTIRRHOEA.



Secretio  
lactis.

**§. 523.** Duplicem vitae fontem natura pu-  
 sioni humano maternum ad pectus aperuit,  
 et magna *chyli*, haud plurimum mutati, co-  
 pia has vastas per glandulas quotidie, geni-  
 tricis sine damno, in filium transfunditur.  
 Per longam annorum seriem, vix alia, quam  
 ipso *virili* in sexu, hujus mirae scaturiginis  
 vestigia comparent; ac puellis non magis,  
 quam pueris, vix utero exclusis, mamillae  
 hinc inde rubent, calent, dolent, ac tumi-  
 dae, serosum liquorem profundunt. Quodsi  
*virgines* intactas, vel ex morbo, vel uberum  
 suctione praemissa, *lac verum* dedisse, ex-  
 perientia aliquando docuerit; id et pinguibus  
 laxisque *viris*, quin *vetulis*, et mulieri, quae  
*ulcus*, aut *molam* in utero gerebat, aut cui  
*menstrua suppressa* fuerunt, ex mammis sat  
abunde



abunde stillasse, docet eadem rerum Magistra. Sed ab aetatis *duodecimo* fere anno, in quibusdam celerius, sepultae hucusque glandulae ex virginis thorace assurgunt, protuberant, et globosam firmamque in molem adauctae, tardioris uteri cruentum tributum exspectant. Hoc tandem soluto, per *triginta* vix non annos, functionis subeundae promptitudinem in virgine, perpetuo *arentes*, mirifice conservant, ac suum cum utero consensum *periodice* non modo, turgentes, dolentes, ostendunt; sed et sanguinem hinc inde, cui transitus per uterum, forte morbo correptum, negatur, easdem ad leges transmittunt.

Sed utero, vix humano ac foecundo a *Ingravidis* semine irrigato, mammae, post *primos* jam menses, in aliis, a quinto ad sextum, a sero, vel sat denso interdum a lacte, duriores volumine increscunt, tenduntur ac dolent, vel in illis, quae partum jam expertae sunt, secretum non raro liquorem sponte effundunt. Est tamen, ubi aliter res accidit, et vidimus mulierem, cui mammae, cum gravida *non* esset, continuo, ad novam usque conceptionem, lac multum fundebant; quando primum vero utero conceperat: lac omne di-

sparere solebat. Quo partui vicinior est gravida, eo moles mammarum, et serosi humoris secretio magis magisque augentur.

In puerper.

Excluso foetu, natura foecundi curam uteri gerit, vasa prius extensa, dilatata, retrahit, coarctat, exprimit, emungit; affluxum sanguinis superflui avertit, ac minores, vasorum hujus torrenti, diametros opponit; unde, excreto, qui *lochiorum* sub nomine venit, sanguinolento, partusque reliquiis remisto humore, *tertia* fere, aut *quarta* etiam die, magnum jam opus quodammodo absolvit, uterumque, ad illum saltem statum, quo major arteriis praepotentibus resistentia opponatur, reduxit. Novae hinc sanguini leges imponuntur; neque sine omni, tum uteri, tum universi systematis turba, hoc opus absolvi-  
tur. In illo scilicet, excretio saniosi liquidi per breve tempus quodammodo languet, tensionis, plenitudinis sensus in pelvi percipitur; — in hoc, motus febriles insurgunt: levis, et sub cute quasi repens, aut per columnam vertebralem descendens horripilatio puerperam corripit; hanc sequitur calor auctus, facies accenditur, caput dolet, sitis accedit, pulsus frequentia, plenitudine augentur, inquietudo cum insomniis turbulentis, pectoris

quaedam angustia, dolor glandularum axillarium, brachiorum movendorum difficultas, molestant mulierem: cujus ubera magis nunc assurgunt, tenduntur, dolent, ac seri albescentis majori secretioni indulgent. Sudores, acescentem spirantes odorem, copiosi erumpunt; et post unam alteramve diem, his motibus a natura impensam, *lochia* demum quidquam augentur; sed serosa, mucosa magis, et albida, et puriformia sistuntur, continuantque in illis, quae mammas puero sugendas praebent, per *quindecim fere dies*; in illis vero, quae hoc fungi officio aut non possunt, aut fungi, in filium crudeles, reculant, per *sex* aliquando, et ultra, *hebdomadas*. Hanc igitur *febrim*, ex solo mammarum turgentium, dolentium, ac lactis nunc aucti phoenomeno, *lacteam* Medici dixerunt. Interim hanc ipsam uberum, jam prius ac febris illa accedat, lacteo humore plenorum, affectionem, *symptoma* potius laborantis adhuc, vulnerati quasi, ac sese depurantis uteri sistere, ex statu *virginum*, quibus menstrua parantur, et quibus tunc ubera turgere, sororiari, dolere, ac febrilia interdum symptomata sub asci observamus, manifeste docemur. Nec enim ad solam lactis secretionem tot motus excitari di-



cemus: cum nulla sit, quae febrim, tantasque turbas sibi exigat, secretio. Certe, quod in gravidis ad mammas *aperitur*, — id sine stimulo insigni perficitur, secretionis sat amplae in multis negotium; nec sub ipsa mammarum sat magnâ, alio foeminae sub statu exorta, inflammatio, aequalia, per universum systema, symptomata, quam in puerpera *ex utero* succedunt, inducit. Quodsi febris, quam *lacteam* vocarunt, majorem ad gradum ascendat, neque lochia restituantur; non adeo in *mammarum* aegritudinem, quam in *metritidem* (§. 223.), aut in *puerperalem peritonitidem* (§. 217.), illa mutatur; ac saepe, vano *febris lacteae* sub titulo, utriusque morbi primordia, a medicis neglecta, in funestam puerperis febrim converti cernuntur. Si major *febris lactea* in illis esse dicatur, quae robusto ac bene nutrito corpore incedunt: hoc non adeo ex lactis copia majore, quam haec ipsa major secretio, ex fortiori uteri in mammas actione, et ex lege stimuli intensioris repetendum est.

Utero humano a suis post partumcrementis, par superficialem quasi phlogosin ac febrem, quam *uterinam ephemeram* dicere, quam *lacteam*, mallems, repurgato; et ubera,

modo puero ad sugendum porrecta, tensionem, sensibilitatem majorem deponunt, atque lactis in dies copia, albedo, dulcedo, augentur. Manifestus primae *suctionis*, ex mammis est in uterum depurandum, ut alibi (§. 467. ) jam monuimus, effectus, atque sub quavis papillae sensilissimae tractatione, reliquas ex partu materno in sinu materias abundantius fluxisse, a foeminis percepimus. Hoc etiam beneficio, quae integras sese filiis matres non sistunt, aut quae suos lactitare non possunt, genitrices privantur; sed quamvis post paucas jam dies, chyli ad mammas torrentem, sub variis, et alibi dicendis, periculis, divertant; per longos tamen menses, vel etiam plurimos per annos, lactis portio aliqua in uberibus detegitur. Quae vero mammas puero sugendas offert, vel mater, vel nutrix: ea, modo satis nutriatur, nec totius, aut organi discernentis, vitio laboret, lactis quantitatem quae proli, etiam *gemellae*, aliis sine cibis, donec dentes, his quodammodo subigendis idonei, proruperint, nutriendae sufficiat, quotidie suppeditat. Non paucae adeo nutrices, praeter illam, quam pueri, ad plenam usque satietatem, suxerunt, lactis portionem, aliam, sat magnam, sponte ex uberibus

pluentem, deperdunt; sunt aliae, quae, alteram jam prolem in utero gerentes, primam, saepe sine damno illius, plures per menses, lactitarunt; - aliae, quae, forti sub febre constitutae, dilectum tamen filium tenero a sinu repellere nolentes, lac, a morbo nequaquam infectum, aridas sitientis in fauces, cum insigni charitate, continuo stillarunt. Nec paucas certe matres, quibus ubera primo a partu, ad secundum, vel tertium, lacte, interdum sat multo, nunquam caruerint, conspeximus; et sic per annos in multis tam copiosa nutrientis principii ex uberibus, quin morbum inducat, excretio continuat.

Morbosa  
secretio.

§. 554. Sed aliter in aliis res utique succedit. Vel enim longiori temporis, quam par est, intervallo lactatio protrahatur; — vel plures nutrix pueros simul alendos assumat; — vel a natura, nimio labore, necessariae nutritionis defectu, jam debilis et viribus exhausta, vel aetate nimis tenera, et proprii incrementi necessario sub opere, hoc sibi onus imponat; — vel morbo diuturno, ac certa in phthisin pulmonalem dispositione affecta, huic se officio accingat; — vel partus partum nimis rapide, quin lactatio cele-



riorem, ut solet, conceptionem retardet, sequatur; — vel demum major, quam par est, chyli, nutrientis principii copia quotidie per ubera praecipitet; in quovis certe casu, lactatio lentum materno corpori ex inanitate interitum praeparabit.

§. 555. Morbum vero ex lactis redundantia et profusione, cum tabe, seu corporis materni atrophia, productum, *galactirrhoeam* vocamus.

Definitio.

§. 556. Latiori tamen sensu hoc nomine, quam scholae quidem solent, hic utemur: nec modo consuetâ maiorem ex uberibus secretionem, et sequentem ex ista, nutritionis jacturam, — sed quodvis lacteum ex mammis, quod corpus nutricis, propriarum sine virium notabili consumptione, perfecte haud possit, profluvium, *galactirrhoeam*, — illinc completam, — hic incompletam, dicemus. Lac verum, aliis interdum ex partibus, quam per uberum papillas, profluxisse, nisi *chylum*, sine quavis in corpore mammarum praeparatione, pro lacte, sine magno rationis fundamento, declarare velimus, quod genus profluvii *galactirrhoeam* erroneam vocarunt, non facile admit-

Divisio.

timus. *Chylum* per horas in sanguine, haud multum sua ab indole mutatum, fluxisse, frequenter nos ipsi intelleximus. Sanguinem emissum fere *album*, prae rubro, colorem habuisse, — similem humorem, ptyalismi sub forma, per salivam, sub specie sudoris, ex oculis, umbilico, aliisque ex partibus distillasse, medicorum non paucae observationes testantur. Sed quamvis *lac* e mammis resorptum, donec in sanguinem convertatur, hoc nomine venire, nil obsit; vix tamen ex solo effluentis materiae *colore*, vel ex aliqua in coeteris cum *lacte* similitudine, *lac verum* stillasse, aut *lacteam* in parte *metastasin* subesse, cum aliqua certitudine asseritur (§ 219.). Interim non exiguam, *galactirrhoeam veram* inter ac ipsum *diabeten*, affinitatem agnoscimus; ac forsitan non tam *lactis* ipsius, quam *principii nutrientis* major, quam par est, contenta in lacte mulierum quarundam, copia, *atrophiae*, ex moderata licet pueri suctione venientis, est causa. Quem alii viderunt, *diabetes chylosus* (§. 480.), aut *fluxus per renes coeliacus*, ut varii dixerunt; is certe cum ipsa *galactirrhoea* haud parum conspirat; in hoc tamen, praeter locum originis, diversus: quod particulae nutrientes, ex lege naturae,

gravidarum puerperarumque mammas pertranseant, et ex causis plerumque minus obscuris, earum copia naturalem excedat.

§. 557. Non *humana* modo foemina, sed Symptoma.  
universa animalium classis *mammalium*, huic morbo subjecta esse videtur. Frequenter *vaccæ*, ob summam lactis, quam, sub victu eodem, prae sociis, quotidie largiuntur, quantitatem, *atrophicæ* redduntur; ac talem nuper vidimus, quæ, in coeteris sanissima, et pabulo permulto nutrita, vel hoc solo, quod omnes ejusdem stabuli vaccas fere tertia lactis optimi parte superaret, ad insignem prorsus maciem reducta fuit.

*Galactirrhoeæ* symptomata, ab illis, quæ tabem, ex humorum jactura lenta, quamcunque aliam (§§. 475. 483. 516. 546. 552.) circumdant, haud differunt. Si vera lactis redundantia hunc morbum producat: tunc niveus hic, et nutriens prae aliis liquor, vel sine praemissa papillarum suctione, copiose ex uberibus, post paucas a pastu horas, effunditur sponte, ac plurima, quæ mammis apponit mulier, lincea perenni hoc fonte profundius humectat. Vel, sub lactis non tam insigni profluvio, cum nutritis in corpore materiae defectus



nutricem premat, aut alia, ex dictis (§. 554.), ratio praecesserit, majorem foemina ex quavis pueri suctione debilitatem persentit. Sub ciborum desiderio, et victu majoribus, macies quotidie increscit, debilitas a quovis corporis exercitio major, cordis palpitatio, dispnoea, tussis sicca, facies pallida, ad genas rubella, comparent. Hucusque febris a pulsu non proditur; sed aliquam temporis post moram, appetitus ciborum deletur: accedunt nauseae, symptomata nervosa, cephalaea insignis, tussis increscit, ac meridianas ad horas, praevio subinde horrore, calor levis excitatur, et sitis major, dolent artus ac dorsum, debilitas quotidie augetur: quam sudor succedens nocturnus graviolem mox reddit. Jam dolor thoracis, vel sterni, sub tussi, dispnoea, vel braehiorum sub motu, punctorius, — pulsusque duriores, celeres, sed parvi, haemoptysis ipsa, ac plurima affecti pulmonis indicia, sputum purulentum, tabes aperta, colliquativi sudores, vel alvi fluxus, lipothymiae, sequuntur. Sanguinis copiose ex mammis ruentis, ac liquidi assumti nec quidquam mutati, ex uberibus profusi, descripta ab aliis, exempla non vidimus.

§. 558. *Galactirrhoëae completæ* (§. 556.) *Causæ.*  
 causa, vel ex ipsa profluentis principii nu-  
 trientis jactura pernoscitur. Sed quid omnem  
 quasi *chylum* mulieris e sanguine, ad ubera,  
 quasi sola, perducatur; id, nisi fortior pueri  
 avidioris, et jam nimis adulti *suctio* illustret,  
 non facile videmus. Nimia forsitan mamma-  
 rum sensibilitas, debilitas localis, aliquid con-  
 tribuit; sed novimus plures, ex *vacca* bonæ  
 indolis, filias, lac aequè copiosum ac pingue  
 dedisse; alias, non absimili *hereditate*, sub  
 optimo licet pabulo, nec dimidiam quidem  
 lactis, non optimi, quantitatem concessisse.  
 Nec in foemina *humana*, id aliter succedere,  
 sed, familiae quasi jure, mammae lac pau-  
 cum, aut multum secernere videntur. Ipsa  
 forsitan matrum, proles ab uberibus arcendi,  
 aut singulas lacte proprio nutriendi, *consue-  
 tudo*, in filias actionem exercet. Nullius fere  
 partis, tanta, diversos inter Populos, quam  
*uberum*, occurrit diversitas; et quamvis ipsius  
 ratio *vestitus* quamplurimum huc faciat; sunt  
 tamen integrae, in quibus ubera foeminas  
 vix multum exornent, — aliae, in quibus  
 mammae, sub vestitu licet iniquo, insignem  
 ob molem, deformes has reddant, provinciae.  
 Sed cum *pinguiora*, lactis non plurimum se-

cretioni favere, ubera sciamus; forsitan, uno eodemque istorum sub volumine, non minus, quam ex pabuli diversitate apud *vaccas*, meliorem, pro lactis copia, nutriendi virtute majori, certae regiones, quam aliae, cibum largiuntur; nec omnia, quae coeterum satis nutriunt, — sed certa inprimis fercula, quod *nutrices* bene, — sed medici, has in res parum attenti, oscitanter nimis, distinguunt, augendo vel maxime lacti conducunt. Istorum hinc defectus, — crescentes, sub aucto indies labore, matrum rusticarum inediae, — protractum apud istas, ex novae prolis metu, aut praesentis amore, lactationis, ad pueri jam loquentis aetatem, officium, — lucri, apud *nutrices* pretio conductas, vel plures, vel diutius quam possint, filios nutrientes, cupido, potissimas tabis, ex lactei humoris jactura oriundae, causas nobis offerunt. *Incompletæ* causas *galactirrhoeae*, morbi praesentes, praegressi, ac nota corporis dispositio, interdum satis indicant; sed frequentius rationem, cur paucis a lacte pueris concessis, tam magna in multis debilitas ac macies sequantur, — hanc, ut alias morborum causas permultas, nimis ignoramus.



§. 559. Omissis *prognoseos*, quae ex dictis Cura. ( §§. 554. 557. 558. ) jam satis elucent, momenti, ad ea, quae galactirrhoeam sanent, accedimus. Nec tamen magna circa methodum huic malo opportunam dubia nos prement; sed quivis, prolem ab uberibus quantocyus removendam esse, vel sponte concludet. Est tamen, et hoc in consilio, ne tam largam secretionem praecipitanter supprimamus, prudentis cautelae, et alicujus in separando a matre alumno cunctationis necessitas. Major quidem exhaustae nutricis debilitas, ut aliâ in tabe, alimenta nutriente principio ditiora expetere videtur; sed vix talibus mulieri concessis: qui sanguinem intravit, mox per ubera chylus praecipitat; atque hinc aliquam prius remorâm huic poni, atque largiores cibos, donec profluvium per mammas moderari potuerit, suspendi necesse est. Nimium has ad glandulas affluxum varia infringunt; sed ne plenis, et a lacte turgentibus mammis indiscriminatim admoveantur, vetat facilis contenti lactis has ad partes stagnatio, ac in coagulum proclivitas; vetant varia, ex cohibita celerius tam insigni secretionem, timenda incommoda. Vidimus puerperam, quae, puerum lactitare recusans, ob insignem, a

lacte, mammarum tumorem, vaporem aromaticum iisdem adhibuit. Jam altera die, ubera collapsa, — sed cruris dextri simul enormem, albissimumque tumorem, dolores atroces, per mensem et ultra extensos, observavimus. Hinc uberibus prius ab alumno depletis, ac tempore a cibis assumtis magis remoto, externa, quae chyli affluxum infringant, adhibenda sunt remedia. Tunc scilicet, cum tepido vini spiritu mammae lavari, mox vero panno ex lana, vel emplastro diachylo obtegi, et per fasciam, ne pendeant, ex collo, firmari queunt. Interea omnis brachiorum motus a muliere evitandus, pedes aliquoties in die tepidae immittendi, ac aliae, quae minus debilitent, secretiones moderate augendae sunt. Huc *urinae* inprimis, ac *sudoris* pertinet excretio: quam potu infusi salviae, sambuci aquoso, ac tepido, vel haustu salino, vel sale medio, ad eam quantitatem, ne alvum nimis moveat, porrectis, impetramus.

Postquam sic et puerum gradatim ab uberibus removimus, et n̄m̄ium chyli ex cibis ingestis ad mammas impulsus, et lactis spontaneum ex istis dispendium fraenavimus; ad ea, quae vires nutricis restaurent, nutrientia, corro-

borantia remedia, sensim sensimque, secundum regulas jam alibi ( §§. 475. 483. 516. 546. 552. ) expositas, ascendimus. Hinc peruviani inprimis corticis decoctum, infusum frigidum, martialia medicamenta, — sub febris vero lentae praesentia, elixir vitrioli, aer purus, serenus, potissimum auxilium suppeditant. A venaesectionibus, licet tussis, dispnoea ac dolor punctorius accedant, hic prorsus, nisi verae inflammationis signa compareant, abstinendum, et ad aquas *selteranas*, aut similes, cum lacte remistas, ad emulsionem arabicam, ad vesicans emplastrum loco dolenti, quin suppurationem hic inducat, applicandum, ad opium, noctis tempore, nisi maximus hoc sudor impediat, porrigendum, veniendum est. Interdum gummi myrrhae, cum sale martis et cortice chinae ( N. LXXI. ) porrectum hic profuit. Si ulcus pulmonis his pectoris symptomatis, et tabi, ut causa, simul subfuerit; nec ista, nec alia quaecunque, vitam servabunt remedia.

De profluviis *purulentis* loquendi, hic locus esse, videri quidem posset; sed, praeter illud, quod pars plurima eorum, ad *chirurgicae* magis forum scientiae pertineat;




aliorum, *pyorrhoeae* praemittenda, cognitio morborum, — ne ordini Naturae, cum *Nosologis*, violentiam faceremus, nos, pauca, quae his de fluxibus dicenda sunt, alia in loca transferre induxit.





# FORMULAE MEDICAE

IN §§. PRAECEDENTIBUS CITATAE.



Num. LIX.

*Pulvis aluminosus.*

**R**ECIPE Aluminis, drachmam unam,  
 Gummi arabici, drachmam divid. 3  
 Misce, fiat pulvis, dividatur in quatuor partes aequales.

N. LX.

*Serum lactis aluminosum.*

**R.** Lactis vaccini, libram unam.

Ebulliat in vase terreo, dein adde

Aluminis, drachmam unam.

Lac coagulatum coletur per chartam emporeticam.

Lib. V.

T

## N. LXI.

*Tinctura cantharidum.*

- ℞. Cantharidum contusarum, unciam dimid.  
Spiritus vini rectificati, libram unam.  
Digere per triduum, et filtra.

## N. LXII.

*Tinctura thebaica.*

Vid. Formul. Medic. N. XVIII. NB. *per errorem*, ~~novo~~ hic numero indicata est.

## N. LXIII.

*Solutio opii.*

- ℞. Opii puri, grana quindecim,  
Solve in  
Aquae distillatae unciiis decem.  
Cola.



## N. LXIV.

*Solutio opii saturnina.*

- ℞. Opii puri, grana quindecim,  
Solve in  
Aquae distillatae unciis decem; adde  
Sacchari saturni, grana decem.

M.

## N. LXV.

*Injectio mercurialis.*

- ℞. Mercurii sublimati corrosivi, gran. unum,  
Solve in  
Aquae distillatae fervidae uncia una.  
Detur *pro usu externo*.

## N. LXVI.

*Vitrioli solutio.*

- ℞. Vitrioli albi, granum unum,  
Solve in  
Aquae distillatae uncia una.  
Cola.

## N. LXVII.

*Lapis caustici solutio.*

℞. Lapis caustici chirurgorum, drachmam  
dimidiam,

Solve in

Aquae distillatae unciis sex.

Cola per chartam emporeticam.

Detur *pro usu externo*.

## N. LXVIII.

*Solutio myrrhae.*

℞. Sacchari saturni, drachmam unam,

Solve in

Aquae distillatae unciis sex; adde

Liquaminis myrrhae, uncias duas,

Tincturae thebaicae, unciam unam.

M.

## N. LXIX.

*Injectio vaginalis alumin.*

℞. Aluminis,

Vitrioli albi, ana drachmam unam,

Solve in

Aquae ebullientis, pinta una.

Frigida colentur per chartam.

## N. LXX.

*Injectio vagin. mercur.*

- ℞. Mercurii dulcis,  
Gummi arabici, ana drachmam unam,  
Aquae calcis,  
Fontis, ana uncias duas.

M.

## N. LXXI.

*Mistura corroborans.*

- ℞. Myrrhae electae, drachmam unam,  
Solve terendo in mortario cum  
Infusi chamomillae, unciiis sex,  
Aquae cinamomi, uncia una; adde  
Salis martis, grana quindecim,  
Syrupi corticum aurantiorum, unc. unam.

M.

*Finis Lib. V.*



## ERRATA

## CORRIGE

*Pag. Lin.*

17	24. defraudantur	defraudatur
19	13. exasperetur	exasperatur
25	16. quae :	quae (
26	3. secernitur :	secernitur );
27	15. latero	latere
39	10. excernentes	exercentes
41	14. uncias	unciae
108	12. effectu	affectu
135	19. epiglottitis	epiglottidis
148	19. curavatura	curvatura
180	11. accendit, fluorem	accendit . Fluorem
190	17. exterius	externis
220	19. inferiore	inferiora
228	3. descenderet	descenderat .











